

A. Diss. 10820

CHRISTIANI THOMASII,
PHILOSOPHI & JURISCONSULTI,
QUÆSTIONUM PROMISCUARUM,
HISTORICO-PHILO-
SOPHICO-JURIDICA-
RUM,

IN
ACADEMIA FRIDERICIANA

Anno M DC XCIII.

*Publice ventilatarum, maximam partem
Paradoxarum*

DODECAS.

HALÆ MAGDEBURGICÆ,
LITTERIS SALFELDIANIS.

SERENISSIMI ET POTENTISSIMI
ELECTORIS BRANDENBURGICI
&c. &c.

CONSILIARIIS INTIMIS ET
MINISTRIS STATUS

Atq;

ACADEMIÆ FRIDERICIANÆ
SUPREMIS CURATORIBUS,

Illustrissimis & Excellentissimis
Dominis

DN. JOHANNI FRI-
DERICO de RHEZ,

HÆREDITARIO IN Großenbähnitz/ &c.

ET

DN. DANIELI LUDO-
VICO de DANCKELMANN,
SUPREMO MILITIÆ ELECTORALIS COMMIS-
SARIO &c.

Dominis meis Gratosissimis.

ILLUSTRISSIMI & EXCELLEN- TISSIMI DOMINI,

DOMINI GRATIOSISSIMI.



In signem habere usum Dispu-
tationes, & potissimum publicas, vel ex fine
earum, qui intendi debet ab hominibus ra-
tione vera utentibus, apparet. Debebant
homines ideo disputare, ut collatione duo-
rum vel veritas eo facilius inveniretur, vel falsitas & error
eo melius evitari possit. Quo magis igitur publice ejusmo-
di collationes fiunt, eo major debebat spes adesse, ut fines
disputationum eo citius obtineri possent, cum quilibet de
populo ad placitam collationem hic admittatur, & adeo vix
videatur possibile, ut veritas, quam ita unitis animis quæ-
runt plures, in occulto manere possit, utpote quæ alias non
ita difficilis inventu est, si modo quis vel solus præjudicia de-
ferere velit. Sed diffiteri tamen haud possumus, eo fere di-
lapsas esse disputationes publicas, ut, quod ni fallor Luthero
tribuitur, de plurimis earum jure dici possit, disputando ef-
fici, ut veritas amittatur. Potissimum autem duo enormia
vitia malorum horum fontes sunt. Debebant Responden-
tes & Opponentes animos pacifice ad inveniendam verita-
tem unire, & legibus amicitiae quam maxime in disputando
uti.

uti. At pax bellum, amicitia dolum respuit & adulatio-
nem, cum amicitiae, docente Plutarcho, nil magis adverfe-
tur, quam adulatio. Si vero examinare velis mores dispu-
tationum hodiernarum, vel ferociter belligerantes in iis de-
prehendes, vel impudentes Adulatores, quorum illi maxi-
me operam dant, ut veritas eripiat, hi, ut falsitas & error su-
stineantur. Circa utrumque a Respondentibus pariter atq;
Opponentibus, potissimum autem ab his peccari consuevit.
Nihil notius, simul tamen nihil absurdius, quam quod in ore
omnium est: Disputationes esse instar bellorum, aut: esse
bella incruenta. Inde uti in bello pars, quae nullam habet fi-
duciam virium suarum, pugnam detrectat, & interim apud
suos milites hostem contemnit, aut coram illis de iustitia cau-
sae & felici eventu multa vana disserit: ita & in Disputati-
onibus, in quibus publici errores tanguntur, etiam si cuilibet po-
testas publice opponendi concedatur, multi tamen sunt, qui
cum erroribus adoleverunt, aut quorum interest, ne veritas
populo cognita fiat, qui adeo collationes publicas sub vanis-
simis praetextibus detrectant, inque iis magis muti assident
quam pisces, at e contrario e cathedris suis, ubi non est lo-
cus contradicendi, plurima in adversarios heroice, & cum
applausu miserae plebis declamant. In ipsis autem disputa-
tionibus nihil frequentius, quam ut disputantes vel Sophisti-
ce invicem agant (habet enim & Respondens modos Sophi-
sticos objectionem eludendi,) fraudulentisque technis unus
alterum a veritatis semita seducere intendat, vel clamoribus
auditoria repleant, & medios sermones indecore interpellent,
vel interrogatiunculis ad auditores, ridiculisque gesticula-
tionibus praecipere animos eorum gestiant, vel aperte
rixentur, vel mutuas injurias easque atroces evomant, vel
denique, si aliter non possint, poenis civilibus argumenta pro-
posi-

posita resolvant, aut etiam, si uterque publice se prostiterit, de obtenta victoria magis ridicule certent, & ambo triumphum canant, atque applausum auditorii expetant. Ita facies rerum mutantur, & ex Auditorio Palæstra fit, ex Disputantibus Pugiles, sæpius & Andabatae, cum sæpe clamores illi & Sophismata utrobique nihil nisi aërem verberent. Sed pensitemus etiam scenam adulationis, a priori scena in tantum diversa, ut ibi Tragœdiarum, hic Comœdiarum simulacra deprehendas. Tempus hic laudationibus infunditur mutuis, & cum inter viros virtute præditos ita receptum sit, ut impudentiæ indicium sit, alterum in faciem laudare, penitus amissi pudoris, laudes ejusmodi hilari fronte excipere, quasi ex compromisso publice de impudentiæ præmio certatur. Osculis excipiuntur insulsissimæ vel objectiones vel responsiones; parentum, patronorum, patriæ, imo universi fere orbis literarii felicitas deprædicatur, & nulliter, si unquam, nomine totius populi, sed absque mandato, vota sollemnissime adduntur. Exulat hic Veritas, regnat Autoritas. Contra hanc qui hiscere audent, læsæ majestatis reo judicatur nequior. Comparanti autem inter se ista duo vitia, vix apparebit, quodnam majora damna veritatis studio inferat. Videtur tamen contra adulationem esse pronuntiandum. Vexatio in bellicis istis congressibus minimum vexatis intellectum dat. At adulatio sua natura ita apta est, ut ex sapientissimis etiam reddat stultos, & ita vel maxime noxa hoc disputandi modo infertur incautæ juventuti. Et tamen hoc quoque vitium tam frequens esse incipit, ut pro injuria fere haberi soleat, si quis cordate, modeste tamen, errores publice admissos publice ostendere satagat, & triumphum ignorantia dubium reddere firmis rationibus audeat, in tantum, ut fama

retulerit, non deesse ignorantiae defensores publicos, intempestiva consilia pro Academiarum incremento suppeditantes, e re videlicet novarum Academiarum esse, ut indulgeatur aliquid, & calcar quasi addatur fratribus ignorantiae ad honores & gloriam tendentibus. Quamvis vix credibile sit, ista serio a quoquam prolata esse. Quis enim sine impietatis nota ex Academicis theatra aucupandae vanae gloriae faceret? Quis sine iustissima censura novas potissimum Academias vellet habere pro Asylis ignorantiae, in quibus excrementa aliarum scholarum solatium invenirent & protectionem? Quis non potius ad officium Professorum pertinere iustissime contenderet, ut omnibus modis operam dent, quoutrumque hoc Disputationum vitium e novis potissimum Academicis exulet, & legitimae Disputationes instituantur, & Sophismata pariter ac rixae, atque adulatio illa pestilens in tempore consilium abeundi accipiant? Ego, quantum in me est, siue Respondentis, siue Opponentis vice fungar, semper ita me soleo gerere, ut litigia praescindantur, Sophismata placide ostendantur, mens eorum cum quibus conferatur, distincte proponatur, dubia vel perspicue exhibeantur, vel perspicue solvantur, rationes adhibeantur, non verba inania, denique & juvenis ad iustae disputationis normam & praeeptis & exemplo assuescat. Specimen aliquod industriae meae, sed debitae, & forte minoris, quam a me exigebatur, sistit exercitium praesens; quod cur ad pedes VESTROS, ILLUSTRISSIMI & EXCELLENTISSIMI DOMINI deponam, non longe quaerendum est. Constituit
**POTENTISSIMUS ELECTOR
BRANDENBURGICUS** VOS
Curatores Academiae Fridericianae. Justum est, ut VOBIS
ratio-

rationes reddam, & rerum hic a me gestarum, & intentio-
nis, qua motus disputationes has institui, & Deo dante, ab-
solutis iisdem, singulis septimanis, quantum aëris tempestas
permittet, disputationibus aliis continuare decrevi. Susci-
pite igitur pro ea, qua me hactenus indignum profecuti e-
stis, Gratia, foetum hunc ingenii exiguum, & impofterum
quoque libertatem, quam SAPIENS PATER PATRIÆ,
dum me ad hoc munus vocaret, clementissime mihi in-
dulfit, sub tutamine curæ VESTRÆ, gratiosissime pro-
tegite. DEUS VOS SERVET.

**ILLUSTRISSIMARUM EXCELLEN-
TIARUM VESTRARUM**

Dabam in Academia Fridericiana

Anno 1693. mense

Octobri.

Fidelissimus Cuius

CHRISTIANUS THOMASIUS.

INDEX CONTENTORUM IN PRÆSENTI DODECADE.

Dedicatio & Prefatio differit de vitiis disputantium.

Qv. I. ostendit, non dari justam substantiæ definitionem, eam tamen dari valde interesse Philosophorum, Medicorum & Theologorum.

Qv. II. defendit, Wenceslaum Imperatorem non legaliter esse depositum, nec tantis ac tot vitiis fuisse commaculatum, uti communiter asseritur.

Qv. III. monstrat, jam tempore Socratis futores fuisse Philosophos, & parum apte adeo eos, qui Böhmiū impugnant, argumentum inde desumere quod futor fuerit.

Qv. IV. tentat definire actionem vanam, & proponere quomodo differat a turpi, ad conciliandas pugnas varias Eruditorum, v. g. de licentia saltationis & similium artium.

Qv. V. asserit, quæstiones ejusmodi paradoxas publice proponere nec illicitum esse, nec sine nota injustitiæ prohibendum.

Qv. VI. probat, doctrinam juris Romani de Servis non magnum habere usum in Servis nostris a Turcis captis.

Qv. VII. respondet objectionibus Clarissimi Placcii, directis contra assertionem Autoris, qua dixerat, Regulam interpretationis de Favorabilibus extendendis & odiosis restringendis, nullius esse momenti, cum favorabile & odiosum definiri nequeat.

Qv. VIII. inquit, an detur manumissio Turcarum captorum per baptismum, quam celebris quidam ordo Juridicus effinxerat.

Qv. IX. ostendit, Wenceslaum Imperatorem prope inter martyres esse referendum, & odium adversus Clerum Pontificium, atque protectionē Hussi primarias causas videri, cur tam male audiat.

Qv. X. Ex Conringio contra Conringium disputat, dispositionem Reformationis Friderici III. de anno 1441. contra Doctores Juris & Jus Romanum, non ita iniquam esse.

Qv. XI. Probare satagit & Philosophiam communem Peripateticam & Cartesianam esse plus quam Scepticas.

Qv. XII. refutat communem definitionem Accidentis prædicamentalis, & inquit in definitiones modi & Attributi Cartesianorum.

AD
VENTILATIONEM PUBLICAM
DISSERTATIONUM
CELEBERRIMI AUTORIS
De
RATIONE STATUS
Et
ADJUNCTARUM
QVÆSTIONUM HISTORICO-
PHILOSOPHICO-JURIDI-
CARUM
LECTORES BENEVOLOS

decenter invitat

CHRISTIANUS THOMASIIUS, Jctus,
CONSILIAR. ELECT. BRANDENB. PROF. PUBL.
ET ACADEMIÆ FRIDERICIANÆ ATQVE FACUL-
TATIS IBIDEM JURIDICÆ SENIOR.

b

Olim



Lim cum in Academiis disputationes publicæ haberentur, paucae quaedam Theses ad ventilandum proponebantur, qui mos etiam hodie in Academiis Pontificiis solet observari. Mutata est illa consuetudo apud nos, an in melius an in deterius? ego determinare nolo. Vulgare habetur nimis ac ineptum, collectione paucularum thesium, ut quod nec laboris nec artis est, specimen velle eruditionis edere. Nostri Juvenes longe majora & fortiora scientiæ ac doctrinæ argumenta, suppeditant, dum autores fiunt disputationum elegantissimarum de selectis juris materiis, qua Theoreticis qua Practicis, sæpius in iusti tractatus formam excrescentium. Sed, ni fallor, aberravimus a scopo Majorum nostrorum. Illi specimen eruditionis non quærebant in disputationis elaboratione aut collectione thesium, sed in earundem defensione. Ostendebant ibi Respondentes profectus tum in disciplinis ipsis, ex quibus theses excerptæ essent, tum in artificio disputandi. Hoc, quoniam frequens exercitium, ut omnes artes, præsupponit, addebatur Præses Directoris loco, ne a methodo disputandi disputantes aberrarent, cujus adeo partes plerumque erant rariores, ut plurimum bene se gerentibus thesium defensoribus. At nostri mores de defensione thesium non ita multum sunt solliciti. Non est turpe, crede mihi, adolescentulum respondere ex Tacito, aut Confutio, egregio illo Sinenfium Philosopho. Totus mundus cum nomina rerum transmutet, quidni id liceat studiosis, qui tot privilegiis sunt ornati in jure, ut subinde ex Præsidibus faciant respondentes, ipsi vero Præsidum personam sustineant in cathedra inferiori, & cum melius quic-

quicquam addere non possint, modestiam suam declarent
silentio? Quid verbis, id est, responsionibus opus est, ubi
Præsidis & amicorum testimonia in Epistolis aut carmini-
bus gratulatoriis disputationi præ- & sub-missa, adfunt? Esto:
publicet Præses disputationes sub suo Præsidio habitas, postea
collectas sub suo nomine. Sufficit, quod interim respon-
dens, dum matrimonium forte aut officium ambiit, dum in
judicio exceptio inhabilitatis ipsi fuit opposita, specimen il-
lud eruditionis suæ in succum, quod ajunt, & sanguinem
converterit. Neque falsum committitur, dum quis se Au-
torem scribit disputationis, cujus nec lineam sæpius elabo-
ravit, sæpius nec intelligit. Vitium in interprete latet. No-
tum est: verba intelligenda esse secundum substratam ma-
teriam. In materia præsentis autor est, qui autor fuit, ut
Præses disputationem conscriberet. Sed & longe alios mo-
res esse hodiernos a veteribus istis majorum institutis,
quantum ad opposcentes attinet, cuius facile patet. Cura-
bant olim --- At quid studioforum vitia enarro, quæ in di-
sputationibus obtinent? Nostrum id, nostrum est, quic-
quid hac parte peccatur. Quid enim disimulem? ubi no-
torium sit vitium, & ubi vel me tacente pleræque disputa-
tiones nostræ (absit, ut me ipsum eximam!) id non loquan-
tur, sed clament. Ambitio nostra est, quæ nos movet, ut
hac parte indulgeamus imprudentiæ Juvenum, famam sæ-
pe in dedecore quærentium. Volunt decipi, ergo decipi-
antur. Sufficit, quod fama nostra disputationibus istis niti-
dius elaboratis augeatur. Avaritia nostra est, cujus impul-
su Juventutem alias ad lapsum pronam adhortamur, ut se
prostituât. Ita sumimus pecuniam, & sæpe (neque enim
hæ quærelæ ad rariora Juvenum eruditorum, quorum lau-
di adeo nihil de trahitur, exempla pertinent,) mittimus in-

eptos in inferiorem cathedram. Est lucri bonus odor ex
re qualibet. Inscitia nostra est, quæ nos impedit nonnun-
quam, ut nævos ipsos studentium, vel non videamus, vel
nequeamus emendare. Cæcus cæcum subinde ducit, & fi-
lum Ariadnæum Dialecticæ a plerisque, dum discentes fu-
mus, negligitur, igitur & generoso contemptu idem suspici-
endum est, dum Doctores evasimus. Audaces fortuna ju-
vat. Defectum justarum responsionum supplere possunt
contradictio, clamor, blanditiæ, & cujus maxima perpetuo
autoritas fuit, autoritas. Inde fit, ut in plerisque Germa-
niæ Academiis non infrequens sit, ut Respondens dextror-
sum prodeat, opponens sinistrorsum, Præses, quod felix
faustumque sit, retrorsum aut antrorsum. Justum est igitur,
ut, cum Doctores esse debeamus Juvenum, ne in errores in-
cidant, ipsimet de propria emendatione incipiamus cogita-
re, imo justum est, ut ego, cum honoratissimi mei Collegæ
jam dudum & exemplo & doctrina sua juventutem ab er-
roribus strenue revocent, non ulteriorem moram hac par-
te committam, sed & quod in me est, ipsos præeuntes, quam-
vis non gressibus æquis, sequar. Obtuli igitur non ita pri-
dem publice studiosæ juventuti opellam meam in directio-
ne ad artificium disputatorium. Non ingrata fuit ipsis hæc
oblatio. Proposuerunt enim sibi Generosi & Nobilissimi
Juvenes sequentes, absque præjudicio eruditionis & ordi-
nis sorte locati

DN. LAURENTIUS THOMAS, Oschwizio-Varisc.

DN. ENNO RUDOLPHUS Brenneisen/Efena-Frisius,

DN. JACOBUS CONRADUS Reef/Lindaviensis,

DN. DAVID STAVINSKY, Borussus,

DN. PETRUS BOJE, Dithmarso-Holsatus,

DN. JOHAN. HENRICUS Schlüter/Berolinensis,

DN.

DN. JOHAN. DANIEL WOLFART, Hanovienſ.
DN. HENNINGUS ADOLPHUS Roch/ Hoyenſis,
DN. JOHAN. du CLOS, Metenſis Gallus,
DN. JOHAN. ADOLPHUS Metzſch/ Eques Anhaltin.
DN. Gottfried Scheuerer / Serveſta Anhaltinus.
DN. ANTONIUS GUNTHERUS Winckelmann/
Oldenburgenſis.

quod & respondendo & opponendo ſub meo Præſidio & Directione, ſecundum regulas bonæ diſputationis ſe inpoſterum publice exercere, atque ita ad ulteriora exercitia quaſi præparare velint. Inſerviunt ejusmodi intentioni præprimis diſciplinæ, quæ non certo vera, ſed verofimilia tractant, ut ſunt Hiſtoria, Politica, Jus publicum, & ſi quæ ſunt aliæ ſimiles. In his enim & facilius rationes dubitandi deprehendunt opponentes, & non ita difficulter ope diſtinctionum ex natura negotii deſumtarum, dubia illa expedire poſſunt reſpondentes. Neque de Autore diu ſolliciti eſſe debuimus, poſtquam ſuperiori anno bibliopola noſter *Celeberrimi Autoris*, titulos omnes & encomia noſtra meritis ſuis dudum ſupergreſſi, *tractatum de Ratione Status*, olim in Univerſitate Viadrina diſputationibus publicis agitatum, & hætenus ob ſingulariſſimam, quam ſpirat, eruditionem, diu deſideratum, tertia vice edidit. Continent eæ theſes ſelectiſſimas Hiſtorico-Politico-Juridicas ad nobiliſſimam Juris publici Romano-Germanici doctrinam potiſſimum pertinentes, quæ, eſſi quidem olim, & antequam Miniſterio Aulico admoveretur *Vir ſummus*, ab ipſo conſcriptæ fuerint, & ita umbram ſaltem ſapientiæ *Ejus*, interim longiſſimo negotiorum graviſſimorum, & ad totius Sacri Romani Imperii utilitatem pertinentium, uſu ad ſummum faſtigium perductæ, erudito exhibeant orbi, næ tamen vel ex hac umbra

de ipso corpore judicare, & quod in proverbio est, ex ungue leonem licebit agnoscere. Postulavit autem reverentia maxima, qua *Ipsius* canitiem veneramur, ut veniam petierimus dissertationes istas iterum revocandi in cathedram Academicam, quam & pro ea, qua nos immerentes hactenus profecutus est, benignitate, gratiose nobis indulgit, quod beneficium submissa gratitudine publice agnoscimus atque deprædicamus. Jungam ego singulis actibus quæstionem unam, modo Philosophicam, modo Historicam, modo Juridicam, typis publicis inscribendam, quæ, ut ne cum dissertationibus *Celeberrimi Autoris* misceatur, aut, ne vilis iste pannus purpuræ *Ejus* intexatur, istis legibus ex pacto disputationes nostras habebimus. Disputabitur duodecies, ita ut singulis vicibus ex dissertationibus viginti quatuor *de Ratione Status* binæ ventilari debeant. Fiet id diebus Jovis ab hora octava matutina ad duodecimam. Primis duabus horis Respondentem & duos Opponentes Collegas occasione dictarum dissertationum de Ratione Status fideliter ac diligenter exercebo, ut &, ubi in regulas bonæ disputationis impingunt, ipsis modeste & mansuete ostendam, & utramque partem vel in objectione vel in responsione deficientem adjuvem, ac ita in ipso conflictu exemplis obvenientibus methodum disputandi vel doceam, vel corroborem. Audita decima cessantibus Opponentibus ordinariis invitabimus Auditorium, ut si quis contra quæstionem a me propositam velit opponere & dubio meo satisfacere, surgat, vel alio signo nobis dato dubia nostra destruere incipiat, & ita ubi copia opponentium extraordinariorum erit, continuabimus ad duodecimam usque. Ista vero copia deficiente continuabunt Collegæ ordinarii, quibus liberum erit, utrum in dissertationibus de Ratione Status pergere, utrum quæ-

quæstionem meam impugnare velint. Simul vero his duabus ultimis horis Collegis liberiores conflictum permit-
tam, ut ipsi sentiant, quantum distet disputatio ad regulas
juste exacta, ab isto liberiori discursu, atque eo magis artifi-
cio disputandi adfueri studeant. Uti vero non despero,
studiosam juventutem, quorum res agitur, non infrequen-
ter exercitiis istis interfuturam, atque eandem decenter in-
vito, ita majorem in modum rogo omnes eruditos hujus
urbis, omnesque Eruditorum Patronos ac Mecœnates abs-
que ullo dignitatis aut functionis discrimine, velint potissi-
mum eo favore atque amore me prosequi, & dubia mea in
quæstionibus publice proponenda vel ipsi eximere, vel per
alios eximi benevole curare. Non diffiteor, me & in Phi-
losophia & in Jure non paucas fovere opiniones, quæ a sen-
tentia communiter recepta abeunt. Cumque tempus vi-
deatur esse, ut & Philosophiam & Jurisprudentiam meam,
Deo annuente in ordinem redigam, ne temere quid agam,
constitui, non solum durante hoc exercitio, sed & in poste-
rum singulis septimanis quæstionem aliquam proponere,
vel ad fundamenta Philosophiæ aut Jurisprudentiæ meæ
pertinentem, vel ex iisdem deductam, cujus responsio sem-
per sit paradoxa, & vel communi eruditorum sententiæ,
vel certe multorum Excellentium ingeniorum & hodie in
Philosophia fere regnantium doctrinæ adversa. Ne vero
in leges modestiæ peccem, non audaci determinatione dis-
sidentibus insultabo, sed per : *non liquet* : *subsisto* : *vide-*
tur, & similes dubitandi formulas informationem tacite ex-
petam, rationes vero dubii mei breviter quidem, sed per-
spicue subjungam. Abundat urbs nostra viris, summis ho-
norum Academicorum titulis in omnibus quatuor faculta-
tibus præfulgentibus. Polliceor mihi ex tanta copia vel
unum

unum & alterum futurum esse, qui vel mei misertus, si-
bi erravero, insigni humanitatis officio me in veritatis semi-
tism sit redacturus, vel amore erga dogmata communiter
recepta ductus, eorum veritatem contra dubia mea sit de-
fensurus. Habebunt utique, habebunt magnam objectio-
num aut emendationum copiam, aut, si forte aliquando ea-
dem deficiet, adsunt in vicinis Academiis celeberrimis tot
lumina eruditionis, qui consilia & objectiones plurimas sup-
peditabunt. Et, ne materia disputandi unquam desit, sem-
per liberum erit contra quæstiones quasvis, etiam ante ven-
tilatas insurgere. Igitur publice eorum opem imploro, &
vel ut sui ipsius rationem habeant, obtestor, ne posteritas, si
qua futura est, sibi persuadeat, quod silentio suo errores
meos, si qui suberunt, approbaverint, aut errores proprios
confessi fuerint, aut ne, ubi post istud silentium loco dubiæ
responsionis fidentem assertionem elegero, & tum demum
vel viva voce, vel scriptis easdem sint aggressuri, ipsis op-
ponam exceptionem, non dicam præscriptionis, sed
occasionis ad litigandum elapsæ.

TANTUM.



Q. F. F. Q. S.

IN ACADEMIA FRIDERICIANA
CELEBERRIMI AUTORIS,

De

RATIONE STATUS

Dissertationem I. & II.

De

JURIS PUBLICI ORIGINE
AC DEFINITIONE,

Deque

RATIONE STATUS
IN GENERE,

Cum adjuncta Quæstione

QVID SIT SUBSTANTIA?

Publicè ventilabunt

Die 17. Jul. M DC XCIII, horis matutinis ab 8. ad 12.

CHRISTIANUS THOMASIUS,
Jctus & Prof. Publ.
& Respondens

LAURENTIUS THOMAS, OschWizio-Variscus.

HALÆ MAGDEBURGICÆ,

LITERIS CHRISTOPHORI SALFELDII,

REGIM. ELECT. BRAND. TYPOGR.

Quæro I.

Quid est Substantia?

Ego quidem nescio.

§. I.



Iste paululum cogitationes Lector, nec præcipitante Judicio quæstionem excipe, quasi quæstionem Domitianam posuerimus, & asininam ignorantiam affectaverimus; quasi quæstio hæc sit inanis, & non nisi grillum Logicum vel Metaphysicum concernens, cum omnes Logicorum libri resonent, substantiam esse ens per se subsistens, & scientia mysteri hujus nihil vel parum profit, Age videamus.

§. II.

Olim quatuor philosophorum sectas è celebrioribus fuisse, Platoniam, Stoicam, Epicuream & Aristotelicam, alibi diximus. In *PLATONE* de substantia aut ejus prædicamento nihil deprehendi. Nec verosimile est, cum de conceptu substantiæ multum fuisset sollicitum, cum ex *eius Sophista* constet, Platonem conceptum entis in genere subjecisse conceptui *Unius*, & entis quinque numerasse genera, *essentiam, idem, alterum, statum & motum*. Habes prædicamenta Platonica. Ubi nihil de substantia *STOICI* duplicem classem entium faciebant, in una reponebant *corporalia*, in altera *incorporalia*. *Senec. Epist. 89. Corporis* voce tam latè utebantur, ut etiam *Deum & materiam* corpora esse assererent, & quatuor saltem *incorporea*, teste *Sexto Empirico*, agnoscerent: *Id quod dicitur, (quod Seneca Epistol. 117. effatum seu enunciatum appellat:)* *Vacuum, Locum, Tempus*. Vide omnino *Lipsium lib. 2. Physiol. Stoicæ, Dissert. 5. EPICURUS* apud *Laërtium lib. 10. in Epistola ad Herodotum*

nam paulo post initium, cum sententiam suam de complexu entium seu Universo aperuisset, subjungit, Universum constare ex corpore & inani seu vacuo, additque, præter hæc duo nihil intelligi nec comprehendere, quatenus res ut per se subsistentes, (*καὶ αὐτὰς φύσεις λαμβανόμενα*), & non tanquam earum conjuncta vel eventa (*συμπλήματα καὶ συμβεβηκότα*) considerentur. Ex quo patet, Epicurum per res per se subsistentes idem voluisse intelligere, quod alias substantia dicitur, & per conjuncta seu eventa, quod accidentia vocamus, nisi quod vacuum etiam ad res per se subsistentes retulerit. Vid. Gassend. in notis ab lib. 10. Laërtii f. m. 99. Simul vero id patet, Epicurum, uti nec substantiæ meminit expresse, ita & non posse dici, quod substantiæ justam tradere voluerit definitionem.

§. III.

Jam ad Summum ARISTOTELEM progrediamur, & definitionem substantiæ in eo quæramus. Nescio vero, quo pacto factum fuerit, ut Aristotelis de grege oviculæ sibi & alijs persuaserint, substantiæ illam communiter receptam definitionem, quod sit *ens per se subsistens & sustinens accidentia*, definitionis locum ex mente Præceptoris sui sustinere posse. Age ex ipso ostendamus, quod vel non definiverit Aristoteles substantiam, vel ipse agnovit, hanc circumscriptionem pro vera definitione venditari non posse. Duo autem loci sunt, in quibus primario de substantia & dilucidè tractat, unus in *Categoriis* in *Metaphysicis*, alter in *Categoriis* cap. 5. fol. 13. Edit. Casaub. substantiam primam definit, quod sit, quæ neque de subiecto aliquo dicitur, neque in subiecto aliquo est, ut quidam homo & quidam equus. At cum individua non possint definiri, quis vellet hanc orationem pro definitione vindicare? Pergit n. 2. substantias, secundas dici species & genera, in quibus primæ substantiæ insunt. Nec hæc video definitionem. Pergit n. 12. commune omni substantiæ, primæ & secundæ esse, non esse in subiecto. Nec hoc definitionem efficere poterit, partim, quia ab Aristotele recensetur saltem ut proprie-

prietas substantiæ, (perinde ut illæ, substantias non recipere magis & minus, substantiis nihil esse contrarium.) quæ proprietates non constituunt essentiam rei, sed ejus constitutionem sequuntur, partim, quia involvit conceptum negativum exponens, quid res non sit, non quid sit. In libris Methaphysicorum, quantum ego quidem ex curiosis istis subtilitatibus Sholasticorum ingeniis dignis, percipere potui, Princeps Philosophorum per integros duos libros, septimum videlicet & octavum, definitionem substantiæ quæsit, non tamen invenit. Excerptamus saltem potissima. Supponit *cap. 2. lib. 7.* dari substantias, ut naturalia corpora, ignem, aquam, terram, item cælum & ejus partes. At hæc pertinent ad quæstionem, an sit? neque hanc negamus, aut de ea dubitamus. *In cap. 3.* homonymiam substantiæ tradit. Pergit; *quasi in figura dictum esse, quid sit substantia, quod non de subiecto, sed de quo cetera.* Oportet autem non ita solum, non enim sufficiens est, & hoc nrmque ipsum non esse manifestum. Atque & hoc pro nobis est. *Cap. 5.* determinat, *quod solius substantiæ definitio sit.* Et hoc pro nobis. Ergo quæstio nostra non Domitiana, quia istam definitionem quærimus. *Cap. 13.* disputat *nullum ex universalibus esse substantiam.* Quam bene, non disputo. Saltem id patet, hoc assertum parum facere ad substantiæ definitionem, uti & illud, dum *cap. 15.* asserit, *sensibilium substantiarum singularium, neque definitionem esse posse, neque demonstrationem,* & assertum *cap. 16.* *quod nulla ex substantiis sit substantia,* Librum 8. excerptare supersedeo. Peto saltem, ut Aristotelici mihi definitionem substantiæ vel ibi, vel alio in loco ostendant.

§. IV.

Sed inquam Aristotelem, & consideremus, annon sufficiat ista definitio communiter recepta *ARISTOTELICORUM* ad definiendam essentiam substantiæ, etsi Aristoteles illam non habuerit? Non videtur. Nam communiter *per se subsistere* exponitur: *non esse in alio tanquam in subiecto.* Et convenienter ad mentem Aristotelis, qui dum *in cap. 1. & libro 8.* repetit ea, quæ dixerat *libro 7.* in quo nonnulla differuerat, de *non esse in alio*, ita effert, quod determinaverit de *secundum se, καὶ αὐτὸ.* Sed
hic

hic recurrit, quod hic conceptus sit negativus. *Sustinere accidentia* est conceptus relativus. At conceptus relativus non exprimit essentiam entis realis, quale substantiam esse, cum Aristotele in exemplis modo adductis supposuimus.

§. V.

Accedamus ad *CARTESIUM*, qui uti omnia ex mente assecularum restituit in integrum, sic & fortè definitionem substantiæ. *Per substantiam* ait *P. I. principiorum Philosophia* n. 51. *nihil aliud intelligere possumus, quam rem, quæ ita existit, ut nullâ aliâ re indigeat ad existendum.* Malè secundum Accursium. Ita nec mens nec corpus substantiæ forent. Ita solus Deus substantia esset. Miscuit subtilissimus Cartesius conceptum *per se subsistere*, cum conceptu: *à se subsistere*. Sensit ipse Cartesius hanc objectionem. Unde mox n. 52. substantias creatas definivit, *quod sint res, quæ solo Dei concursu egent ad existendum.* Obscurissimè & insufficienter. Particula exclusiva conceptum negativum facit. Si sensus est, quod substantiæ creaturæ sint à solo Deo, etiam accidentia à solo Deo sunt. Ergo accidentia erunt subsistentiæ. Accedit, quod hic conceptus involvat solam relationem ad causam efficientem. At efficiens non debet ingredi definitionem substantiæ, quicquid etiam Cartesiani de excellentia definitionum à causa efficiente defuntarum differant. Videtur & ista subodoratus esse Cartesius. Ergo statim addit; *Veruntamen non potest substantia primum animadverti ex hoc solo, quod sit res existens, quia hoc solum per se nos non afficit. Sed facile ipsam agnoscimus ex quolibet ejus attributo. &c.* Ex hoc enim, quod aliquod attributum adesse percipiamus, concludimus, aliquam rem existentem sive substantiam, cui illud tribui possit, necessario etiam adesse. Respondeo 1. Ex hoc solum inferatur, quod sit substantia, non quid sit. 2. Attributum substantias distingvit, non communem conceptum format. 3. Non dum declaraverunt sufficienter Cartesiani, quid sit attributum, & quomodo à substantia & modo differat.

§. VI.

Ergo non miraberis si ipsi Cartesiani, quoad definitionem substantiæ inter Magistri sui & Peripateticorum traditiones flu-

et tunc, aut potius Cartesium deferant. **CLAUBERGII** in *Ontologia* p. m. 10. substantiam dicit rem, quae ita existit, ut aliquo ad existendum subiecto non indigeat. **RAEUS** contra in *opusculis Philosophicis adjunctis clavi Philos. naturalis in dissert. pro vera Metaphysica* lib. 52. seq. definitionem Cartesii dum explicare nititur, obscuriorem reddit. Summa eo redire videtur: Per se per se subsistere in definitione substantiae intelligi, ab alio ut causa non pendere. Atque hanc notionem claram esse & clariorem illam, non esse in alio tanquam in subiecto, cum hoc ultimum non possit intelligi considerando substantiam in genere, sed recurrendo ad particularia. Verum premunt Raeum eadem difficultates, quas objecimus ipsi Cartesio.

§. VII.

BENEDICTUS SPINOZA videns, Cartesio licuisse salvam reverentiam in Definitione substantiae recedere ab Aristotelicis, eandem licentiam sibi sumsit dissentiendi ab utrisque. Per substantiam, ait, *P. I. Ethic. defin. 3.* intelligo id, quod in se est, & per se concipitur: hoc est, id cuius conceptus non indiget conceptu alterius rei a quo formari debeat. At nolo me in examinanda definitione deceptoris huius detinere, cum quilibet videat, eum & obscurissima & falsissima definitioni in istum saltem finem immiscuisse, ut virus Atheismi sui, & horrendum dogma, solum DEUM esse substantiam, in eo occultare potuerit.

§. VIII.

Notavit jam ista Philosophorum Cartesianorum acutissimus **PETRUS POIRET** in fundamentis Atheismi everfis p. m. 737. Utinam & ita feliciter definitionem Spinofianam emendasset, sed loco unius definitionis substantiae tradit sex, quarum una est obscurior altera. Ad nostrum scopum pertinent illae duae, p. 741. Substantia dependens est Ens actuale, cuius idea & existentia fundamentum ab alio, in alio, & per alium (qui Deus est) est & concipitur, etsi respectu omnium eorum, quae Deus non sunt, est independens, eatenus, ut non in illis & per illa, sed in se & per se sit & concipiatur, possitque esse sine ceteris, sive ceteris ad eius essentiam & existentiam rationem nihil conferentibus. Item: Idea substantiae dependentis in homine est conceptus seu notio, realitatem substantiae representans magis vel minus, perfectius

seclius aut imperfectius, clarius aut obscurius, distinctius aut confusius, magis aut minus completè prout ad ideam divinam magis minusve acceditur, & ingeniorum diverse sunt sortes. Quoad posteriorem nihil addo, quia revera non est definitio. Prior vel idem dicit, quod per se subsistere Aristotelicorum, vel aliud. Si prius, non morabimur. Si aliud, non intelligo, quod sit: *Substantiam concipi in se.* Cum enim nihil possit esse subjectum sui ipsius, non etiam potest concipi in se. Non intelligo, quomodo possit dici, *substantiam concipi per se*, cum non possit concipi absque accidentia. Non intelligo, *Substantiam posse esse sine ceteris*, cum v. g. supposuerimus, (nec diffitebitur Poiret) hominem canem &c. esse substantiam. At homo sine aëre & aliis rebus, quæ ipsum sustentant, esse nequit, adeoque illæ ad ejus essentiam & existentiam omninò quid conferunt.

§. IX.

Ergo ad vos me confero, Clarissimi *Philosophi*, Experientissimi *Medici*, *Theologi* maximè Reverendi, & à vobis quæro: *Quid sit substantia?* Idque non tam mei gratiâ, quam Vestri. Nostra non adeo interest, ut sciamus, quid sit substantia? *7Ci.* si circa justitiam & entia moralia occupati sint, entia moralia non sunt substantiæ, si circa pecuniam, pecunia quantitas non substantia.

§. X.

At vestra interest, Acuti *PHILOSOPHI*, siue *ARISTOTELICI* sitis, aliàs enim totum vestrum Substantiæ prædicamentum corruet, & cum eo prædicamenta omnia accidentium, utpote quæ vobis fatentibus, sine substantia non subsistunt. Ita collabuntur omnes artes & scientiæ; siue *CARTESIANI* sitis. Quomodo enim de clara & distincta vestra cognitione gloriari potestis? quomodo aliis persuadere audebitis, vos possidere distinctum conceptum mentis & corporis (quibus duobus fulcris tota Philosophia vestra nititur) si distinctum conceptum substantiæ non habetis, è quo conceptus mentis & corporis oriri debent? Vestra interest, Excellentissimi *MEDICI*. Sine scientia corporis naturalis ars vestra nihil est, sine scientia substantiæ scientia corporis vana est.

§. XI. Ve,

§. XI.

Vestra denique omnium maxime interest, Magnifici THEOLOGI. Quomodo *Spinoſe Atheiſmum* deſtruere poteſtis, ſi non perſpicuam tradatis ſubſtantiaẽ definitionem? Aut ſi hæc quæſtio vobis cum Philoſophis communis eſt, vel his plane relinquenda: Quid eſt illud, quod Apoſtolus *fidem* appellat *ἡ πίστις*, ſubſtantiam eorum, quæ ſperamus? Quid eſt panis *ἡ ζωὴ* in Oratione Dominica? Aut ſi & in his quæſtionibus eſſugia vobis præſtò ſint: Quâ de cauſa Orthodoxi Patres in Concilio Nicæno tanta pertinacia litigarunt cum *Arianis* de *conſubſtantialitate* aut *æquali-ſubſtantialitate*, ſi nondum conſtat, quid ſit ſubſtantia? Quâ de cauſa Majores noſtri tam atrociter damnaverunt *Flacium* de Eccleſia noſtra aliàs tam benè meritum, ſaltem eo, quod *peccatum dixerit ſubſtantiam* hominis? Cur diſtinctionem *Flacii* inter *ſubſtantiam materialem & formalem* admittere noluerunt, & Virum optimum Manichæiſmi accuſarunt? *Conf. Carpzov. Iſagog. ad Form. Concord. p. 1159. ſeq.* Ergo Veſtra intereſt, dubium hoc eximi, ne occasio detur credendi, tanta litigia orta eſſe de re, quæ à nemine intelligitur, aut aliam cauſam tantarum turbarum & tumultuum fuiſſe, quam ſtudium veritatis.

§. XII.

Ergo adhuc quæro: *Quid eſt ſubſtantia?* Ego quidem nescio. Expectabo informationem Veſtram per annum. Eâ non ſecuta tentabo, utrum ego minimus eruditorum, veram, perſpicuam & diſtinctam ſubſtantiaẽ definitionem tradere poſſim.

T A N T U M.



4 58. d.
Q. F. F. Q. S.

IN ACADEMIA FRIDERICIANA
CELEBERRIMI AUTORIS,

De

RATIONE STATUS

Dissertationem III. & IV.

De

RATIONIS STATUS NATURA,

Deque

ARCANIS STATUS ET CONSI-
LIORUM SILENTIO,

Cum adjuncta Quæstione

*An Imperator Wenceslaus legaliter sit
depositus, & tantis vitiis contaminatus, ut
vulgo creditur?*

Publicè ventilabunt

Die III. Aug. M DC XCIII, horis matutinis ab 8. ad 12.

CHRISTIANUS THOMASIUS,
Jctus & Prof. Publ.

& Respondens

ENNO RUDOLPHUS BRENNEISEN,
Esenâ Frisius,

B

Quæro



Quaestio II.

An Wenceslaus Imperator legaliter fuerit depositus, & tantis vitiis commaculatus, ut vulgo creditur? Non videtur.

§. I.



Non quaerimus, utrum Electoribus competat Jus deponendi ex causis praegnantibus Imperatorem; nec ne? Age enim id supponamus, aut tanquam conditionem ponamus; si Electoribus Jus deponendi competit: An legaliter fuit depositus Wenceslaus? Cum autem nunquam lex de depositione lata sit, nec etiam depositio consuetudine introducta, & sic certis solennitatibus praedita fuerit: *legaliter* hic significat, quod conveniens est regulis aequitatis naturalis & principiis moralibus ac Politicis, item Juris publici Germanici: In qua quaestione magnum momentum facit; an Wenceslaus tam vitiosus fuerit, ut depositionem fuerit meritus? quamvis ea sola ad legalem depositionem ostendendam non sufficiant, quia legalis non esse potuerit depositio, etiamsi Wenceslaus depositione dignus fuerit, puta si depositio v. g. non facta fuerit ab iis, quibus Jus deponendi competit, si deponentes aequè vitiosi fuerint, si per depositionem turbis implicatum fuerit imperium &c.

§. II.

Jam utut communiter omnes Scriptores, quos legi, Wenceslaum pro monstro hominis habeant, & ita nemo de dignitate ejus, ut deponeretur, dubitaverit, de legalitate tamen depositionis Autores in duas partes abire sentio, quibusdam magna fiducia

fiduciâ & præsumptione legalitatem depositionis afferentibus, ut Gabriele Schwedero *Introd. ad Jus Publ. Part. Spec. Sect. 1. c. 32. §. 8. p. 699.* Carolo Scharfchmidio *ad Schüzii Jus publ. Part. 1. Exerc. III. lib. 30. p. 218.* & Joh. Limnæo *Jur. Publ. lib. 2. c. 14. n. 29. seqq.* & in utroque additionum Tomo ibid. quibusdam eandem negantibus, aut certè de eadem dubitantibus, ut Bœclero, *Notit. Imper. l. IV. c. 1. q. 63.* Illustri Rhetio *Instit. Jur. Publ. l. 1. tit. 4. in fine p. 184.* & Stamlero *de reservatis §. 17. n. 4. seq.* Licebit adeò & nobis pro libertate Academica & de legalitate & de merito depositionis dubitare.

§. III.

De merito incipiemus. Nostrum verò non erit probare: nam quilibet præsumitur esse bonus. Ergo demus Wenceslao accusatorem, & quem alium, quàm ex Doctoribus adductis Limnæum, Scriptorum Juris Publici antesignanum, qui totus in eo est, ut omnia ex antiquis colligat, quæ ad denigrandum Wenceslaum faciunt. *Cuspinianus* ait dI. *in vita Wenceslai hunc dignum scribit, qui non diadema in capite, sed laqueum in collo gestaret, nec inter Reges vel Romanos vel Bohemos, sed inter histriones ac potius porcos numerandus.* Magna accusatio, si vera est. Ego non credo. *Cuspinianus*, *Æneas Sylvius*, Historici Bohemi, fidem non merentur adversus Wenceslaum. Sunt Pontifex, Monachi, Bohemi, omnes inimici Wenceslai, ut ex sequentibus patebit. Igitur probatione opus erit.

§. IV.

Certè quod alii, (ita pergit Limnæus) postquam in lucem præsumpsit & naturam (mater enim in partu extincta) & Deum (nam sacro fonte baptismatim abluendus, baptisterium, ventrem exonerando conspurcavit, imò ferè biennis in Regem Bobemia coronatus, aram, in qua sedebat, onere ventris fœdavit turpissimè) offendisset, prædixerunt, illud omne exitus comprobavit. Dubito, an indignatione an misericordia dignæ sint istæ ineptiæ. Quis homo sanæ mentis inter crimina referret, & infanti imputaret, quod mater in partu extincta, quod ventris onus decorè retinere non potuerit? indicia malæ causæ sunt, loco criminum stercora infantis conquirere. At, inquis, præfagium tamen est, quod in loco sacro, in baptisterio, in

ara ventrem exoneraverit. At, inquam ego, præfagia ista sunt præfagia digna pro laicis, qui sibi imponi patiuntur à Clero, sanctitatem in lapidibus & templis, salvâ cordis profanitate, quærente. Quoties infantes nostri talia committunt? Ridemus mulierculas nostras de ejusmodi præfagiis sollicitas, ac dicimus, si infans cacet, præfagium esse, quod nutrix debeat lavare fascias. Indicium malæ educationis est, quod puer ferè biennis, nondum assuetus fuerit actus istos naturæ certo tempore aut debito loco peragendi. Sed hoc vitium nutricum est, non infantis, & adhuc hodie, etiam in liberis magnatum, non infrequens.

§. V.

Sed audiamus jam, quomodo id præfagium exitus comprobaverit, Nam, ait Ludwel. *præter cædes, quas perpetraverat, crudelitatis insignia documenta edidit. Assiduè penes se carnificem habebat, quem compatrem appellabat, & tam familiariter eo utebatur, ut aliquoties uno eodemque equo secum vehi illum passus fuerit. Dubrav. lib. 13. Hist. Bohem. p. m. 219. Pertinent ad hanc imputationem & ea, quæ Ludwellus adjecit in Tom. II. Addit. ad istum locum p. 62. Quando Rex Wenceslaus bibit excessive, & ad ebrietatem, incurrebat in furiam, & fuit tunc multum perversus, & periculosus, & dicitur quadam vice coquum suum, qui ad voluntatem suam, sed secundum appetitum suum cibos non paraverat, ad veru ligatum affari jussisse. Item quodam tempore ad experiendum, quid decapitandi sub tempore executionis cogitarent, accersivisse spiculatorem, cujus compater fuit, & flexis genibus oculisque suis velatis præcepisse, ut se decollaret, & quia spiculator ense nudo dissimulans ipsum cum platto in collum percussisset, surrexisse Regem, & dixisse spiculatori, ut poneret se super genua, quem sic velatis oculis tunc decollavit. Accidit etiam quodam tempore, dum Rex causâ venationis ad nemus pergeret, & monachum in via reperiret, ut statim à mangone podistam peteret, quâ tensâ, & ex pharetra (quam semper ad latus suum ferebat) sagittâ extractâ, monachum sic sagitta percussit, ut inde mortem obiret, dicens adstantibus, se feram singularem sagittasse, quibus dicentibus, non feram, sed monachum, respondit, monachum esse & debere manere in suo claustro, non in sylva ubi habitatio & conversatio ferarum. Ita legitur in magno Chronico Belgico p. 327. edit. Pistorii.*

§. VI. Hic

Hic non laudabo Wenceslaum, non omnia ejus facta semper excusabo, id meum erit dispicere, utrum ea facta sufficient ad depositionem? Neque disquiram, qualia & quanta facinora requirantur, ut possit dici, Principem dignum esse, ut deponatur saltem disputabo ex concessis. Pauca cædes privatorum, uti Principem non faciunt hostem Reipublicæ, ita omnes, ut puto, concedunt, eas etiam non sufficere, ut quis dicatur Tyrannus exercitio, ut deponi possit. In privato, qui pes aut digitus &c. Reip. est, hoc sufficere potest, ut ense rescindatur. In capite vitia ejusmodi etsi gravia, toleranda & ferenda sunt. Quibus præsuppositis, in genere respondeo ad præcedentem positionem Ludwelli, eum saltem afferre pauca exempla privatorum à Wenceslao interfectorum, ergo nihil ad rem. Addo responsiones plures speciales. I. Illud ridiculum: Wenceslaus assidue carnificem penes se habebat, Ergo crudelis. Ergo & Consules, Dictatores Romani omnes fuissent crudeles. At carnificem compatrem appellavit, familiariter eo usus est. Et hoc ridiculum. Est enim II. locus quidam in Marchia satis cognitus, ubi carnifex tantæ est estimationis, ut multi ex viris honoratioribus, nobiles pariter & ignobiles, ipso familiariter utantur, & fortè etiam sint aliqui ex ipsis illius compatres. An ergo hi viri honoratiores propterea insignia crudelitatis documenta eo ipso edunt? III. Familiariter vulgo receptum est, ut eos qui curru ducunt homines ab uno loco in alterum, sive aurigas eos velis appellare, sive alio modo, appellemus idiomate Germanico Herr Schwager. An propterea crudelitatis vel ignominie signa edimus? IV. Homines ebrios vino furibundos devenire, est effectus naturalis, qui crudelem non facit, cum crudelitas sit vitium hominis jejuni & sobrii. V. Et si propter hunc furorem tempore ebrietatis orientem, Principes essent deponendi, qualia absurda inde sequerentur? VI. jus sit coqvum assari Wenceslaus. Benè. Sed an fuit assatus? De hoc historia tacet. Et vix puto. Sed fuerit assatus. Crudeles fuerunt ministri ebrio Regi obsequium in re injustissimâ præstantes. Ipsum Regem in foro humano ebrietas excusat. VII. Dubito de veritate totius hujus historiae. Ipse Ludwel per rō dicitur eam

circumscribit, quod ferè est nota incertitudinis. VIII. Ipsa verò fabella de decollato carnifice ne quidem verosimilis est, & multis indiciis prodit, autorem ejus non benè calluisse artem mentiendi. Rationes in conflictu suppeditabimus. IX. Quod monachum in sylva interfecerit Rex, antequam ad eam historiam vel fabellam respondeam, audiam prius, quid respondeatur ab adversariis ad excusationem ipsius Wenceslai: Monachos debere manere in monasterio, nec vagari in sylvis.

§. VII.

Restat ultima criminatio Ludwelli. Inter verò purpuratos suos crebro sermone usurpabat: Ego si me diripiendis urbibus Italiae fors praesentem dederit, ceterarum rerum praedam militibus impertiam, vini tantum apud me spolia reservabo. Si quis autem in cellam vinariam fuerit ingressus, gladio ferietur. Aeneas Sylvius in Alphonf. Paralip. l. 2. c. 15. Unde de eodem veriverbium ortum est, esse auri contemptorem & vini amatorem. Cui indubitata postea adiecit fidem, cum à Noribergensibus pro remissione juramenti fidelitatis offerentibus viginti millia aureorum, spretâ pecunia peteret vini Rhenani optimi aliquot plaustra, (in manuscriptis Chronicis Noribergensibus fit mentio triginta millium aureorum & quatuor cuparum Fürstenberger Weins) ex Bucholcero Matth. Stephani l. 2. de Jurisd. part. 1. c. 5. n. 48. Fortuna utique dignus Elielmi, veterum Suecorum Regis, qui nimia familiaritate subditorum compositionibus indulgens, per lasciviam in cerevisiae dolium coniectus interiisse scribitur. Adjuvemus Ludwellum. Si enim meliorem advocatum sententiae communis invenire potuissemus, dedissemus. Huc ergo pertinet, quod ad Schüzii systema d. l. p. 218. annotat Scharfchmidius. De Wenceslao referunt, quod contemptim habuerit depositionem, dicens: Er sey wohl zu frieden / wenn man ihm nur jährlich vier Wagen voll Francken Weins gen Prag brächte / und er solchen auszutrincen hätte.

§. VIII.

Sed vide quæso Lector, quo nos ducat affectus, odium, aut præjudicium alienæ autoritatis. Si JCtus inter celebriores non infimus, non præsupposuisset veritatem opinionis communis, haud dubiè tam misera argumenta ad eam corroborandam non protulisset. Quot propè verba recenset, tot nobis ob insufficientiam
illatio-

illationis suppeditat responsiones. Paucissimas saltem huc collocemus. 1. Wenceslaus vinum valde amavit, ergo justè ab Imperio est depositus, vel dignus depositione fuit. Si ego hoc argumentum defendendum susciperem, vererer, ne ab adversariis meis de violata Principum plurimorum majestate accusarer. 2. Si Princeps depositione dignus est, qui relictâ reliquâ præda, municipio quodam capto sibi omne vinum reservat, quid de istis fiet Principibus, qui & vinum & reliquam prædam reservant sibi. 3. Fortè de illo dictorio post depositionem adhuc dubitare possemus. Aliam longe responsionem refert ex Historia Bohemica Lehmannus in Chronico Spirensi. Als er vernommen/ daß er des Kayserthums entsetzt/ und Chur- Fürst Rupertus Pfalz- Grafe beym Rhein zum Kayser erwöhlet/ so er gesagt haben: Wir seynd des Lasts vom Reich gerne überhaben/ hoffen/ wir wollen nun mit besserem Nutz das Königreich Böhmen verwalten.

§. IX.

Hactenus accusatorem Wenceslai audivimus; audiamus & sententiam depositionis. Eam refert Goldastus in *Constitut. Imper. f. 379*. Accusatur ibi de indecentibus ac detestabilibus in imperando moribus, quod Ecclesiæ Orbisque Christiani defectibus noluerit mederi, quod pacem in Ecclesia non promoverit, quod Mediolanum & Provinciam Longobardiæ Duci Mediolani & Comiti Papiensi vendiderit; quod membranas plures raras, suæ tamen Majestatis sigillo munitas vendiderit; quod bella & reliquas turbas Germaniæ non curæ habuerit; quod reverendos sacrorum Antistites, Sacerdotes & Spirituales personas truculenter peremerit; quod sæpius admonitus tamen sacræ Ecclesiæ & Imperio opem ferre noluerit, aut mores emendare; deniq; quod citatus ad Collegium Electorum, non comparuerit, ut adeo opus fuerit in contumaciam ferri sententiam depositionis.

§. X.

Hic regero: Non fuit auditus Wenceslaus, & hæc imputationes ipsi non sunt probatæ. At cur citatus non venit? Non quæram, an fuerit obligatus ad veniendum? id urgeo, habuisse ipsum justissimam exceptionem loci non tuti. Probabo in conflictu. Ergo de Mediolano vendito videndum foret, si fuisset auditus, quamvis nec hoc suffecerit ad justam depositionis rationem.

mem. Deinde fuit status illo tempore turbulentissimus, ita ut non sit probabile, potuisse Wenceslaum extinguere turbas Germaniæ. Oriebantur turbæ ab ipsis Proceribus, fortè à quibusdam ex Electoribus, cur hi non puniebantur? Cur ipsi singuli in suis territoriis pacem publicam non promovebant? De pace Ecclesiæ mox videbimus seorsim.

§. XI.

Adde, quod ista sententia legatur saltem à Moguntino concepta, nomine quidem reliquorum Electorum, sed de quibus non constet, an in concipienda sententia fuerint omnes præsentēs ac consentientes, an omnes istum actum fuerint citati. Neque enim præsumtio est pro Moguntino homine nequissimo, (ut mox apparebit.) Adde, quod Rupertus Successor Wenceslai fuerit depositionis autor. *Lehmann. d. l. c. 59. p. 825.* Adde, quod Rupertus post depositionem Wenceslai à multis pro Rege non fuerit agnitus Wenceslao adherentibus, quod schisma fuerit inter Cæsares, duobus Rupertis pro Cæsaribus se gerentibus, quod Rex Sigimundus Germanus Wenceslai, per literas fuerit conqueſtus de depositione Wenceslai, atque post Rupertum in Imperatorem electus, noluerit Imperium sine consensu fratris suscipere. *Vid. Limn. Tom. II. Addit. p. 63. 64.* Quæ omnia indicia sunt depositionis illegalis & turbulentæ.

§. XII.

Ergo adhuc responsio mea ad quæſtionem propositam manet verosimilis. Verosimilior fiet, si ostendam causam communis erroris, & cur communiter sic exosus fuerit Wenceslaus. Fiet id in quæſtione peculiari. Deliberandum enim est, annon planè pro martyre Wenceslaus haberi mereatur? Videbimus, Deo dante, alio tempore,

T A N T U M.



58. e.

Q. F. F. Q. S.

IN ACADEMIA FRIDERICIANA

CELEBERRIMI AUTORIS,

De

RATIONE STATUS

Dissertationem V. & VI.

De

REVELATIONE ARCANO-

RUM ET DE EXPLORA-

TORIBUS,

Cum adjuncta Quæstione

An Sutor possit esse Philosophus?

Publicè ventilabunt

Die X. Aug. M DC XCIII, horis matutinis ab 8. ad 12.

CHRISTIANUS THOMASIUS,

JCtus & Prof. Publ.

& Respondens

JACOBUS CONRADUS Rees/

Lindaviensis,

C

Quæro

Quæro III.

An Sutor possit esse Philosophus?

Videtur.

§. I.



Ariæ Variorum hodie lites

sunt de scriptis Jacobi Bœhmii & ipso autore, & solet in istis disputationibus sæpe oppugnari, & Bœhmii & ejus scripta, eò, quod sutor fuerit Bœhmii. Cum enim quidam Bœhmii affectu eum ex amore Philosophum Teutonicum appellare soleant, & verò adversariis ejus maxime contradictorium esse videatur, sutorum esse Philosophum, notum est, quod ab his ferè uno ore rursus appellari soleat sutor Philosophus & per ironiam ejus Philosophia, Philosophia sutoria.

§. II.

Jam uti istam litem meam non facio, ita liceat jam ex libertate Academica, vel abstrahendo à Bœhmio, quærere, an talis sit repugnantia inter Philosophum & sutorem, ut non possint combinari in uno tertio? Neque enim hoc multum nocebit adversariis Bœhmii, cum, etsi sutor possit esse Philosophus, non tamen propterea omnis sutor sit statim Philosophus, & mille possint illis subesse rationes, ex quibus sibi victoriam in ista controversia promittere possint, etsi sutorum in genere causam his thesibus paululum egerimus.

§. III.

Id quidem constat, si statum hodiernarum Academiarum consideres, & divisionem eruditorum in quatuor facultates non habere spem sutores, ut aut Baccalaurei aut Magistri Philosophiæ

possint evadere. Neque enim solemus talia prædicata aptare talibus subjectis, quia profutuerentur Academiae & facultates Philosophicæ, atque sacrosanctis statutis communibus adversi quid committerent, si sutoribus summos in Philosophia honores tribuerent, qui tamen neque depositi esse solent, neque albo Academico inscripti, neque Latinam linguam callent, & ita non possunt lectiones Dominorum Professorum frequentare, aut dictata eorum excipere, multò minus Chriam in tentamine promotionis elaborare. Sed jam non quærimus de titulis honorum sed de re ipsa. Uti enim multi sunt Philosophi titulares, qui Philosophiam nesciunt, ita possunt esse multi Philosophi veri, titulis Academicis destituti.

§. IV.

Prætereà olim Philosophia totam sapientiam denotabat, olim quatuor facultates artium & scientiarum ignorabat mundus, olim lingua peregrina non faciebat Philosophum, sed Græci Græcè, Latini Latinè philosophabantur; Olim celeberrimi ex Philosophis non involvere intendebant Philosophiam suam terminis abstractissimis & obscurissimis, sed ita aliqui ex iis philosophabantur, ut & sutores eam possent intelligere; Olim ridebatur, qui peculiarem vocationem & privilegium requirebat, ut quis sapientiæ daret operam, aut qui putaret, peccare sutorem contra vocationem à Deo ipsi datam, ut sutoriam exerceat, si artem suam exercendo, cogitationibus sanioribus simul operam dare allaboraret. Et tamen olim, credo, erat res Philosophiæ, etsi neque Socrates, neque Plato, neque Aristoteles titulis Academicis fulgerent.

§. V.

Est vulgatus Canon Metaphysicæ Scholastico-Aristotelicæ: Ab actu ad potentiam valere illationem. Igitur responsionem meam ad quæstionem propositam non melius puto, probare poterò, quam si exemplum afferam hominis, qui & egregius Philosophus fuerit, & bonus artifex in arte sutoria. Sistit eum Diogenes Laërtius in vitis Philosophorum lib. II. p. m. 87. *Simon Atheniensis Coriarius. Quoties ad ejus officinam perrexisset Socrates, atque differeret, omnia quæ meminisse poterat notabat.* Unde & ipsius *Dialogos*

logos οὐκ ἄλλῃς appellant, quod inter ejusmodi opifices sint habiti. Sunt autem numero triginta tres, qui uno ibidem Codice comprehenduntur: De Diis, de bono, de honesto, quid sit pulcrum & honestum, de iusto duo, de virtute quod doceri non possit, de fortitudine sive virilitate tres, de lege, de popularitate, de honore, de poësi, de bona valetudine, de amore, de Philosophia, de scientia, de Musica, quid sit pulcrum, de disciplina, de differendo, de judicio, de eo quod est, de numero, de diligentia, de operando, de avaro, de jaëtantia, de honesto. Alii autem de consulendo, de ratione sive aptitudine, de maleficientia. Fertur hic primus omnium Socraticos sermones differuisse. Cum autem Pericles polliceretur, si ad se veniret, cuncta illi se necessaria exhibiturum, libertatem inquit, vendere, consilii non fuerit. Fateor me maximè attonitum fuisse, cum prima Laertii verba legerem: *Simon Atheniensis Coriarius*. Obveniebant enim mihi statim uno momento omnes illæ rationes, omnia illa dictèria, quæ tot Viri magnâ auctoritate & potentiâ præditi, futori Bœhmio objecerunt, ut tacitè in mente exclamarem: *Quid coriarios inter Philosophos?* Volui Græcum Laertii textum consulere, (cum in mea Bibliotheca Latinum Codicem saltem habeam,) utrum fortè in Græco aliud vocabulum extet quod coriarium non significaret, sed cum is non statim ad manus fuerit, suppono recte se habere versionem illam, quâ utor. Ergo futor fuit Philosophus.

§. VI.

Fuit & Philosophus egregius. Nam *primus omnium Socraticos sermones differuit*, ut Diogenes noster ait. Fuit Socrates fatentibus ferè omnibus, Philosophorum summus. Summi Philosophi doctrinam ita capere, ut eam sibi convenientem iterum exhibere valeamus, indicium excellentis ingenii est. Magnificimus Platonem, maximi eum fecerunt Patres primitivæ Ecclesiæ. At quid aliud sunt ejus libri, quàm doctrina Socratis dialogis exposita? Si futoris nostri dialogos habuissent Patres, fortè magis adhuc eum existimassent, quàm Platonem. Certè eo honore non fuisset indignus, quia si primus Socraticos Sermones differuit, ergo ante Platonem. Et fortè, uti videtur, simplici ingenio & sincero fuisse; magis puram ac limpidam Socratis doctrinam

exhibuit atque Plato. *Ajunt enim, Socratem, cum Platonis Lysidem audisset recitari, probi Dii immortales! dixisse, quàm multa de me mentitur adolescens, referente eodem Laertio lib. 3. de vitis Philosophorum.*

§. VII.

Ulterius quæ scripsit futor noster, ad universam Philosophiam pertinent, taliaque sunt, aut certè de talibus materiis, de quibus vix celeberrimis hodiernorum Philosophorum constat. Ad primam philosophiam pertinent dialogi *de Philosophia, de scientia, de disciplina, de diligentia, de eo quod est*, ad Oratoriam fortè *de differendo & de numero* nisi ille ad Logicam, hic ad Arithmeticam referendus est, quod jam, cum Codex Græcus deficiat, definire non possumus,) ad poesin dialogus *peculiaris*, ad Theologiam seu Metaphysicam dialogus *de Diis*, ad Physicam *de bona valetudine*, ad Philosophiam activam dialogi plurimi, quos inter maximè doleo dialogos de amore & de pulcro interiisse, tanquam de rebus & cognitu difficilibus & utilissimis. Quod verò virtus doceri non possit, videtur quidem primâ fronte paradoxum esse, sed facile defendi potest, si is sit sensus: vel vulgarem doctrinam virtutis per definitiones & divisiones &c. non reddere virtuosum, sed posse etiam ejus rei scientiam inesse vitiosissimo, vel: appetitum & sensum virtutis non posse ullâ doctrinâ dari hominibus. Quia autem Socrates morum doctrinam maximè populariter & perspicuè tradidit, & verò Simon noster nullam præsumptionem contra se habet, quod altiori proponendi modò ac subtiliori fuerit usus, imo potius majori popularitate eum ista proposuisse vero sit simile, quod dialogos illos, teste Laertio, tanquam inter opifices habitos conscripserit, inde iterum ex hoc capite etiam præferrem Philosophiam futoris hujus Philosophiæ Socraticæ à Platone traditæ, subtilioris sapè & obscurioris quam vel Philosophia Socratica, vel etiam veræ eruditionis scopus (utilitas & felicitas generis humani) postulabat aut admittebat. Est enim sapientia vera ita apta nata, ut perspicua sit & humano generi communis, unde necesse est eam etiam ab ingeniis opificum intelligi posse. Unde multo magis libros hos futoris deploro, quam si omnes libri Aristotelis interiissent. Idque credo, fieri posse pace philo-
sopho-

sophorum Aristotelicorum. Loquor enim de meo gustu. De gustibus verò non est disputandum.

§. VIII.

Et illud ad præcellentiam hujus sutoris Philosophi pertinet, quod usus fuerit methodo verâ atque legitimâ perveniendi ad sapientiam. *Quoties*, ait Laertius, *ad ejus officinam perrexisset Socrates atque differeret, omnia quæ meminisse poterat, notabat.* Notum est, Socratem non scamna posuisse auditoribus, non certam horam ipsis dedisse, non textum iis aut autorem explicuisse, non dictasse, ut ex parte sequentes Philosophi Græci faciebant, & nos hodiè facere consuevimus, sed ibat per plateas & loca publica immiscens se congregationibus hominum frequentioribus, vel etiam in officinis opificum, in quibus confabulandi causâ homines conveniebant, se sistebat, & ibi pro re nata, ex discursibus quibuscunque obviis occasionem sumebat præcepta moralia docendi in media confabulatione. Igitur dum sutor noster dicitur notasse ea, quæ Socrates apud eum differuit, non putandum est, quod discursum Socratis calamo ex ejus ore exceperit, sed cum Socrates in ipsius officina, ipso laborante & calceos aptante, cum aliis collocutus esset, solus postea discursum Socratis repetens in mente & notabat sibi, & ita, quod ajunt, in succum & sanguinem convertebat Philosophiam Socrateam. Atque hac methodo si uterentur Juvenes hodierni, ne brevi tempore experiri possent, quantum illæ ruminations & adnotationes profint. At vero istam methodum à Juvenibus postulare non possumus docentes, nisi & ipsi perspicue atque populariter doceamus.

§. IX.

Frustra verò inculcatur Philosophia atque docetur, nisi in ipsa vita exemplo quoque tuo te probes esse Philosophum. Probavit & noster. Atque eò pertinet, quod *cum ei Pericles polliceretur, si ad se veniret, cuncta illi se necessaria exhibiturum, libertatem, inquit, vendere consilii non fuerit.* Vult verosimiliter Pericles servitio Simonis uti, at servire nescit animus Philosophi. Nemini nisi virtuti servit, & omnibus virtuosis actiones suas spontè accomodat, fugit imperium potentum atque divitum, & con-

temnit.

temnit. Si necessitate coactus serviat, corpus servit, animus liber est. At libertas hæc in spontanea servitute conservari nequit. Non habebatur Pericles pro vitioso homine, potens erat & autoritate conspicuus apud Athenienses, uno verbo, secundum modum loquendi hodiernum, erat magnus Politicus. Sed uti plerumque magni Politici non magni sunt Ethici, ita & Periclem ad hanc classẽ pertinuisse, vel ex discursu ejus, quem cum Alcibiade habuit de definitione Legis, apud Xenophontem in memorabilibus Socratis lib. 1. junctis iis, quæ de ipso subinde memorat Thucydides, verosimile est. Philosophus autem verus Ethicam, hoc est, sui ipsius cognitionem & emendationem, facit normam Politices, quærendarum videlicet, opum & autoritatis.

§. X.

Igitur verosimile est, futorem non solum posse esse Philosophum, sed & excellentem atque perspicuum, & methodicum Philosophum, Philosophiam suam exemplo exprimentem esse posse. Quod si verum est, uti videtur, verum quoque erit, in posterum oppugnatores Bœhmii bene facturos esse, si in Disputatione illa argumentum aut scomma de Philosophia futura omittant, atque de aliis firmioribus, quæ nunquam iis, qui veritatem tuentur, deesse poterunt, circumspiciant. Nam istud quidem Appellis: *Ne sutor ultra crepidam* parum ad rhombũ facit. Non, quod aliàs pictoribus & Poetis quidlibet audendi semper fuerit potestas æqua, sed quod apophthegmata pariter ut similia, non sint extendenda ultra tertium. Nos vero ad futorem nostrum reversi, tacitè cogitemus, quia Philosopho clamare

non convenit: *VIVAT PHILOSOPHIA*

SUTORIA!

T A N T U M.



Q. F. F. Q. S.

IN ACADEMIA FRIDERICIANA

CELEBERRIMI AUTORIS,

De

RATIONE STATUS

Dissertationem VII. & IIX.

De

EXPLORATORIBVS, & CAPITE

STATVS RATIONEM TRA-

CTANDI,

DEQUE

MONARCHICO REGIMINE

ET USU MINISTRISIMIS,

Cum adjuncta Quæstione

Quomodo differat actio vana à turpi?

Publicè ventilabunt

Die X. Aug. M DC XCIII, horis matutinis ab 8. ad 12.

CHRISTIANUS THOMASIUS,

Jctus & Prof. Publ.

& Respondens

DAVID STAVINSKI Borussus,

D

Quæro



Quæro, IV.

Quomodo differt actio vana à turpi? Videtur, quod vanæ dicuntur illæ, quæ sunt indifferentes, quatenus hæ ab indifferentia ad turpitudinem moventur.

§. I.



Actio humana moraliter

considerata, est vel *honestæ* i. e. legibus præcepta, vel *turpis* i. e. legibus prohibita, vel *indifferens*, i. e. quam lex nec præcepit nec prohibuit. Permissio enim, rectè monente Grotio, non est legis actio, sed actionis negatio. Regulariter autem omnis actio humana suâ naturâ i. e. physicè considerata, est indifferens, fit verò honesta vel turpis ob circumstantias morales accedentes. Ergo actio indifferens est, quæ non habet circumstantias morales. Cave verò circumstantias morales crude intelligas illas, quæ communi includuntur versiculo: *Quis, quid, ubi* &c. Nam alias non daretur ulla actio indifferens, quia non potest concipi actio ulla, sine aliqua ex his circumstantiis. Tum demum hæ circumstantiæ morales fiunt, si aliqua ex iis legibus præcepta sit vel prohibita. Ita edere domi, est actio indifferens, etsi habeas circumstantias *quid* & *ubi*; vorare est actio turpis, quia connotat circumstantiam *quomodo* aut *cur*, legibus prohibitam.

§. II.

Jam autem *nomina* actionum humanarum talia sunt, ut vel connotent circumstantias *semper prohibitas*, ut furtum, rapina, incestus, vel *semper præceptas*, ut pietas, castitas, temperantia, &c. vel denique *circumstantias indifferentes*. At hæc ultima species iterum videtur *triplex* esse; aut enim nomen actionis illius *plerumq;* connotat *eius abusum*, ut homicidium, vel *plerumq;* *circumstantiam præceptam*, ut obedientia liberorum, vel ab *utroque* planè

præ-

præscindit, ut edere, bibere. Cum igitur communis regula sit, quod à potiori fieri debeat denominatio, non mirandum, quod actiones indifferentes primæ classis communiter inter turpes, & secundæ classis inter honestas referantur. Mirandum magis, quod hanc observationem non notantes Viri eruditi, de rebus facillimæ compositionis magnas lites moverint. Notum est, quid inter utriusque Religionis Protestantium affeclas controvertatur *de indifferentia saltationis*, in tantum, ut ex quæstione morali Theologica evaserit, quibusdam ex Reformatis omnem saltationem damnantibus, quibusdam ex nostris in tantum defendentibus saltationem, ut se maximè *ὑποῖνος* Lutheranos exhibere posse opinentur, si, ut loqui amant, in odium Calvinianorum saltent, in quos graviter invehitur Conradus Dietericus *in Concionibus Germanicis super Ecclesiastem*. Poterat, ut vidēs, tota lis tolli observatione modo dicta, nec opus erat tantâ vehementiâ utrobique defendi sententiam utrobique falsam, aut de vocibus tanta litigia movere, multò minus dissidia in articulis religionem spectantibus leviori reverà dissidio augere. Id verò non multum decoris, credo, sectæ nostræ attulit, quod inter notas hominis Lutherani ita à quibusdam relata fuerit defensio actionis etsi indifferentis, attamen vanissimæ & parum sapientis.

§. III.

Vanitas vanitatum, ait Ecclesiastes, & *omnia vanitas*. *Vanitas* autem cum eo in loco latè accipiatur, quatenus de omnibus creaturis prædicatur, non erimus solliciti, quomodo Commentatores istam vanitatem definiant. Videmus saltem, quid denotet, dum de *actionibus* humanis dicitur. Ita de *vanitate scientiarum* scripsit Henricus Cornelius Agrippa utilissimum libellum, & lectione Studioforum dignissimum, quamvis ob eum multa indignè passus sit à Pseudo-Theologis & Philosophis superioris sæculi, de quo fortè alibi. Ita ipse Ecclesiastes recensendo vanitates mundi, *cap. 3.* plurimas actiones humanas enumerat, pro stabilienda vanitate generis humani, puta *loqui, tacere, amare, odisse, flere, gaudere, saltare* &c. Scio equidem, quod Ecclesiastes non dicat directò actiones has esse vanas, scio, quod plerumq; in præfata controversia afferri soleat, actiones ibi recensitas ab Ecclesiaste pro

indifferentibus haberi, non pro turpibus, quia dicatur, eas omnes
requirere tempus suum. Sed scio tamen etiam, quod necesse sit
per bonam consequentiam eas referri debere ab ipso Ecclesiaste
inter vanitates, quia totum hominem & omnes actiones ejus
pro vanis habet, idque ostendere vult in toto libro.

§. IV.

Jam quod dicemus? Si *indifferentes* sunt illæ actiones ibi re-
censitæ, (uti certè aliquæ, ut *loqui, tacere, flere, gaudere &c.* absq;
dubio differentibus videntur accensendæ,) non haberi possunt
pro illegitimis. At si *vana* sunt, (uti modò diximus, omnes actio-
nes humanas esse vanas,) omninò pro turpibus videntur haberi
debere, nam ipsa *vox vanitatis turpitudinem* videtur involvere. Nec
est, quod dicas, divisionem actiones in honestam, turpem & in-
differentem esse defunctam à relatione actionum ad legem, va-
nas verò dici actiones humanas ob instabilitatem, adeoq; quæ-
stionem: *utrum vana actio pertineat ad honestam ad turpem?* &c.
æque ineptam esse, ac si quis quærat, utrum sonus testudinis
conveniat cum colore rubro an nigro? Nam respondeo, quod
non diffitear equidem, Ecclesiastem in toto libro vanitatem ex-
primere potissimum per instabilitatem, sed istam instantiam de
sono & colore huc non quadrare arbitror, quia & vanitas & ho-
nestas aut turpitudine sub eodem genere comprehenditur. Et, si
omnis actio humana aut honesta est, aut turpis, aut indifferens,
necesse est, quod & vana actio vel ad unam ex tribus speciem re-
ferri debeat, vel sub omnibus comprehendatur. At solum *vanitatis*
nomen ostendit, plus per id dici, quam ut sola *indifferentia* actio-
nis eo exprimatur. Quid ergo? Certè *non honestas*, ergo, quia ni-
hil amplius restat, *turpitudine*. Et quid opus est ulteriori disquisitio-
ne? ab actionibus vanis *homo vanus dicitur*. At *homo vanus* nun-
quam sumitur in bonam aut mediam partem, Ergo quid dicem?

§. V.

Contradictionem hanc paragrapho præcedente repræsentata
tam ut evitemus, non melius nos facturos esse arbitramur, quam
si & naturam *indifferentiæ* & naturam *vanitatis* consideremus. Hæc
enim meditatio apertè ostendet, *vanitatem inferre plus quam indis-*
ferentiam, minus quam turpitudinem. Est *vanitas* nihil aliud quam
entis

entis affectio, quatenus illud mutationi & interitui est obnoxium. Indifferentia actionis verò notat actionem quidem lege nec præceptam nec prohibitam, sed quæ tamen vel levi aliqua circumstantia accedente, præcepta vel prohibita fieri possit, ergo multò magis etiam apta sit, ut levi circumstantia accedente *magis vel minus ad honestatem vel turpitudinem inclinet*. Jam igitur, uti omnis vanitas instabilitatem denotat, ita *actio vana*, quatenus etiam de indifferenti aliàs prædicatur, involvet conceptum, quod *actio ista indifferens mutationi & interitui obnoxia sit*. Et homo vanus erit, qui in actionibus ejusmodi instabilibus, etsi indifferentibus aliàs, quietem querit atque felicitatem, cum tamen propter adhaerentem vanitatem, nullam quietem & felicitatem, cum tamen propter adhaerentem vanitatem, nullam quietem & felicitatem ei dare possint.

§. VI.

Jam habemus definitionem. *Actio vana est actio hominis naturâ suâ indifferens, in qua homo falsam quietem querit, unde ipsa actio ab indifferentia movetur ad turpitudinem*. Ita loqui, tacere, amare, odisse, flere, gaudere, sunt actiones suâ naturâ indifferentes, ita ut singulæ, si debito tempore fiant ac homine in ipsis quietem non quærente, sed ut medijs ad debitum finem destinatis, iis cum indifferentia utente, in indifferentia maneant, nec vanarum actionum nomen assumant. At si quis loquelâ, taciturnitate, amore, odio, fletu, gaudio tanquam rebus bonis delectetur, & iis tanquam finibus omnes aut multas actiones suas subordinet, vanus evadit, & ipsas actiones vanitate suâ inficit, ut & ipsæ vanarum nomen assumant. Quo magis autem falsæ huic quieti incumbit, eò magis vana actio fit, in tantum, ut si summum aut magnum bonum in iis quærat, *vanissime* fiant, & in vitium planè degenerent. Fiet enim ex loquente *loquax*, ex tacente *insidiosus*, ex amante *mollis*, ex ostore *crudelis*, ex fiente *querulus*, ex gaudente *stultus*.

§. VII.

Non igitur est, quod tempus perdamus, aut characterem religionis quæramus, in defensione *saltationis*, tanquam rei omnino indifferentis; non est, juvenes dilectissimi, quod vanitati cordis vestri indulgeatis, ex eo, quod à viris maximæ autoritatis legatis defensionem saltationis fuisse susceptam, vobis persuadendi, ac si

rem laudabilem & Patriæ vobisq; proficuum suscipiatis in saltationibus vestris. Agite, ipsimet iudices estote in causa saltationis. *Est saltatio actio indifferens.* Quis negaret? Saltavit & David gaudio sancto repletus. Vel ideò vero, quia indifferens est, *potest fieri turpis.* Saltavit & filia Herodis de capite Johannis. Imò sit saltatio actio omnino indifferens, *est tamen actio vana*, si in ista saltatione delectatione, in ista delectatione quietem quis quærat, aut eadem tanquam medio ad alias actiones vanas vel turpes utatur; Ergo, *non est actio, quæ aut Patriæ aut proximo, aut ipsi homini multum profit, ut inter honestas vel saltem laudabiles referri mereatur.* Fluit enim id ex præcedentibus. Et nunquam saltatio patriam ab hoste liberavit, aut dissidia civium sustulit, aut meliorem Christianum, Theologum, Iurum, Medicum, vel Philosophum effecit, aut ad conservandam sanitatem necessaria fuit, vel reparandam, (nam quæ de ictis à Tarantula communiter recensentur, quod non nisi per saltationem curentur, ad nos non pertinent, qui de hominibus sanæ mentis loquimur, quàm privantur, qui à Tarantula icti sunt.) *Neque ullum usum habet indifferentem, quàm ut apti fiamus per saltationem gressus & inclinationes corporis in communi conversatione magis ad decorum formandi, utq; si ista sciamus, alii homines, qui fortè ope nostrâ indigent, ob illam aliqualem conformationem cum ipsorum moribus non ita à nobis abhorreant.* Reliquus usus omnis vel apertè vanus vel turpis esse videtur. At jam considerate quæso, quàm facile hic usus indifferens in vanum vel turpem degenerare possit, puta, si v. g. decorum istud, cui nos adaptamus, non sit indifferens, sed vel vanum vel turpe; (quomodo autem id fiat, summam in primo & secundo capite introduct. nostra ad Etbicam diximus) si absque saltatione, solâ observatione & imitatione aliorum gestus & inclinationes nostras ita formare possimus, ut saltem pro indecoris haberi non debeant; si quæramus saltatione nostrâ placere aliis hominibus, vel sexui sequiori, vel etiam masculis. Cum enim sapiens nunquam amicitiam suam det ob saltandi artem, facile cognoscere possumus, quales sint illi, quibus placere studemus, quales simus nos, qui illis placere allaboramus, cum similis similis gaudeat.

§. VIII.

His perpensis examine cor vestrum aut passiones animæ vestræ, ut deprehendatis, utrum saltationem discere cupiatis tanquam

quam rem indifferentem, an tanquam vanam, an tanquam turpem? Dabo vobis exemplum. *Affectus*. Volo discere saltare. *Ratio*. Quamobrem? *A*. Quia volo. *R*. Atqui hoc non sufficit. Scis enim quod omnia tibi indulgeam si cum ratione velis, semper vero resistam, si absque eâ. *A*. Rationes mihi non desunt. Pater ipse, Præceptor, iste vir magnæ autoritatis &c. mihi hoc consilium dederunt. At verò Parentibus & Præceptoribus obediendum est. *R*. Bene, sed cur non ita promptus es ad studendum, ad te emendandû, ad benefaciendum aliis, cum & id Pater, Præceptor &c. tibi consuluerint? Vides igitur aliam subesse rationem. *A*. Est utique. Medicus svasit, quod debeam motione aliquâ sanitatē corporis conservare, præ reliquis vero hæc mihi potissimum placet. *R*. Vides igitur, quod consilium Medici non sit causa appetitus tui, sed id, ob quod præ reliquis motionibus hæc præcisè placet. Atqui hoc scire aveo. *A*. Quia unâ fideiâ possum duos dealbare parietes, & motione corpus sustendendo, & idem ad gressus decoros aptum reddendo. *R*. Rectè facis. Ad hunc finem poteris mensis unius spatio discere quod sufficit. *A*. Eja, intrâ unum mensem vix possem primum & simplicem saltandi modum (la courante simple) discere, & cogerer desinere antequam magis decoras illas figuratasq; saltationes (la bourée, la menuët, la gavote &c.) discerem. *R*. De his non dixisti, sed de gressibus saltem decoris, quæ in simplici illo saltando modo addisci possunt. Cur igitur & reliquos vis discere? *A*. Vivo inter homines, & posset facile contingere, ut in conversatione essem, ubi risui exponerer, si saltare non possem? *R*. Et quid si risui exponeris? Tu contrâ ridebis te sine justâ causâ ridentes. Sed transeant ista. Dabo duos menses, si diligens esse vis, poteris satis discere, ut non ridearis. *A*. At vero non potero in hac arte perfectus reddi tantillo temporis spatio, non possum me ita innuare amicitiiis sexus sequioris, quas non inhonestas quæro, sed honestas, saltando enim nihil inhonesti committitur. Et scio e- quidem saltationem esse vanitatem, sed quia sexus sequior magis involutus est vanitatib9 quam noster, non tam nostrâ quam ipsi9 gratiâ nos aliquatenus iis in rebus indifferentibus debemus accommodare, ut occasionem nanciscamur ipsas ex præjudiciis eruendi. Nosti Titium, quam egregiè saltet, quam æstimetur communiter, quàm tam honestè in conversationibus se gerat. Hunc

imitari

imitari vis Titium. At ego scio, tum & ipse scis, quantum scortator, quamvis clandestinus sit Titius. Novi malitiam tuam. Ipse te prodidisti, cum nuper, ubi saltantem Titium videbas, ipsi postea diceres, quod tibi in saltatione ista, cuius figura libera inventioni femina relinquitur (dans la menuët) quam maximè placeat, quod oculis perpetuò sint affixi, quo in variâ illâ corporis commotione necesse etiam sit vario modo moveri oculos, ita ut alter sexus alteri cogatur quasi monstrare motus oculorum maximè patheticos; quod porro modo corpus corpori proximè accedat, modo iterum paulatim recedat, quod infinitis gestibus semper ex opposito personæ, cum quâ saltamus, passionem nostram declarare valeamus. Hæc est vera ratio petiti tui, hic est scopus quem quæris.

A. Nimis rigidus semper & suspicax es. &c. Certus sum, si simili modo examinetis vos ipsos in actionibus vestris, vos non opus habituros esse laboriosâ disquisitione circa quæstionem: an v. g. saltare sit actio indifferens vel turpis? sed statim magis necessariam quæstionem definire vos valituros esse: utrum vos ipsi saltationem ut indifferentem, vel vanam, vel turpem actionem appetatis? Quæstiones enim ille omnes generales & earum enucleatio magis nocent, quam profunt, si absque applicatione id fiat ad nos ipsos. Hæc vero facilis est, etiam si quæstiones illas generales non ita exactè dirimere noverimus.

S. IX.

Possẽ dicta illustrare alio exemplo de *ludo pile in Sphæristerio*, quĩ tot periculis non est subjectus ut saltatio, & tamen si non cautè & hic agatur, potest & ipse degenerare in actionem vanam & vitiosam. Sed quoniam discursus præcedens sub manu crevit, & vero illustratio ista non difficulter fieri possit à quovis ad imitationem eorum, quæ de saltatione diximus, subsisto, simul monens lectorem, ne ea, quæ de saltatione prolixius differuimus, considerare velit, tanquam digressionem ad ipsam quæstionem parum pertinentem; cum illa maximè contineant usum quæstionis propositæ. Proponere enim institui quæstiones non inanes, sed quæ usum suum exerunt in vitam humanâ.

I A N T V M.

* Dedi in programme invitatoriò libertatem Dñ. opponentibus, in singulis actibus etiam in veritatem quæstionum præcedentium inquirere. Ne tamen libertas illa confusionem pariat, constitui interstitium quasi aliquod Disputationum propositarum facere, & futuris duabus septimanis die 24. & 31. Aug. Deo dante, solus cathedram ascendere, atque ibi ab horâ 8. ad 12. audire dubia, quæ circa omnes quatuor quæstiones hætenus propositas Lectoribus restant, ut postea remotis illis dubiis omnibus, in propositione novarum quæstionum possimus pergere.

Q. F. F. Q. S.

IN ACADEMIA FRIDERICIANA
CELEBERRIMI AUTORIS,

De

RATIONE STATUS

Dissertationem IX. & X.

De

POLYARCHIS, FOEDERIBUS,
ET IMPERIO ROMANO,

Deque

IMPERATORIS MONARCHICA
POTESTATE,

Cum adjuncta Quæstione

*An liceat in benè constituta Republ.
publicè quærere?*

Publicè ventilabunt


*Die XLV, Septembr, M DC XCIII, ab 10. ad 12.**& pomeridianis à 3. ad 5.*CHRISTIANUS THOMASIUS,
Jctus & Prof. Publ.

& Respondens

PETRUS BOJE, Dithmarso-Holsatus.

E

Quæro



Quæro V.

An liceat in benè constitutâ Repu-
blicâ publicè quærere? Videtur.

§. I.



Ophista. Mihi non videtur, proba.
Philosophus. Atqui mihi non incumbit proba-
tio, cur enim non liceret, quod nullo jure pro-
hibitum est? Tuum igitur si mihi vis contra-
dicere, erit, probare & ostendere quo jure hoc
non liceat. Ne tamen de re obscura disquiramus,
paucis cum pace tua liceat sensum quæstionis paululum
explicare. Alibi jam dixi: quod interrogare, dubitare, & inve-
stigare usurpem synonymicè, adeoque uti interrogatio & inve-
stigatio jam communi *quæstionis* nomine notari solet, ita & sub
eadem comprehendo dubitationem. *Publicè* id appello, quod vel
nullâ intentione occultandi fit in loco etiam privato, etsi paucis
notum sit, vel quod etiam fit in loco publico, ita ut re ipsa in
plurium perveniat notitiam. Per *benè constitutam Rempublicam*
non intelligo rempublicam secundum ideam status perfectissi-
mi, sed talem, quæ in negotio, de quo quæritur, non aliquid ad-
mittit rectæ rationi repugnans. Denique per *licentiam* intelligo
non tam externam seu impunitatem, quàm internam seu tran-
quillitatem conscientiæ. Quo pacto duplex quasi in quæstione
proposita continetur quæstio. An qui in Republica, ubi id non
est prohibitum, publicè dubitationes suas proponit, in conscien-
tia tranquillus sit? Et: An, si Respublica hanc licentiam per le-
gem civilem tollat, committat aliquid contrà rationem? Utrum-
que videtur. Jam, si lubet oppone,

§. II. S.

§. II.

S. Ergo de omnibus dubitas. Cartesianus es, Atheus es. Non es tolerandus in bene constitutâ Republicâ. *P.* Vide multas in paucis verbis iniquitates adversus me committas. Cartesianus non sum. Et si essem, Atheus non essem. Et si Atheus essem, (quod Deus avertat!) propterea tamen ex bene constituta Republica non forem ejiciendus. *S.* Quid audio? Atheos in bene constituta Republica esse tolerandos? Qualis dementia? *P.* Quæso ne responsionem meam interpellas, nondum enim absolvi. Ne à scopo dilabamur, argumentum de tolerantia Atheorum jam ad aliam disputationem reponamus, & ut interim tibi non planè absurdus videar; peto ut id pensitare velis, à vobis in benè constitutâ Republicâ tolerari, non dicam scortatores, adulteros, fures, latrones, sed ebrios, vanos, superbos, avaros, & si omnia deficerent, stultos. Jam in viam. Cartesianus non sum, quia non dico dubitandum esse de omnibus, non dico, dum dubito, me etiam id, de quo dubito, interim negare, sed faltem nescire, & id quærere.

§. III.

S. Non dubitas de omnibus? De quibus ergo rebus putas dubitari posse? de quibus non? Aliàs enim non possum tibi opponere. *P.* Jam explicui meam mentem in *Praxi Logices* c. 1. n. 49. usque ad 86. Non de propositionibus, quæ statim in sensu incurrun, & quæ ab iis absque longa ratiocinatione abstrahuntur, sed de primis cognoscendi principiis, & conclusionibus remotioribus à sensu. *S.* Ista non quæro. Putasne etiam de rebus Theologicis dubitare posse? *P.* Mallem ista omitteres, jam enim magis de quæstionibus Philosophicis quam Theologicis sum sollicitus. *S.* Sed tamen informationis gratia hæc quæro, nec dubito, quin mihi humanitatem responsionis non sis denegaturus. *P.* Ergo & responsionem accipe. De rebus Theologicis quam maximè, quia maximè hic interest veritatem nosse. Cave vero per res Theologicas intelligas litigia inania, & quæ ad salutem hominis non conducunt. Nam de omnibus inanibus cujuscunque generis sunt, illicitas quæstiones esse arbitrò, quia pro fine

vel stultam voluptatem, vel inanem gloriam, vel execrandum odium habent.

§. IV.

S. His quidem effugiis non evades Hypocrita. Firmiter enim te teneo. Spinofista es, Atheus es, libertatem philosophandi cum præceptore isto Tuo, à tot eruditis & piis viris nostratibus, etiam à Patre Tuo impugnatam defendis. **P.** Enim vero ego recriminari nolo, quamvis apertum sit, te non informationis gratia mihi, ut præ te ferebas, quæstionem proposuisse, verum ut mihi laqueum poneres, quem tamen per Dei gratiam facile evadam. Cur crimina quæris, cur sectarum nomina adducis, ubi de veritate assertionis aut falsitate quæstio est? Veritas nec vitium est nec virtus, idem de falsitate dicendum est. Sim qui sim, prudens an insanus, quid id ad Te? Oppone contrà Thesin. Infaniam Atheus, infaniam Spinosa: Quid id ad quæstionem præsentem? Nonne in benè constituta Reipublica licebit insanire? Sed falleris amice, Spinofista non sum. **S.** Tu non es Spinofista? Annon Spinosa scripsit *tractatum Theologicum Politicum*, in quo, ut titulus ejus apertè præ se fert, ostenditur, *Libertatem Philosophandi non tantum salvâ pietate & Reipublicæ pace posse concedi: sed eandem nisi cum pace Reipublicæ ipsâque Pietate tolli non posse.* Annon tu idem dicis? **P.** Enim vero si eadem dicerem, quæ alicubi Spinosa dicit, propterea Spinofista non essem. Dicit Spinosa v. g. *Part. III. Eth. p. m. 153. Superbiam esse, si quis plus iusto sentiat de se præ amore sui.* Poteris & tu Amice eandem sententiam fovere, & tamen Spinofista non esse. Sed transeat hoc: nego me illa dicere, quæ continet titulus Libri Spinofiani. **S.** Probo: Libertas Philosophandi nihil aliud est quam libertas tua quærendi. Dum enim quæris, nonne philosopharis? Vapulat Spinosa, quod hanc libertatem Philosophandi extenderit ad res Theologicas. Et tu cum eadem facias, non vis Spinofista esse, non vis vapulare. **P.** Non facio eadem. Inverto: Qui quærit non Philosophatur. Philosophari est rem affirmare cum ratione, aut negare cum ratione. Spinosa vero philosophari est

ri est affirmare aut negare cum ratione etiam ineptâ, seu absque recta ratione. Ita enim se ipsum explicat *d. tractatu Cap. ult.* *Ostenditur in libera Republica unicuique & sentire quæ velit, & quæ sentiat dicere licere.* At ego quaero, non an liceat sentire, sed an liceat dubitare? non an liceat dubitare, quæ quis velit? sed an liceat dubitare cum ratione? non: an liceat errores quoscunque propalare? sed an liceat errores oppugnare & veritatem investigare?

§. V.

S. Transeat Spinoza. Novam objectionem formo. Si liceat in benè constituta Republicâ etiam de rebus Theologicis quærere, turbabitur tranquillitas Reipublicæ, turbabitur ordo publicus, qui jubet quatuor distinctas esse facultates, neque Jctum, Medicum aut Philosophum debere involare in castra Theologorum. P. Utinam vos hoc monitum observaretis, & vel Philosophiam cum Theologia vel Theologiam cum Philosophia non confunderetis! Minimè turbant quæstiones meæ distinctionem facultatum. Ego Theologiam doceri nolo à Jcto, Medico, vel Philosopho. Non docet quæstio veritatem, sed eam inquiri. Permitteris credo, ut Jctus, Medicus vel Philosophus possit veritatem à Theologo investigare. Nolumus involare in castra Theologiæ, expectamus informationem in vestibulo. S. Certè non pertinent hæc quæstiones Cathedram tuam. P. Neque etiam in cathedra mea vel proposui eas, vel proponam. Relinques vero locum, si talis vellem quærere in subselliis auditorum vel opponentium, qui nihil aliud quam quærentes esse debent.

§. VI.

S. Minimum valde periculosa est hæc licentia. P. Periculosa utique, sed errori, sed vitio. At eo major utilitas inde in Rempublicam redundabit. Periculosa etiam res aliquando quærenti, quia veritas odium parit, quia qui veritatem quærunt, multa damna patiuntur à potentia errantium & vitiosorum. Sed hoc indicium esset male constitutæ Reipublicæ. Et si non esset etiam, quid istud periculum ad te?

§. VII.

S. Imò potius periculosa toti Reipublicæ, quia possunt sub prætextu hujus licentiæ etiam errores valde perniciosi in Republica disseminari. Nam quid si quis v. g. ex principiis Jesuiticis quæreret: *Annon liceat principem interficere?* Et responderet, id sibi videri? P. Is haud dubiè peccaret, non quærendo, sed respondendo, quia etiamsi responsionem pro dubitatione vellet habere, dubitaret tamen sine justâ ratione. At defendo saltem licentiam dubitandi cum ratione. Et magis vos ferit hæc obiectio quam me. Quot extant disputationes de tyrannicidio? quot limitationibus additis admittitur interfectio principis tyranni? aut si non admittitur, sed magno conatu omne tyrannidium refutatur, minimum iste refutans sententiam quam refutat, habet pro verosimili, vel dubiâ, eo ipso quod tanto conatu refutat. Quis enim unquam disputavit contra hominem v. g. negantem bis duo esse quatuor? aut contra Cartesianum, qui dum vigilat, dubitat, an habeat manus vel pedes: an vigilet vel dormiat? antequam istud suum: cogito, ergo sum, invenit. Uti enim contra negantem principia non est disputandum, ita contra dubitantem absque ullâ ratione etiam disputandum non est.

§. VIII.

S. Sophista es, vis me per hanc discursum avertere à scopo. Per alias necessarias consequentias possum ostendere damnosum esse Reipublicæ licentiam tuam. P. Audiam, modo sint tales consequentiæ necessariae, quas necere non sit prohibitum. Scies enim haud dubiè, istam licentiam necendi necessarias consequentias, quâ multi abutuntur in contumeliam honestorum virorum, in turbas Reipublicæ, hic per Dei gratiam esse prohibitam. Neque graviter feres, quod hæc moneam, quia jam sæpius contumeliosis nominibus me infectatus fuisti. S. Apage. Istæ potius turbæ, ista calumniandi licentia ex tua doctrina sequitur. Quid si enim quis cum ratione aliquâ verosimili quærat? Annon Titius sit scortator, latro, improbus? &c. Vides quanta fenestra aperiatur omnibus nequitiiis. P. At quis tibi dixit, quod hæc licentia sequatur ex doctrina meâ? Annon suprà dixi, illicitas esse quæstiones, quæ pro fine voluptatem,

ptatem, gloriam & odium habent? Quod si hæc nondum videantur satis clara, aliis modis evitabitur ista objectio: Permittatur licentia quærendi, sed ne quid fiat in fraudem legum, ne quid fiat contra bonos mores. Aut: Permittatur licentia quærendi publicè, circa universalia, circa singularia maxima adhibeatur cautio.

§. IX.

S. Sed cur præcisè prætendis licentiam quæstiones ejusmodi publicè proponendi. Si privatim fierent, tolerari possent. At publicè si fiant, multa possent oriri scandala. P. Vide quam infidiosè agas. Si de privata licentia quæsissem, dixisses, eam esse criminis suspectam, quia privata esset, nunc cum suspicionis hujus avertendæ causâ publicam elegi, suspicio scandalorum adest. Ita nunquam quæ vobis displicent, sine scandalo sunt. Et ipsa adeò veritatis inquisitio vobis scandalosa est. Est scandalum acceptum Domine, non datum, est scandalum pro Hypocritis & Sophistis, non pro veritatis & virtutis amatoribus.

§. X.

S. Quid si ergo Princeps aliquis hanc licentiam tibi tollet, diceresne: Principem erga te peccasse? P. Responde mihi prius, si Princeps tibi sine causa licentiam exspatiandi extra portam auferret, diceresne: Principem erga te peccasse? S. Jam ego ex te quæro. Tuum est mihi respondere. P. At hæc quæstio inanis est, quia pro fine odium habet, quia hac quæstione novam causam criminandi quæris, quia crimine læsæ majestatis, more sæculi Tiberiani, me involvere cogitas. Est hæc quæstio injuriosa in *PRINCIPEM OPTIMUM*, à quo absit, ut Eum suspicemur rem justissimam & utilissimam prohibiturum esse. Absit, ut timeamus tempora ni fallor Dionysii, sub cujus imperio non licebat publicè colloqui aut flere.

§. XI.

S. Ain vero licentiam hanc quærendi habere usum in Republicâ? P. Equidem magnum. Veritatem invenire absque quæstio-

quæstione non possumus, quæ quæstio quò magis publica est, eò magis occasio datur aliis nos in hac intentione adjuvandi. Errores & ignorantiam quæ sub larvâ sapientiæ regnant, non melius oppugnare possumus, quam quæstionibus. Assertionibus si eam aggrediamur, parata est excommunicationibus, igne, gladio, fuste, exilio. At dum ignorantia quæstiones proponimus, dum ignorantiam nostram profiteamur, & oramus informationem quam dare non potest, dum nihil firmiter asserimus, non potest ita facile quæstio pro crimine traduci, non potest non ignorantia se ipsam publicè prostituere. Ita Socrates Sophistas aggressus est, cur licentiam hanc nemo magis odio prosequatur, quam Sophistæ & fratres ignorantia.

§. XII.

S. Quid ais pessime? An me pro Sophista habes? Non quiescam, nisi te cum licentia tua à Republica ejecero, ne quid dicam gravius. P. Addendum erat: Si Deus voluerit. Qui si ipsius voluerit, in ipsius placito acquiescam. Neque enim hæc objectio distinctione resolvitur, sed patientia.

T A N T U M.



2. F. F. 2. S.

58. h.

IN ACADEMIA FRIDERICIANA
CELEBERRIMI AUTORIS

De

RATIONE STATUS

Dissertationem XI. & XII,

De

ORDINUM IMPERII LIBERTA-
TE, AC DE ÆRARIO ET
COLLECTIS,

Cum adjuncta Qvæstione

*An doctrina juris Romani de Servis
magnum habeat usum in Servis
nostris a Turcis captis?*

Publice ventilabunt

*Die XXI. Septembr. M DC XCIII. a X. ad XII,
& pomeridianis a III. ad V.*

CHRISTIANUS THOMASIUS,

& Respondens

JOHANNES HEINRICUS Schlüter /

Berolinensis.

F

QVÆ-



QUÆRO IV.

An doctrina juris Romani de Servis
magnum habeat usum in servis nostris a Turcis
captis? Non videtur.

§. I.



Utrum magnum usum Juris Romani in
foris Germaniæ esse defendunt, de prima ta-
men personarum divisione communiter fa-
tentur, Institutiones Justiniani non magnum
usum habere, partim quod differentia liber-
tinorum & horum ab ingenuis a Justiniano
ipso jure novo sint sublata, partim quod & totum jus Justi-
nianeum ob servitutem inter Christianos sublatam, hac parte
applicationis occasionem ad facta apud nos obvenientia nul-
lam habeat. Quæ ratio si sola esset, uti communiter sola pro-
fertur, sequeretur minimum, jus Romanum aliquem usum
habere in servitute, quæ hodie moribus Germaniæ non est sub-
lata, qualis experientia testante, obtinet intuitu infidelium a
nobis captorum & vice versa intuitu nostrorum ab infideli-
bus captorum, quia servi etiam sunt apud Romanos, qui ab
hostibus capti sunt.

§. II.

Sed nos alias subesse rationes arbitramur, quod jus Roma-
num apud nos in hac materia nullum habeat usum, quia vide-
licet ut alibi docuimus, non latius usum habet Jus Roma-
num, quam quatenus in Germania est receptum, uti vero in
paucissimis materiis receptum esse ibidem diximus, ita & vide-
tur in materia servitutis, quæ apud nos adhuc frequentatur, non
esse receptum, imò (quatenus Civile est, & capita juris naturæ

ac gentium circa servos non repetit,) nec recipi potuisse. Posset hæc materia justo tractatu expediri; at cum & temporis & chartæ sit habenda ratio, per indicem saltem ac summam eam tractabimus, & propterea nec leges Romanas allegabimus. Cave tamen putes nos absque lege loqui. Is enim cum lege loquitur, non, qui plauftra legum allegat, sed qui loquitur ea, quæ legibus continentur,

§. III.

Et initio quidem apud nos servi tales nascuntur ex ancillis nostris, quia ratio naturalis hoc vult, ut partus sequatur ventrem. At non sunt ex captivitate omni, uti apud Romanos, sed saltem si ab infidelibus capiantur. Cur vero sit sublata servitus inter Christianos, communiter hæc ratio affertur, quod sit inter eos bellum plus quam civile. Quæ mihi semper fuit suspecta visa. Etsi enim thesis ipsa de bello plusquam civili recte explicata tolerari possit, connexionem tamen non video, quia eadem ratio suadebat quoque bella esse non debere inter Christianos. Sepono tamen disquisitionem ea de re ad occasionem aliam. An & nostri capti ab infidelibus apud nos pro servis habeantur? valde dubito. Sed puto eos & patriam potestatem, & jus Conjugii, & Dominium rerum suarum, & testamenti factionem &c. retinere, cum in his capitibus magis sequamur Jus Divinum & Jus Gentium, quam Jus Romanum, & Peregrinis conjugium, patriam potestatem, Dominium & testamenti factionem sine dubio indulgeamus. Unde nec fictio legis Cornelix, nec fictio juris Postliminii, nec alix subtilitates Romanæ huc pertinentes habebunt locum apud nos.

§. IV.

Fiebant etiam servi apud Romanos, si quis liber homo pretii participandi causa se venundari passus sit, si sententia in servitutem condemnatus fuerit, si ingratus a patrono fuerit revocatus, quæ omnia etiam in Turcis manumissis apud nos

cessare arbitror, quia causa quæ Romanos ad illam primam
pœnam impellebat, apud nos cessat, quia servitus pœnæ sub-
lata est, quia ingratitude causas Romanis hoc passu usita-
tas ignoramus, & genius Germanorum est, ut ingratitude apud
ipso tanto rigore non puniatur.

§. V.

Igitur si statum Germaniæ cum statu Italiæ & Romano
conferre velimus, deprehendemus, quod alius longe status sit,
liberorum hominum & horum servorum apud nos quam olim
apud Romanos. Magna privilegia Civium Romanorum e-
rant, quibus etiam viliores de plebe gaudebant, qua liberi &
cives, neque distinctio hac parte erat inter rusticos & urba-
nos homines, nisi forte in eo, quod rusticarum tribuum cives
olim apud Romanos pro nobilioribus habebantur, quam ur-
banarum. Ipsi Romani cives magnis abundabant opibus,
& plurimi inter ipsos Principes divitiis, splendore, luxu æqua-
bant. Inde tot servorum diversissima munia, inde tantus
mancipiorum numerus, ut Lege Fusia Caninia cautum
fuerit, si quis ultra centum servos haberet, non posse manumit-
ti, nisi partem quintam, ita tamen ut ultra centum manu-
mittere non liceret, h. e. etiam si quis ultra quingentos habe-
ret, quem casum frequenter fuisse obvium verosimile est, alias
de eo non fuisset lex concepta. Servi ipsi in tanta copia edu-
cabantur & aptabantur ad mores Romanos, & nulla differentia
videtur observata fuisse, quam conditionem apud suos obtinue-
rint capti, ita ut etiam nobilissimi in servitute retinerentur,
& sæpe plebejis servirent, neque alia spes emergendi quam
applicatio vel ad bonas artes, vel ad insigniter malas, & cum ma-
gna astutia conjunctas. Hinc non solum multi servi, præpri-
mis novioribus temporibus, ubi Jus vitæ & necis erat subla-
tum, re ipsa non deterioris conditionis erant, si non melioris,
quam apud nos Aulici apud quosdam Principes vel parum po-
tentes, vel parum divites, sed & sæpe spem habebant partici-
pan.

pandi imperii summi, quod tot quærelæ apud Historicos de Potentia Libertorum testantur. Apud nos autem pleraque sunt inversa. Olim quidem, cum adhuc scaperemus, in eo Romanis eramus æquales, quod nobilissimi essent rustici & vilissimi atque mancipia urbes incoherent. At hodie cultura morum uti alia damna infinita, ita & hanc introduxit, quod ambitio urbanos quidem supra rusticos extulerit, sed & his tamen nobilitatem ademerit. Unde libertas sola potentia & divitiis æstimatur, viliores de plebe nomine liberi sunt, re mancipia ditiorum & potentum, rustici vero in multis locis, non dicam durius tractantur quam nequissimus vappa inter servos Romanos, sed quam bestiarum, cum multi canes delicatius sustententur cibo, potu, lecto, quam multi rustici. Et tamen isti divites, isti potentes, ad potentiam & divitias civium Romanorum ne minimam partem comparandi sunt. Et quotus quisque est inter nos privatos, qui vel viginti mancipia sustentare possit? unde nec alia fere officia servorum nostrorum sunt, quam ut stabularii sint, vel pedisequi. Servi ipsi in tanta copia apud nos non sunt, & per brevissimi temporis spatium hætenus vix mille mancipia per totam Germaniam dispersa in bello cum Turcis capta sunt. Horum ingenia horrida, ferocia, truculenta, & ad culturam parum apta. Neque curamus eorum educationem, aut aptationem, qui ne liberorum quidem nostrorum debitam habemus curam. Præterea vilissimos cepimus, & qui apud Gentem suam in aliqua dignitate fuerit, inter mancipia vix conspicitur. Et tamen sæpe his hominibus tot & tanta crimina indulgemus, ut revera magis liberi sint, quam qui liberorum nomine gaudent, & non inaudita sint exempla etiam stuprorum violentorum in liberas ab iis impune commissorum.

§. VI.

Status diversitas diversum Jus facit, & status modo memoratus liberorum pariter atque servorum, apud Romanos occasionem dedit multis legibus servos concernentibus, quæ non

possunt non ad statum Germanorum diversum parum aptæ esse. Consideremus paululum potissima earum legum capita. Habent Domini nostri nullum jus vitæ & necis in servos a Turcis captos, non quod Jus Romanum ista disponat, sed quod jus vitæ & necis nullus privatus apud nos habeat. Coercitio modica Dominis concessa est, quæ ex Jure Gentium provenit, non ex Jure Romano. Posset & ex eodem Jure Gentium Dominus per Turcas captos acquirere, sed tam exigua sunt quæ ipsis donantur, ut turpe habeatur, si Dominus id lucellum Turcæ suo velit auferre, nisi forte vestimenta magis luxuriantia ei per illas donatiunculas comparet. Si heredes instituerentur apud nos servi ejusmodi, locum quidem obtineret non solum Jus Gentium, sed &, si quæ hac parte specialia disposuit Jus Romanum, quia in materia testamentaria est receptum in Germania; sed rationes, cur apud Romanos non ipse Dominus institueretur, sed servus, in nostris Turcis vix locum habebunt, ut casus aliquis sperandus sit, quo mancipium Turcicum sit institutum. Testamenta non faciunt quidem Turcæ nostri, non tam quod servi sint, sed quod nihil habeant de quo testentur, etiam si Domini, ut dixi, donaria iis relinquunt.

§. VII.

Multa dicuntur in Jure Romano de servorum peculio, quia & ditissimi erant Romani, qui servis peculia varia concedere possent, & aptissimi servi ad ea administranda. Utraque ratio cum in Nobis & Turcis nostris non inveniatur locum, inde & exiguum usum habebunt illæ quaestiones Romanæ de peculio servi legato, cui post manumissionem peculium debeatur, &c.

§. VIII.

Actiones noxales plus æquitatis naturalis habent, quam subtilitatis civilis. Sed cum alibi dixerimus, apud nos cessare actionem furti & vi bonorum raptorum, cessabunt haud dubie etiam istæ noxales. De damno dato & injuria possent obtinere, sed

sed partim quod potentiores saltem ejusmodi mancipia habeant, contra quos viliores parum obtinent, partim quod noxæ deditio plus oneris quam commodi allatura sit plerumque actori, & has rarissime in usum venire arbitror.

§. IX.

Jus naturæ dicitur, rem meam vendi posse. Unde & mancipia Turcica vendi poterunt. At dispositiones Juris Romani non habebunt locum in mancipiis nostris. Credo supersedere posse advocatum in addiscendis tricis Juris Romani, quæ in titulo de *Ædilitio Edicto* occurrunt, circa venditionem mancipiorum Turcicorum. Si enim ne quidem in venditione jumentorum observatur Jus Romanum, multo minus observabitur in venditione mancipiorum, præprimis quia in *Nævis Jurisprudentiæ Romanæ* ostendimus probabiliter, *Ædiles* hoc edictum publicasse, ut dissidia multiplicarentur in populo. Taxatio etiam servorum, quæ in constitutione Justiniani de communi servo manumisso præscripta est, apud nos non habebit locum, partim quia distinctiones officiorum aut qualitatum, secundum quas diversa ibi taxa imponitur, ad nostros Turcas non quadrant, partim quia quæ ibi de notariis, medicis, evnuchis disponuntur, ex rationibus desumpta sunt, quæ apud nos longe aliter obtinent.

§. X.

Manumissio servorum hodie fieret saltem Jure Gentium ex Regula, nihil est tam naturale, quam ut voluntas Dominorum de re sua disponentium effectum sortiatur. Unde, quemadmodum jam tempore Justiniani manumissio per censum exoleverat, ita haud dubie rideretur, si quis privatus vellet Turcam suam manumittere, vindicta. Neque in Ecclesiis id commode fiet, quia manumissio in Ecclesiis ideo olim facta, quod omnes contractus alicujus momenti ibi celebrabantur. Illa tamen in testamento habebit locum. Inter amicos & per Epistolam etiam adhiberi posset, sed duobus saltem testibus ad-

adhibitis, cum quinque testes apud Romanos videantur ex eadem causa esse adhibiti, ex qua quinque testes in testamento olim adhibebantur, quæ ratio apud nos non obtinet,

§. XI.

Quodsi tamen manumittatur, id parum proderit Domino ad jus Patronatus. Qui enim illud exercere posset, cum Turca manumissus non possit fieri civis, quippe neutri ex tribus Religionibus quæ in Imperio tolerantur, addictus. Ergo non in alium finem obtineret manumissio, quam ut possit secure in patriam redire. Id tamen obiter notes, parum coherere mores nostros, qui religiones omnes tolerant in mancipiis, non in liberis hominibus, adeoque mancipia melioris conditionis sunt hoc respectu, quam liberi. Qualis absurditas?

§. XII.

Sed ponamus, etiam apud nos manere manumissos. Non videtur jus Patronatus ad mores quadrare. Operæ fabriles proprie ad id non pertinent, quia debebantur ex promisso. Sed honorariæ & officiales ex moribus magis Romanis oriuntur quas si apud nos manumittens exigeret a manumisso. v. g. ut in curiam comitaretur, in templum &c. rideretur, nisi post manumissionem ex contractu locationis id debitum deduceretur. In materia successionis ab intestato non sequimur ubique Jus Romanum, & ubi sequimur, (quod & de successione testamentaria intelligendum est,) saltem recepimus & introduximus in successione liberorum hominum. Igitur quæ Jus Romanum de Successione Patroni disposuit, quia apud nos receptum non est, non obtineret.

T A N T U M.



58.
Q. F. F. Q. S.

IN ACADEMIA FRIDERICIANA
CELEBERRIMI AUTORIS

De

RATIONE STATUS

Dissertationem XIII. & XIV.

De

ELECTORIBUS, COMITIIS,
COMPARATIONE ORDINUM
ET VOTIS IN COMITIIS,

Cum adjuncta Quaestione

*An Favorabilia & Odiosa in materia
de interpretatione definiri
possint?*

Publice ventilabunt

Die XXIX. Novembris M DC XCIII, horis antemer. a X. ad XII.
& pomeridianis a III. ad V.


CHRISTIANUS THOMASIUS,

& Respondens

JOHANNES DANIEL WOLFART,
Hanoviensis.

G

QUE.



QUÆRO VII.

An Favorabilia & Odiosa in doctrina de interpretatione definiri possunt?

Non videtur.

§. I.



N omnium ore sunt regulæ, dum de interpretatione pactorum & legum agitur: *Favorabilia esse latius, odiosa strictius interpretanda*: Item: *Favorabilia esse extendenda, odiosa restringenda*, quarum explicationem potissimum suscepit Hugo Grotius in capite de interpretatione Libri II. de J. B. & P. Intendi vero in Institutionibus meis Jurisprudentiæ divini Lib. II. cap. II. §. 160. usque ad 176. ostendere, has regulas nullum habere usum in materia interpretationis, quin potius aptas esse, ut sub earum prætextu interpretationes cavillatoria & ineptæ possint salvari. Rationes ibi vide. Est vero inter eas non infima, quod obscurissimum sit, quid sit favorabile vel odiosum, cum omne, quod uni favorabile est, alteri odiosum sit, adeoque favorabilia & odiosa non possint describi. *vid. d. l. §. 169.* Postea cum Halæ Anno 1691. de navi quibusdam Jurisprudentiæ disputarem inter corollaria disputationis sententiam illam repetii: *Falsum esse Brocardicum Jurisprudentum de Favorabilibus extendendis & odiosis restringendis, neque enim definiri posse, quid sit favorabile, quid odiosum?*

§. II.

Res autem ipsa ostendit, hic non agi de definitione favoris & odii, sed de definitione favorabilium & odiosorum, neque sequi, definiri posse favorem, ergo & favorabile, non magis quam definiri posse amorem, ergo & amabile. Etenim non sufficit dicere, quod favorabile &c. sit objectum favoris, non enim querimus notionem generalem conceptus nostri de favorabili, sed definitionem rei ipsius, ita ut per eam favorabilia ab odiosis in exemplis omnibus aut certe plerisque discernere possimus. Deinde cum favorabile vel no-

tet

tet ens favore dignum aut favorem merens, vel ens, quod pro favorabili ab hominibus habetur, quorum illud possis appellare favorabile juris, hoc favorabile facti; patet 2. favorabile juris pertinere ad Philosophiam moralem & a præsenti quæstione esse alienum, cum interpretatio pertineat ad Logicam, & quærat, non quid homines pro favorabili habere debeant, sed quid in pactis aut legibus pro favorabili habuerint. Nam interpretatio non quærit primario, quid alter dicere debuerit, sed quid voluerit. 3. Adeoque ad favorabile facti pertinere etiam id, de quo agit Jus humanum. Quia legislatores non solum non semper in legibus id observant, quod debebant, sed & quod leges humanæ versentur in rebus indifferentibus, ad utilitatem Reipublicæ pertinentibus, quæ utilitas cum variet, & res, quibus faveant in ferendis legibus variare necesse est.

§. III.

Quibus ita præmissis, ad oculum patet sententiam meam a natura rei esse petitam. Ea, quæ facti sunt, non possunt definiri, quia infinitis modis variant affectus humani, neque certam normam sequuntur. Unde & laudabile, & amabile, & favorabile, & in genere omnia affectuum humanorum objecta nulla definitione possunt comprehendi, sed uti quid laudatur ab his, culpatur ab illis, ita & rei alicui favetur ab his, non favetur ab illis. Adde quod, cum dixerimus, omne, quod in pactis & legibus uni favorabile est, alteri odiosum esse & vice versa, & vero, etiam si concedamus, a potiori faciendam hic esse denominationem, tamen libra expendendi id, quod potius est, hic deficiat; etiam inde illa impossibilitas definitionis elucescat, cum duo possint pro diversitate affectuum, unam eandemque rem diverso favoris & odii gradu prosequi.

§. IV.

Quæ cum ita evidentissime se habeant, fateor, me mirari, quid moverit Clarissimum Placcium, ut in nova editione tractatus de *JCo* perfecto, non solum capite IX. p. 269. hoc corollarium meum notaret, sed & in adjunctis eidem Musis Juridicis huic corollarium meo refutando peculiare opusculum in ordine sextum, cui titulus: *Idea Tractatus Juridici Methodici Theoretico-Practici de favorabilibus & odiosis in jure* destinaverit, cum tamen nil minus ibi disseruerit, quam quod sententiæ huic meæ contradicat, sed revera aërem verberaverit, non meum corollarium. Age videamus. *Ego vero*, ait, p. 177.

Musar. Jurid. postquam corollarium meum recensuisset, jam dante ante annos bene multos Ideam hanc in chartam conieceram, & cum auditorum meorum aliquibus etiamnum eandem asservantibus communicaveram, & ODII atque FAVORIS affectus in Rhetoricis meis excerptis, quin & Ethices compendiolo ita definitos dederam, ut nihil inde facilius existimarem, quam definitiones FAVORABILIUM & ODIOSORUM conficere, vel certe quod confici possint, videre. Neque sine meis hisce scriptis, vel ex Aristotele adeo idem non confici etiamnum posse mediocri meditatione putem. Et si quidem non possint talia definiri, de totius Ethices & Rhetorices optimis partibus, scientificæ tradendis desperata res foret. Quippe quæ non minus facilius definitu affectuum, distincta notitia & scientifica, sine accuratis definitionibus nullo habenda modonituntur. Imo & de illa ipsa, quam vel præcipue Vir Celeberrimus, ut sibi primitus constituta, latentes animi affectus & moras divivandi arte conclamatum foret omnino. Quid opus tot verbis in adstruenda possibilitate definitionum favoris & odii? Quis eas negavit? Cur fluctus in simpulo movet Vir Clarissimus? A favore autem & odio ad favorabile & odiosum jam negavi consequentiam §. 2. quam si non ostendat, uti propter dicta §. 3. ostendere nequit, verba illa omnia modo recensita in cassum sunt prolata.

§. V. Pergit: Quamobrem opera omnino pretium duxi, hæcce medimenta mea oppido quam imperfecta modeste proponere, ut Practica Philosophia Rhetoricaque artis tam nobiles partes æque ac JCtorum tot numero tantæque autoritatis consensum a suspitione tam indigna ipsis & noxia liberarem: aut certe in quonam illud αὐτοματὸν definiendi tam obvia consisteret, amplius edocerer. Cui sane rei non suffecerit forte meas definitiones vellicasse vel evertisse, si fieri queat etiam, penitus, sed solida demonstratione ostendisse oportebit, meliores etiam & sufficientes, vel speciatim saltem explosis adeo nove regulis interpretandi iisdem superstructis, nullas dari. Quod qui fecerit, ne is erit mihi magnus Apollo, meque illi Minerva debere, nunquam diffitebor. Equidem mihi nec cum Philosophia Practica, nec cum Rhetorica hic quicquam negotii intercedit. Loquitur ipsum corollarium, quod in regulis interpretandi aliquid moneam. Autoritatem tot JCtorum istam Pseudo regulam adhibentium si defendere voluisset Vir Clarissimus, non debuisset committere aut affectare ignorationem Elenchi. Vix enim mihi imaginari possum, quod Vir Cl. revera ignoraverit, de qua re agatur. Etsi enim objectiones suas saltem contra corollarium direxerit, multas tamen rationes habeo, quæ mihi persuadent, Institutiones

tiones meas Jurisprudentiæ divinæ ab ipso non obiter fuisse lectas. Ipsa obliqua censura, quæ p. 116. in *Idea Juri Romano - Germanici perfecti* quæ & ipsa pars est Musarum juridicarum, doctrinam meam de Jure divino positivo universali notat, id abunde testatur. In specie vero caput meum de interpretatione ipsi probe lectum esse ostendit censura similis in ipso tractatu de *Jcto perfecto cap. 2. p. 27.* Jam si legerat, quæ in dicto capite de interpretatione §. 164. 169. dixeram, cur favorabilia & odiosa definiri nequeant, rationes illas meas aggredi, & Grotium, contra quem ibidem disputo, defendere debuisset, non inanes querelas contra me movere. Definitiones ipsius non vellicabo, quia nihil ad me. Demonstrationibus non amplius opus, quia jam factæ sunt. Et tamen nec minerval exigo a Viro Clarissimo, nec ut me pro magno Apolline habeat, postulo, contentus, si me sinat esse Thomassium, & monitiones has meas, ut promisit, non ægre ferat, aut ad §. 3. hujus disputationis respondere velit.

§. VI. Ergo transeant illa omnia, quæ Vir Clarissimus p. 179. 180. 181. de favoris & odii definitione, deque favorabilibus & odiosis in jure differit, quippe quæ salva sententiâ mea, vel recte vel secus se habere possunt. Propius ad me pertinent, (an pro me plane contra ipsum Virum Clarissimum faciunt?) quibus ideam hanc claudit. Ita enim infit. *Quamvis autem ex hisce fundamentum peti possit omnium favorabilium & odiosorum juris, quia tamen 1. varia in eandem personam, rem & actionem coincidere possunt, quorum alia sint odiosa, alia favorabilia, 2. in actionibus plerisque plures personæ conveniunt, aut opponuntur, alia aliis minus odiosa vel favorabiles, 3. varii sunt gradus favoris & odii, prout magis aut minus egent ac merentur personæ vel earum actiones: Hinc multa adhuc meditatione in istis omnibus comparandis ac decidendis opus erit ad specialia, imo specialissima, proindeque praxi circa singularia versanti demum maxime accommodata præcepta, methodice scientificeque elaborata sistenda. Necesse namque fuerit certas favorabilium singulorum proportionem, certa momenta sive pondera, & fortassis horum iterum certos gradus constituere. Quod ipsum sane perquam erit difficile, quemadmodum illud expertus est Claramontius in causis moralibus Semeioretices lib. 4. ponderandis. Atqui hoc ipsum est, de quo in Instit. Jurispr. div. d. c. 11. lib. 2. §. 169. & hic §. 3. conquestus sum, nisi quod ego dixerim, talia definire esse impossibile, Vir Clarissimus autem difficile esse saltem judicet. Accedit, quod ego, ut dixi, loquar de favorabilibus facti, ipse autem aperte de favorabilibus juris differat. Unde novum meæ sententiæ accedit robur. Si enim Vir Clar. valde difficile esse*

constitetur definire favorabilia juris quid dixisset, si perpendere voluisset, sententiam meam de favorabilibus facti esse conceptam, aut quid ipse asseruisset, si modo considerare voluerit illam infinitam variationem favorabilium facti?

§. VII. Sed forte novum argumentum adversus me desumi poterit ex illa norma, quam Vir Clar. suppeditat circa justam definitionem et si difficilem favorabilium juris. Age ex ipsomet cognoscamus. Ita enim suam hanc Ideam Tractatus Juridici Methodici Theoretico-Practici de Favorabilibus & Odiosis in jure claudit: *Qua de causa lineolas hasce ulterius deductas, nedum coloribus suis vivis illustratas, dare nunc prohibemur: aliis otio & ingenio prevalentibus id laboris etiam relinquentes. Quem non parum sublevabunt collectanea tot ab aliis edita, nec omnia aequae inordinata & confusa, quia huic nostra methodo satis facile queant adaptari, tum de favorabilibus & odiosis in genere, tum de personis & rebus actibusque certis variis speciatim, quae ex Lipenii aliorumque Bibliothecis, meisque excerptis describere, ac disputationes non contemnendas eodem pertinentes ex mea etiam Bibliotheca illis adscribere nunc non vacat. Usuro tamen cuique & hoc opus aggressuro non denegabo. Cui, ut quam optime labor hic cedat susceptus, ex animo precabor etiam, & quae posse me siverit ipse, Deusque, abjuvabo & lubens.* Mallem, talia non excidisse Viro Clarissimo. Mallem, considerasset, quod titulus opusculi promittat ideam tractatus de favorabilibus, adeoque Lectorem haud quaquam spe inani lactasset, qui certe nil minus expectare potest in hac idea, quam generalia saltem & communia de favorabilibus in genere, de quibus nemo dubitat, sed titulum hunc legens vel maxime expectat primas saltem lineas circa modos istam difficultatem definiendi favorabilia in specie. Ergo hic Rhodus erat. Quid dixisset Vir Clarissimus, si ego ideam tractatus cujusdam adversus ipsum promissem, & postea ubi ad rem perventum esset, & potissima capita, alios ad id opus conficiendum promissione libellorum meorum aut locorum communium, vel ablegatione ad Bibliothecam Lipenii fuisset adhortatus? Hoc non est Ideam justae tractatus delineare, sed alios ad formandam sibi aliquam ideam de re, cujus nos ipsos ideam non habere inviti profiteamur, excitare. Ego vero svadeo illis, qui otio & ingenio abundant, ut ea non frustra impendant, cum aperte videant, neque Lipenium, neque excerpta, neque disputationes, Viro Clarissimo quicquam profuisse, ut ipse sibi justam ideam de favorabilibus & odiosis formare fuerit ausus.

§. IIX. Quanquam & id monitum addere jubeat supra §. 2. exposita negotii, de qua agitur, natura, Virum Clarissimum & in titulo & in operis

operis delineatione non debite distinxisse favorabilia juris moralis a favorabilibus juris positivi. Definitiones in delineatione traditæ pertinent ad favorabilia juris moralis. At quæ in tractatu de Jcto perfecto cap. 9. p. 269. seq. prolixè de interpretatione favorabilium collegit, ad favorabilia juris positivi pertinent. Ex mente itaque, ait, p. 271. seu Justiniani seu Triboniani; favorabilia sunt &c. quæ nos merito supra d. §. 2. ad favorabilia facti retulimus. Aliud enim est scire, quid Justinianus pro favorabili habuerit, aliud quid pro favorabili habere debuerit. Favit Justinianus in favorem Conjugiis sexui muliebri in mitiganda poena adulterii, qui favor tamen non magis ac error jus facit. Nec est, quod opponas, favorabilia tamen hæc etsi facti, per dicta a nobis d. §. 2. pertinere ad doctrinam interpretationis. Nam respondeo: Si ipsa lex dicit & inculcat, Justinianum rei alicui in legibus favisse, interpretatio hujus legis Grammatica est, non Logica, quam quærimus. Neque poterit iste favor in regulis interpretationis Logicæ adhiberi, si non velimus dare occasionem interpretationi calumnianti. Ita notum est, quam inepte, quam impie sæpius Pontificii, favorem causarum piarum (quem & ipse Vir Clarissimus p. 271. in catalogo rerum favorabilium refert,) adhibeant ad extensiones nescio quas. Ita rideretur, si quis seductus favore Justiniani erga sexum foemineum, illum vellet adhibere ad mitigationem poenæ in delictis aliis, &c.

§. IX. Addo: neque cohærere regulas Viri Clarissimi de interpretatione favorabilium & odioforum. Ex pluribus, quæ in hanc rem afferri poterant, pace ipsis unum saltem exemplum affero. p. 274. dicit Vir Clarissimus: *Odiosa strictius esse interpretanda*, & inter odiosa ibidem refert *pœnarum inflictionem* earumque exasperationes. Ipse tamen in *Musis Jurid. opusc. 1. p. 27.* inter erroneas regulas refert illam: *pœnales leges non esse extendendas*. Scio quidem ex communi sententia posteriorem hanc propositionem pertinere ad interpretationem extensivam, priorem ad declarativam (secundum Virum Clarissimum Musar. *Jurid. p. 94. 95. 96.* ad interpretationem hypercriticam electitiam internam perfectivam,) adeoque non videri contradictionem subesse. Sed scio etiam communiter Doctores, qui statuunt pœnalia tanquam odiosa strictius interpretanda esse, etiam dicere: Pœnalia non esse extendenda, a quibus adeo Vir Clarissimus per istam distinctionem non bene videtur dissentire. Si enim (secundum ipsum) pœnales leges recte extenduntur, multo magis (contra ipsum) eadem in laxiori significatione sunt explicandæ. Rem declaro exemplo. Lex pœnalis est: qui frumentum exportat, puniendus est. Hæc lex quamvis pœnalis, recte extenditur ad fatinæ exportatores. Cur ergo eadem non etiam in lata acceptione esset explicanda, ut sub se omnes frumenti species comprehendat, si modo ratio legis non obstat. At si hæc obstat, tum stricta interpretatio certe non desumetur ab eo, quod lex sit odiosa.

§. X. Eadem observatio suppeditat adhuc aliud monitum circa totum ejus tractatum. Suggillat Vir Clarissimus p. 27. tractatus & Dn. Pufendorffium & me, quod cum meliora Grotio dare desperaverimus, fere κατὰ πρόδα eum sequamur. Sit ita, quamvis adhuc non pauca adversus hæc regerere possimus. Quæro ex Viro Clarissimo: Quem usum habeat ipsius tractatus de Jcto perfecto, seu de interpretatione Legum? Lego in indice centum species interpretationis, quas ipse excogitavit, ad quas intelligendas minimum anno opus est. Putatne Vir Clarissimus, effictione terminorum novorum melius Grotio se illustrasse doctrinam de interpretatione? Putatne meliores progressus facere juvenem, si discat: regulam aliquam pertinere ad interpretationem hypercriticam electitiam internam perfectivam, quam si notet secundum doctrinam communem, eam pertinere ad interpretationem declarativam?

tivam? Atqui hoc est rem intricare, non explicare. Porro regulas interpretationis in tractatu numerat omnino 344. Quanto tempore putat Vir Clarissimus opus esse, ut juvenis eas non dicam, intelligat, (nam pleraque nihil significant, & sunt meri sine mente Ioni,) sed memoria teneat, & si teneat, cui usui? Non jacto mea, sed si quæ bene posui, divinæ gratiæ ea adscribo, si quæ male, mihi. Interim ut paucis me expediam: Repetii post Grotium & Puffendorffium, Duum viros de interpretatione optime meritos, doctrinam meam de interpretatione in *Praxi Logices cap. 3.* Constat tota doctrina paucis pagellis, & regulis omnino quinque vel sex, ostendique ibidem doctrinam, de speciebus interpretationis rem obscurare potius. Jam suppeditet Vir Clarissimus exempla, quæ non æque bene & longe facilius ex paucis regulis meis, quam ex suo apparatu tanto possint definiri, aut, si quæ sunt, quæ quis ex regulis meis interpretari nequeat, quæ ex ipsius tractatu resolvi possint? Quod si hæc facere nequeat, cogitet, quid communes interpretes Juris de ipsius libro dicturi sint, contra quos *Musar. Jurid. p. 27.* sic disserit: *Nos hæc tricas, tanquam cruces ingeniorum superfluas & sine ratione excogitatas, merito rejicimus: contenti, nostra præcepta suis fundamentis superstruxisse.*

§. XI.

Credo & spero, Virum Clarissimum responsiones has meas atque breviter monita non ægre laturum, sed promissionis publicæ *Musar. Jurid. p. 178.* recordaturum esse. Rationes adhibui, non verba iniqua. Quod si tamen & in ipsa veritate amarum quid propositum fuit, id tanquam præter intentionem factum deprecor, eumque invito & rogo: velit id, quod *Musarum Jurid. p. 116* oblique indicavit, proxime expedire, & rationes suas proponere, per quas putet, demonstrationem juris positivi universalis a me in Institutionibus Jurisprudentiæ divinæ tentatam in nihilum redigi posse. Cedam semper rationibus firmis, ipsique valde obstrictus ero, si me errantem in veritatis semitam reduxerit.

T A N T U M.



2. F. F. 2. S.

58. K

IN ACADEMIA FRIDERICIANA

CELEBERRIMI AUTORIS

De

RATIONE STATUS

Dissertationem XV. & XVI.

De

VOTORUM PLURALITATE DE

ARBITRIO IMPERATORIS, DEQUE

REGIMENTIS IMPERII, DEPUTATIONE, CIRCUL

LARIBUS CONVENTIBUS, ET VISITATIO-

NE CAMERÆ,

Cum adjuncta Quæstione

An Mancipia Turcica per Bapti-

smum manumittantur.

Publicè ventilabunt

DIE XIX, Octobris M DC XCIII, horis antemer. a X. ad

XII. & pomeridianis a III. ad V.

CHRISTIANUS THOMASIUS,

JCtus & Prof. Publ,

& Respondens

HENNINGIUS ADOLPHUS Koch/

Hoyensis.

H

QVÆ-



QVÆRO VIII.

An Mancipia Turcica per Baptismum manumittantur?

Non videtur.

§. I.



Proximis quaestione 6. non magnum usum habere Jus Romanum in mancipiis Turcicis. Revocavit ea quaestio in mentem dubiū jam ante aliquod annos conceptum. Videlicet disputavit Amicus ante quadriennium in vicina Academia cum consensu & autoritate Magnifici ibidem Jctorum ordinis, de *Mancipiorum Turcicorum Manumissione Baptismo implicita*, eamque materiam per totam servitutis doctrinam fusius executus est. Putavi tum statim disputari de non ente, sed autoritas ordinis Juridici ex altera parte me dubium fecit, ut præsumerem, Consultissimum istum ordinem Jctis pluribus atque celeberrimis constantem, autoritatem suam non interpositurum fuisse, nisi ipsis de existentia hujus manumissionis constaret. Sed successu temporis dubium pro parte negativa magis magisque corroboratum est, unde, quoniam de materia practica agitur, non ægre laturos arbitror & Amicum Disputationis Præsidem, & inclutum istum Jctorum ordinem, si ipsis dubia mea proposuero, paratus informatione debita accedente in ipsorum castra transire.

§. II.

Si quaestionem: An sit? dissertationi suæ præmisisset Clarissimus Autor, facillimo negotio dubia mea expedire possem. Jam autem cum existentiam hujus manumissionis præsupposuerit, paulo altius res videtur esse repetenda. Præsuppono igitur, etsi alias quilibet de re sua disponere pro lubitu possit, noluisse tamen plerasque gentes ob interesse publicum, & potissimum Romanas manumissionem servorum sine aliqua solennitate fieri, adeoque modos manumittendi lege

lege publica definivisse. Jam autem manumissio per baptismum est ens Juri Romano plane incognitum, neque de ea diligentissimus antiquitatum Romanorum in re presenti indagator, Wilhelmus à Loon *de manumissione servorum apud Romanos* quicquam meminit. Neque juri Justiniano hanc manumissionem cognitam esse indicio est, quod Judæis in specie interdictum sit habere mancipia Christiana, qua prohibitione opus non fuisset, si per Christianismi professionem quis ex servitute in libertatem transivisset. Jus Canonicum quod attinet, neque in eo quicquam deprehendere potui, quod manumissioni huic per baptismum faveret, multa vero argumenta visus mihi fui deprehendisse, quæ contrarium indicarent.

1. Servi non potuerunt promoveri ad sacros ordines, nisi à Domino libertatem consecuti fuerint. Si tamen servus sciente Domino fuerit ordinatus, ex hoc liber habebatur & ingenuus. *Lancellot. Instit. Juris Canon. lib. I. tit. 25. §. 2.* Ergo servi etiam Christiani fuerunt, neque baptisma pro manumissione valuit, sed ordinatio.
2. Servus si prius ignorante Domino ad sacra ministeria ordinatus monachus fieri elegerit, jugum servitutis evadere hoc ipso potuit, alias intra unius anni spatium Domino & servilem fortunam probare & servum suum recipere licebat. *Lancell. l. 1. tit. 30. §. 6.* Ergo monachismus demum manumissionis efficaciam habuit, non baptismus.
3. Idem Lancellotus *l. 2. t. II. §. 7.* dicit, servum à sacramentis Ecclesiæ & à matrimonio non esse removendum. Ergo mancipia per baptismum non sunt liberata à servitute.

§. III.

Neque moribus hæc manumissio est introducta. Quin potius iidem contrarium testantur. Ipse ego in illo loco, ubi Disputatio dicta fuit habita, patrini personam in baptismo ejusmodi mancipii Turcici sustinui, & nihilominus tamen Dominus æque post baptismum Dominium in servum istum retinuit, atq; ante habebat, eumque non diu post donando alii, alienavit. Adde quod & utilitati publicæ & principiis Christianismi videatur aliquo modo repugnare, si per baptismum fiat manumissio. Nam id certum est baptismum non denegandum esse mancipiis quibuscunque infidelibus ad Christianismum aspirantibus, etiam invitis Dominis. At si per baptismum simul consequerentur mancipia libertatem, occasio daretur, ut multi propter bonum temporale simularent desiderium

Christianismi, aut ut Christiani fierent propter utilitatem tempora-
lem, non propter veritatem & salutem spiritualem. Quamvis autem
notet B. Brunnem. *Juris Eccles. lib. 2. cap. 18. §. 9. p. 696.* non esse Simonia-
cum, expressa promissione alicujus rei temporalis aliquem allicere
ad Baptismum vel religionem suscipiendam, graviter tamen ad-
dit Illustr. Ordin. p. 715. sine dubio illum, qui Baptismum vel religio-
nem spe pramii temporalis recipiat, gravissimum committere pec-
catum. Nec ab hoc eum absolvendum esse, qui alterum spe pramii
allicit. Aliis argumentis utendum, quo ad religionem adducatur in-
fidelis & non temporaria sed divina ipsi demonstranda retributio.
Repleretur adeo civitas malis hominibus, & Dominorum jura sine
ulla utilitate aut necessitate publica infringerentur. Deteriores
essemus Pontificiis, apud quos, notante B. Zieglero *ad Lancellott. p. m.*
166. ideoprohibita fuit ordinatio servorum, non quod servus Cleri-
cus esse non posset, sed ne fides Christiana male audiret, ac si Domi-
norum jura per ea inverterentur.

§. IV.

Jam videamus quid ex Disputatione Viri Clarissimi pro existen-
tia hujus manumissionis colligere possimus. Sunt vero omnino duo.
Primum est in *cap. 1. §. 2.* ubi adducitur, *quod Pontifex Gregorius M. in*
Epistola quadam ad Fortunatum Neapolitanum, cujus fragmentum contine-
tur in can. 15. dist. 54. decreverit, cogendos esse Dominos, ut sua mancipia,
quae ad Christianam fidem conversi & baptizari desiderant, pro pretio dimitt-
ant; adeoque locorum Episcopos omni sollicitudine eo laborare debere, ut
omnibus modis in libertatem vindicentur. Sed si allegatum canonem 15.
distinctius percipias, deprehendes hunc ejus sensum esse: Si quis
de Judaeorum servitio, sive paganus, intra tres menses (postquam
Judaeus eum emerat,) ad religionem Christianam, converti voluerit,
pretium ejus Judaeo ab emptore Christiano debet solvi. Si post tres
menses id contingat, absque restitutione pretii & absque venditio-
ne liber debet fieri. Hic textus cum de Judaeis Dominis disponat,
ad Christianos Dominos non potest applicari, quia cessat ratio ap-
plicationis, ideo enim haec constitutio concepta est, quia Judaeus non
potest habere mancipium Christianum. Deinde etiam hoc casu
baptismum non semper vim manumissionis habuisse patet, quod,
si intra tres menses primos ad religionem Christianam se conver-
tere

tere voluerit mancipium Judæi, idem in potestate Domini Christiani, qui pretium Judeo solverat, manserit.

§. V.

Secundum est in cap. ult. §. 10. ubi sic Clarissimus Autor: *Quamvis absurdum non videatur illos, qui in bello Turcico capti sunt, servos etiam permanere debere arg. l. 5. §. 2. ff. de capt. quamvis ejuraverint religionem Mahumetanam & Christiana imbuti sint, cum sententia sit probata servitutem personarum, & dominicam potestatem legi divinæ non adversari. Habn ad Wesenb. tit. ff. de capt. n. t. nec Evangelium abolere Politias 1. Cor. 7, 21. Quam ob causam in Lusitania aliisque regionibus adjacentibus adhuc moris esse dicitur Bodino, ut capti Turcæ servi permanere debeant, licet Religionem Christianam fuerint amplexi. Quæ forte & ratio, cur usus mancipiorum & vernarum etiam duraverit per tempus inter Christianos, in tantum, quod etiam Ecclesiæ suos servos habuerint. At amen cum charitate Christianorum paululum increscente inter eosdem servitus evanuerit, &c. ideo palam est, quod mancipia Turcica post baptismum non amplius pristinam immanem servitutem subire, sed potius vera Christianorum libertate frui debeant. Continet hic paragraphus Viri Consultissimi & rationes dubitandi & decidendi. Rationes dubitandi quod attinet, (quas forte Hahnus ab ipso citatus, qui jam ad manus non est, ex Gudelino magnam partem hausit, quem vide de Jure Novissimo l. 1. c. 4. p. m. 6.) illæ quidem, cum pro mea sententia faciant, possunt manere intactæ, nisi quod illud obiter saltem moneam, me non videre, quale argumentum pro illa sententia ex l. 5. §. 2. de capt. extrui possit, ubi Pomponius; *in pace*, inquit, *quoque postliminium datum est, nam si cum gente aliqua, neque amicitiam, neque hospitium, neque fœdus amicitie causa factum habemus, hi hostes quidem non sunt. Quod autem ex nostro ad eos pervenit, illorum sit, & liber homo noster ab eis captus servus sit & eorum. Idemque est, si ab illis ad nos aliquid perveniat. Hoc quoque igitur casu postliminium datum est.* Dubito, an paragraphum hunc intellexerit Vir alias eruditissimus, Dionysius Gothofredus. Nam notæ, quas ad eundem confecit, plane a paragrapho alienæ sunt. Intendit Jctus latrocinium gentis in gentem, tum temporis valde receptum, de quo vide integram disputationem B. Patris. Sed quid latrocinium gentis in gentem cum mancipiis Turcicis commune habet?*

§. VI.

Venio ad rationem decidendi, quæ hæc affertur, *quod ideo manumissio per baptismum introducta fuerit, aut introduci debeat, quod crescens charitas Christiana moverit gentes Christianas, ut servitutem plane tollerent.* Quæ ratio ob varias causas id quod probare debeat, mihi probare non videtur. 1. enim nullum est dubium, quod tempore Apostolorum in primitiva Ecclesia major fuerit charitas quam seculis subsequenter, & illis, ubi servitus inter Christianos fuit sublata, Si ergo excellentia illa charitatis Christianæ non impulit Christianos primos, ut servos etiam fideles manumitterent, uti non impulit. *Ephes. 6. v. 9. 1. Tim. 6. v. 2.* causa non est, ut dicamus eandem successu temporis & in seculis remotioribus, ubi Christianismus jam multis principiis Anti-christi erat deterior redditus, id effecerit. 2. Falsum est eo tempore, quo servitus inter Christianos fuit sublata, crevisse Christianam charitatem, quæ profecto multo tepidior fuit & frigidior, quam esse debebat, utpote cum illo tempore & ambitio & avaritia & voluptas nomen charitatis sibi falso vindicarent. Ergo cum ista charitas crescens sit non ens, non potuit hunc effectum produxisse. 3. Servitus eo tempore saltem in tantum evanuit, ut Christianus a Christiano captus servus non fieret, mansit autem ad nostra usque tempora servitus, ut Turcæ capti servi fierent. Ergo si Christiana charitas illius temporis non impedivit initium servitutis in Turcis, non potest etiam allegari, quod impulerit eos ad Turcas manumittendos per baptismum. 4. Supponit illa ratio, quod erat in quaestione. Probari debebat, introductam fuisse manumissionem per baptismum, & loco probationis inquiritur in causam, cur introducta eadem fuerit. Alia plura ut jam taceam.

§. VII.

Sed pergit Vir Consultissimus: *Id quod luculentissime confirmat Pius V. Papa, constitutione sua de anno 1566. lata, quæ habetur in Magni Bullarii Romani Tomo I. sub n. 17. quod edidit Laertius Cherubinus J. C. ius Romanus, in qua disposuit Pontifex captivos eorumque prolem a servitute liberari debere, suscepto SS. baptismo.* Video similia asseri a Gudelino d. l. p. 6. Verum, ait, recens est Pii Quinti Constitutio extans apud Petrum Matthæum in summa Constitutionum summorum Pontificum, captivos fieri liberos suscepto Baptismo qui sub subtelam civis cujusq; Romani confugerint. Respondeo 1. Constitutio Pii V. qualiscunq; etiam sit, non probare potest,

test, quod manumissio per baptismum sit introducta tempore eo, quo ex hypothese Consultissimi Autoris, Christiana charitas movit gentes Christianas, ut servitutem abrogarent, quia illa constitutio Pii V. est multo recentior abrogatione illa servitutis. 2. Si Pius V. demum introduxit hunc modum manumittendi per baptismum, non pertinet ad nos Germanos, quia obligat saltem eos, quibus lata fuit. Ad nos protestantes in Germania post reformationem (quo tempore latam esse illam constitutionem fatetur ipse Consultissimus Autor,) non agnovimus Papam legislatorem, imo nec Pontificii cives in Imperio eo tempore Papam Legislatorem agnoverunt. Ergo probare debebat Consultissimus autor, Constitutionem illam Pontificis in Germania esse receptam.

§. VIII.

Sed forte etiam id non constituit Pius V. quod constitui fertur. Mallem, ut mihi licuerit ipsam constitutionem inspicere. Quasi eam in Septimo Decretalium, quem librum Petrus Matthæi edidit, sed ibi non inveni. Istum vero librum quem Gudelinus allegat, non habeo. Adduxit quidem Consultissimus Autor ex prædicto Bullario verba prolixius. Sed exinde mihi videtur parum probari posse. Contraham rem in summam. *Provocat Pius V. ad constitutionem Pauli III. qui redintegraverit facultatem & privilegia Conservatorum & Populi, mancipia (seu Sclavos,) post baptismum ad Senatus Camera officium ac illius conservatores confugientia, secundum veterem consuetudinem ab aspero servitutis iugo liberandi. Hanc Constitutionem Pauli III. Pius V. confirmat, & servos prædicto modo per Senatum Camera & Urbis Conservatores liberatos vult haberi plenissime pro civibus Romanis.* At vero ut taceam i. istam constitutionem specialem ad districtum urbis Romæ pertinentem male extendi ad Germaniam, non potest 2. sensus illius constitutionis perspicue cognosci, si non & ipsa Pauli III. Constitutio, ad quam se refert Pius V. inspiciatur, quia referens sine relato interpretari non possumus, 3. Ipsa constitutio aperte ostendit, neque ex mente Pii V. aut Pauli III. manumissionem tum per ipsum baptismum factam fuisse, sed per dationem specialem Conservatorum & Senatus Camera, postquam mancipia baptizata ad ipsos confugissent, ergo baptizati eo non confugientes manebant servi. 4. Quia & Paulus III. ad veterem consuetudinem provocat, a vero non est absimile, totam constitutionem utriusque Pontificis non loqui de mancipiis bapti-

baptizatis omnibus, sed de mancipiis Judæorum vel aliorum infidelium. Confer supra §. 4. Quodsi esset, eadem responsiones essent hic repetendæ, quas jam supra d. §. 4. dedimus.

§. IX.

Ergo si nulla datur in Germania manumissio per baptismum, uti hætenus adhuc videtur, frustraneæ sunt quæstiones à Viro Consultissimo de hac manumissione per baptismum motæ, v. g. an maritus mancipium uxoris possit ita manumittere? an uxor possit invito marito? an Proprietarius ita manumittere possit servum usufructuarium? an socius invito socio possit? *vid. c. 1. §. 12. usq. ad 27.* frustraneæ sunt assertiones: differentiam esse inter hanc manumissionem & reliquos modos manumittendi, quod in illis olim apud Romanos inviti libertatem consecuti fuerint *l. 15. §. 2. C. de testam. manum.* ad hanc vero invitus non cogatur; (*d. c. 1. §. 42. & 43.*) item quod ad hanc manumissionem omnes admittantur etiam Jure Romano inhabiles, ut servi plagiarii, Candidati torturæ, servi oppignorati &c. (*d. c. 1. §. 47. seqq.*) quod manumissi per baptismum gaudeant iure civitatis & fiant municipes in illo loco, ubi Patronus sit municeps debeantque inter opifices recipi & tolerari; quod munera patrinorum pertineant ad manumissorum patrimonium, nec sint peculium; quod habeant testamenti factionem activam & passivam, & possint ab intestato succedere; quod sint capaces honorum & dignitatum in Republica; quod Uxor infidelis Turcæ baptizati gaudeat iisdem honoribus quibus maritus, non vice versa &c. (*vid. cap. ult. §. 30. 31. 32. 33.*) Id saltem duobus verbis addere liceat (1) falsum esse, quod apud Romanos inviti libertatem acceperint servi, non obstante, quod in *d. l. 15. §. 2. C. de manum. testam.* dicatur: *nemini servorum licere Romanam civitatem recusare.* Pertinet enim hæc assertio ad flosculos errorum Triboniani. 2. Occasionem dari ad malitiam, si per baptismum quis manumitteretur, vel eo quod hoc casu servi oppignorati in fraudem creditorum manumitterentur, quod juri naturali est contrarium. 3. Repugnare praxi morum nostrorum assertioni, quod munera patrinorum non pertineant ad peculium, quod est in proprietate Domini.

Pluribus observationes declarabimus

in discursu.

T A N T U M.

58. l.

Q. F. P. Q. S.

IN ACADEMIA FRIDERICIANA
CELEBERRIMI AUTORIS

De

RATIONE STATUS

Differtationem XVII. & XII X.

De

REVISIONE, CONVENTU
PRINCIPUM, REGIMENTO PERPE-
TUO, REGALIBUS STATUUM
IMPERII, ET TERRITORIO.

Cum adjuncta Quæstione

*Cur Imperator Wenceslaus, Princeps
non optimus quidem, sed tamen nec etiam malus,
communiter tam male audiat?*

Publice ventilabunt

DIE XII, Octobris M DC XCIII, horis antemer. a X. ad

XII. & pomeridianis a III. ad V.

CHRISTIANUS THOMASIUS,
Jctus & Prof. Publ.

& Respondens


JOHANNES du CLOS, Metensis
Gallus.



QVÆRO IX.

Cur Imperator Wenceslaus, Princeps non optimus quidem, sed tamen nec etiam malus, communiter tam male audit? Videtur, odium Cleri Pontificii, & protectionem aut tolerantiam Hussianam iniquioris ejusmodi famæ dedisse.

§. I.



Robavimus in quæstione secunda, verosimile esse, Wenceslaum legaliter non fuisse depositum. Hic duo probanda sunt: I. Wenceslaus non fuit Heros inter Principes, sed tamen Princeps, qui magis, si non laudem, saltem excusationem quam vituperium meretur. Fuit enim Princeps timidus quidem, piger, vino deditus, nec ad magna natus, sed sincerus, benignus, clemens & nequitia osor ac veritatis amans, certe non hostis. II. Causa pessima ejus famæ fuit, partim quod ipse & oderit Clerum Pontificium, & ipsis iterum fuerit valde exosus, partim quod veriore Husi doctrinam, quantum status turbulentus Bohemæ & Genius ipsius Imperatoris admittebat, defenderet.

§. II.

Non justum tractatum scribo, sed breve Schediasma. Igitur melius facere non possum, quam si ex duobus saltem vel tribus autoribus fide dignis, (quia omnes more communi Wenceslaum increpant,) quædam huc facientia excerpsero. Quare non tam ad eorum verba, quam ad rem ipsam, quam narrant, respiciendum erit. Et valde mirandum, quod communiter omnes Historici, etiam Protestantes & moderni, Wenceslaum tam petulanter increpent, cum tamen jam suo tempore Aventinus referente Boxhornio *Historia Univers.* p. m. 887. postquam secundum opinionem communem recensuisset scelera Wenceslai, amore veritatis victus addiderit: *Complura*

plura de eo alia scelera referuntur, quae ego falsa atque conficta (im sunt ingenia hominum,) ab inimicis esse reor.

§. III. De Wenceslao hæc refert Lehmannus *Chron. Spir. lib. 7. cap. 60. p. m. 826.* Demnach die Böhmen an Kayser Wenceslao gespürt / daß er seinem Vater an Tugenden und Verstand sehr ungleich / haben sie wenig von ihm gehalten. Der Kayser vermercket die Verachtung / macht es wette / und thät dergleichen gegen die Böhmisches Herren / zog zu sich Teutsche / und bestellt mit denenselben die fürnehmste Amts-Verwaltung. Daher erwuchsen zwischen beyden Nationen enferige Verbitterung. Die Böhmen machten Bündnuß wider die Teutschen / und bedrängten sie / wo sie Gelegenheit hatten. Deßhalben ließ der Kayser am Samstag nach Ostern die Fürnehmste der Verbündnuß verhaften / und den Montag hernach öffentlich enthaupten. Hernach berufft der Kayser alle Raths-Personen der Alten und Neuen Stadt Prag zu Hof / und als sie erschienen / hat er sie heißen zu seiner Tafel sitzen. Als sie gegessen / ist der Scharffrichter / des Kayfers Bevatter / ins Zimmer vor den Kayser getreten / und hat gesagt: Gnädigster König und Herr: Aus was Ursachen bin ich hieher erfordert? Der Kayser antwortet: Lieber Bevatter / wart draussen / nach der Mahlzeit will ich dir zu schaffen geben. Den Gästen ist Herk und Muth gesunken / denn sie wol gewußt / daß der Kayser zuvor mehrmahls Schuldigen und Unschuldigen mit gleicher Maß gemessen. Nach verrichter Mahlzeit hat ihnen der Kayser unterschiedliche Befehl und Beschweruß anffgebunden. Darauff die Raths-Personen ein jeder allen Gehorsam / darzu ihr Leib und Leben vor Ihre Majestät aufzusetzen allerwilligst versprochen. Welches der Kayser mit Gnaden angehört / und weil er sie zu seinem Willen gewonnen / wieder unbeleidigt hingehen lassen. *Observa ex hac historia, subditos irreverentes & rebelles Imperatori occasionem dedisse severa remedia ad eorum coercionem adhibendi. Ipse tamen, si adeo crudelis fuisset, uti describitur, tam benigne istos Senatores omnes non dimisisset, præprimis cum multo verisimilius sit, eorum aliquos rebellionis fuisse implicitos, & hanc causam timoris fuisse, quam quod juxta Lehmannum, Imperator assvetus fuerit insontes cum fontibus punire.*

§. IV. Pergit Lehmannus *Cap. 61.* Im Jahr 1393. ist der Kayser gen Beraun verreist / daselbst - verkleidet - ins Kloster gangen / zu besuchen /

wie sich die Mönch in ihren Orden verhalten. Im Kloster ward er von
16. Mann unversehens - überfallen / und in geheim gen Prag - in ein
Gefängniß mit Namen Schpincka geführt / darinn er 15. Wochen-ge-
legen. - Eines Tages ließ er den Rath bitten / sie wollen ihm erlauben
im nächsten Bad am Rath-Haus zu baden / mit Verheißung / daß
er nach dem Bad wieder ins Gefängniß wolt gehen. - Dem Kayser
zu willfahren / haben sie - ihm vier vertraute Diener zu Verwahrung
und Wiederlieferung zugeordnet / - der Diener haben zween mit ihm
gebadet / zween die Wacht gehalten. Nach langen Baden sagt der
Kayser / er wolle sich an der Luft erköhlen. Das ließen die Diener zu.
Das Bad-Haus war im nächsten an der Mülde gelegen / dabey ein
Fischer-Nachen angehefft. Der Kayser fragt eine Bad-Magd / ob sie
mit dem Nachen fahren könt / da sie ja geantwortet / bat sie der Kayser /
den sie doch nicht gekennet / sie wolt ihn eilends überführen / und ver-
sprach ihr ein gut Trinck-Geld. Die Magd thats / rudert eilends hins-
über. Im Aussteigen stieß der Kayser den Nachen vom Land / daß die
Magd nicht wieder drein könt kommen / sagt / sie solt mit dem Ruder
eilends nachfolgen / so wolt er sie mit hundert Guldten begaben. Sind
also beyde - gegen dem Dorff Kuchel gelauffen / daselbst sie wieder ei-
nen Nachen gefunden / und seynd wieder übers Wasser gefahren /
und - biß zum Neuen Schloß gangen - davor sie zu Abend gar spat an-
kommen. Der Kayser hat dem Thorwarter zugeruffen / der erkennt im
finstern die Stimm / meldt den Kayser bey dem Hauptmann an / der ihn
alsbald eingelassen / und als nackenden sambt der Bade-Magd Sus-
sann genannt / nach Vermögen bekleidet / und mit einem Imbiß er-
güßt. Der Erledigung erfreuet sich der Hauptmann samt allen den
Seinen. Nach dem Essen ließ der Kayser hundert Guldten an Gold
herbey bringen / liefert sie der Susanna mit Dancksagung - sagt fer-
ner / weil sie seine Erlöserin / sein Geferth und Tischgenos gewesen / so
sol sie auch sein Schlaffgesell seyn / welches die Baderin geschehen las-
sen. Als der Kayser auff dem Neuen Schloß mit seiner Susannen sich
etlich Tag fröhlich gemacht / ist er hernach samt derselbengen Ziebrack
verreist / dahin er die Herren von Prag zu Gast beruffen. Aber es wolt
niemand erscheinen / sagten / sie hätten zu Prag besser / als auffm
Ziebrack. Siftit hæc Historia Wenceslaum Optimatibus rebellibus
exosum, a plebejis & suis valde amatum, Monachis non faventem,
& ab iis iterum non amatum, voluptuosum, & erga beneficos gra-
tum.

§. V. Sequenti cap. 62. narrat Lehmannus, quomodo mox Imperator iterum a subditis suis rebellibus captus, occulto Vienne captivus duriter detentus, & a piscatore iterum liberatus fuerit. Excerptam saltem exitum. Seynd hernach (der Fischer und der Kays-
ser) durch einen Wald und andere Umbwege in Böhmen am Tag Martini vor das Schloß Wischerad ankommen und eingelassen wor-
den. Der Kays-er sagt zu den Unterthanen/ welche seine Getreue wären/
die solten zu ihm treten/ deren alsbald auff zwanzig Personen herbey
gelauffen. Demnach er von ihnen verstanden/daß der Hauptmann des
Schlosses vom Rath zu Prag in der alten Stadt dahin gesetzt/ hat er
denselben zu verhaften befohlen/ und in dessen Nahmen ein Schreiben
an gedachten Rath gefertiget/ des Inhalts/ daß sie in Eyl dahin kom-
men solten. Immittelt den Scharffrichter des Orts auff das Schloß
beruffen. Der Rath zu Prag ist aufs Hauptmanns Beschreiben als
in eilfertiger schwerer fürgefallener Sach mehrentheils im Schloß an-
gelangt/ welchen der Kays-er von Stund an die Hände zusamen knüp-
fen/ und einen nach dem andern samt dem Hauptmann des Schlosses
die Köpfe lassen abschlagen. Nach solcher Verrichtung hat der Kays-er
wieder sein Anwesen zu Prage angestellet/ andere Raths-Personen
eingesetzt/ viel mit guten Worten wieder zu Freunden gemacht/ die sich
widersezig erzeigt/ denen ist er mit seinem Gevatter dem Scharffrichter
und andern Scherganten vors Hauß geritten/ hat dieselbe heraus las-
sen reißen/und öffentlich vorm Hauß lassen enthaupten. Bißweilen hat
er sich gegen männiglich hohes und niedern Standes grosser Fröligkeit
angenommen/und jederman gnädigen guten Willen erwiesen/daß man
sich seines Wandels zu Zeiten erfreuet/ zu Zeiten höchlich zu beschwe-
ren gehabt. Hans Grundeln den Fischer hat er samt Weib und Kind/
die er von Wien lassen abholen/ in stattliche Nahrung gesetzt/und ihnen
alle Gnad und Beförderung beständig erwiesen. Ecce iterum Wen-
ceslaus prudentem, severam, justum, benignum, gratum. Vero-
simile, ex hoc ejus justæ severitatis exemplo ortam calumniam de
ejus crudelitate.

§. VI.

Pergit Lehmannus, p. 828. Der Kays-er ist von Natur des Ge-
müths gewesen/ daß er vor den gemeinen Nutzen nimer eyffrige Sorge
getragen/ die Armen/ und vor den mächtigern Betrübte und Betrangte
nicht gehöret/ noch vor Gewalt beschützt. Die Höhere und Mächtige

re haben des Kaysers Wesen ihnen lassen wolgefallen / sagten / der Kaysers wäre ein frommer gütiger Herr. Die Geringere / so unter der Preß gesteckt / führten hierüber unersättliche Klag und Beschwernuß / sagten hingegen / daß er unachtsam und böß wäre. Diese Reden von beyden Theilen sind dem Kaysers fürkommen / darüber er zur Antwort geben / wenn einem etwas wil zu schwer seyn / so lege ers nieder / ist einer in Angst / mag er den Dampff von Herzen hinweg reuspern. Ne Jupiter quidem omnibus placet, ut in proverbio est. Quid Wenceslaus placeret omnibus? Quamvis Wenceslaus melior fuerit Jove Gentilium. Laudatur ab his, culpatur ab illis. Causæ odii injustæ fuerunt, ut præcedentia ostendunt, ex quibus etiam, quæ hic contra Wenceslaum allegantur, facile refutantur. Non poterat defendere oppressos Wenceslaus, etsi voluisset, cum ipse sæpius jam a subditis duriter tractatus fuisset. Non adeo vanâ timoris causa, & metu laborabat, qui etiam in virum constantem cadit.

§. VII. Jam quædam ex Michaelis Saxonis Kaysers Chronica excerpamus. Is cap. 2. ejus symbolum sit refert: *Morosopbi Moriones pessimi: vel: Moriones docti, moriones mali.* Quod non odium ejus erga eruditionem, sed justum odium erga Clericos illius temporis corruptissimos indicat, qui falsa eruditione turgidi, nil nisi morionum pessimorum personas sustinebant. Accusatur cap. 3. lasciviæ tantæ, daß er andere Weiber und Jungfrauen geschändet mit List und Gewalt / wo er gekont. Quod si verum esset, non fuissent obliti Electores in accusatione ejusdem. Sed non factum, & probabile est, eum a lascivia non fuisse plane quidem alienum, occasionem vero ad hanc calumniam dedisse Imperatorem, quod minus decenter cum liberatrice sua Susanna, ut memoravimus, vixerit. Cap. 5. memorat autor, quod Carolus IV. morti vicinus ipsi consilium dederit, quomodo feliciter regnare possit. Wenn du wilt wohl und friedlich regieren / so halte dich also. 1. Habe die Pfaßheit / Pabst und Bischoff lieb. &c. Hinc illæ lacrymæ. Hinc Carolus IV. tam laudatus a virtutibus & prudentia (vide supra §. 3. initio) Hinc frater Wenceslai Sigismundus adeo commendatus ab Historicis, quod Clericorum sputa lingeret, & fidem Hussi datam violaret. Eodem cap. 5. hæc refert Sachsse; Den Münch Bartoldum Schwarz hat er ertöten lassen / darum daß er die Büchsen erfunden hatte / zu geschwin- der Erödung der freudigsten, und stärcksten Menschen. Justissimum factum.

factum. Pestilentissimæ inventionis autor, qui vitam Deo voverat, non poterat mitius puniri. Sed hoc non erat ferendum, ut Imperator tam memorandum exemplum in sacra Monachi personam exerceret. Confer simile exemplum supra *quest. 2. §. 5.* Hinc illæ quarrelæ Electorum *ibid. §. 9.* quod reverendos sacrorum Antistites, Sacerdotes & Spirituales personas truculenter peremerit. Cum tamen ipse ejus accusator & testis potissimus, Johannes Archi-Episcopus & Elector Moguntinus Latro & Sicarius notorie fuerit, Fridericum Brunsvicensem, invito ipso in Imperatorem post depositionem Wenceslai electum, per assassinos interficiens.

§. II. X. Finem imponant excerpta quædam ex Theobaldi Hussiten-Krieg. Is *Part. 1. c. 3.* postquam narrasset, Clericos irritatos valde fuisse contra Hussum, subjungit: Da umb solches durch die Geistlichen für den König bracht wurde/ durch welches Hülffe sie vermeineten dem Hussen alsbald Brief in ein anders Kloster zu geben. Aber was geschach. Der so mehr um andere unnütze Sachen bekümmert war/lachet/sagende: Ey ey/ laß ihn nur gehen/die Sanß wird mir güldene Eyer legen. Hinc accusatio Electorum, quod Ecclesiæ noluerit mederi, quod pacem in Ecclesia non promoverit, & quod sacra Ecclesiæ opem ferre noluerit. Res magis patet ex sequentibus. *Ibid. cap. 7. p. 20.* Der Erzbischoff von Prag wie er vernommen/ daß sich König Wenceslaus in die Sach nicht flechten wolte/ sondern ließ alles/wie es gieng/ gehen/machet sich auf/zog in Hungarn zu dem Kaysen Sigismundo, begehrt bittlichen von ihm Hülff mit Vermelden/ daß man sonst den Keßereyen nicht wehren könte/wo er nicht aus besonderer Lieb zu der Christenheit selbst persönlich ins Land Böhmen kam/das glimmende Feuer ausleschet. Er beklagt sich auch hoch über des Kaysers Bruder Wenceslaum, Böhmischen König/ so alle Kaysersliche Heiligthumen/ so bey der Schloß Kirchen/so wol auch bey den Capellen Corporis Christi in den Gewölben unter der Erden/ so mitten auf dem Neustädter Marckt stehet/ nehmen/ und auf das Schloß Carlstein wider der Prager Willen führen/ verschliessen und verpetschieren lassen/ darum denn die Prager allbereit fleißig sollicitirt/ daß er ihnen den Ruß nicht nehmen/nicht anders aber zur Antwort bekommen/ dann: Gehet hin erstlich zu euern Böhmischen Magistern in die Collegia, und fraget sie/ wer ihnen den Ehrgeiz gegeben/ daß sie dreyer Stimm begierig worden sind/ dargegen die Deutschen eine haben sollen/ dadurch sie alle Studenten aus Prag vertrieben/ deren ihr besser als dieser Heiligthümer genossen

genossen habt. Dieweil sie euch dann eine Unordnung gestiftet / warum wolte ich euch nicht die andere anrichten? Haben euch eure Magistri das eine fürnehmste Einkommen genommen, so können ihr die andern auch entrathen. A vero haud absimile est, Wenceslaum id fecisse in favorem Hieronymi Pragensis, de quo idem autor *pag. statim sequente 23.* narrat, quod contra cultum reliquiarum fuerit concionatus. Non potuit non hoc modo odium Cleri incurrere Wenceslaus, unde cum postea ex omnibus cathedris tonarent contra Hussum, (welches der König wohl wuste / aber nichts sagte / ließ es gehen / wie es wolte / enthielt sich auf dem Schloß Kocnyck) ut noster ait *p. 30.* non poterat justo metu plura contra eos tentare. Huc faciunt ea, quæ sequuntur *p. 33.* Der Pabst war erzürnet / schrieb König Wenceslao, drohet ihm ernstlich / wo er die Lehr Wicleffs nicht unterdrücket / welches alles vergebens war. Der König so sich vor Aufruhr des Volcks befahret / nahm sich keiner Sachen an / biß daß Huß und Hieronymus verbrennet / die Krieg entstanden / und alles bund übergieng. *P. 77.* efert, quomodo Cardinales vana spe lactaverint Wenceslaum de Imperio recuperando. *P. 132.* Status Bohemici Regem rogant, ut ad ipsos Pragam veniat. Respondet, er fürchte sich vor der Spincka / (vide supra §. 4.) Sey vor denen Böhmen weder im Kloster noch in dem Königlichen Hof sicher gewesen. Postea promittentibus statibus fidelitatem, Pragam rediit, & Hussi asseclis quædam templa concessit, in welchen sie beyde das Volck nach ihren Willen lehren / und die Sacramenta nach Christi Einsetzung austheilen möchten. *P. 137.* Wenceslaus Ziscam famigeratissimum Hussitarum postea Generalem benigne dimisisse narratur, ipsique concessionem indulsisse, die Schmach zu rächen / so ihm ein Geistlicher / der seine Schwester stupriret / zugefügt / welche Vergünstigung der König mit angehängtem Siegel bekräftiget / quamvis Theobaldus putet hoc factum esse a Wenceslao ex contemptu Ziscæ, quod pauper esset, & simplex ipsi videretur.

§. IX. Concludo: Si ad Martyrium sufficeret, quod quis injusta propter veram religionem pateretur, martyr esset Wenceslaus.

TANTUM.

Q. F. F. Q. S.

58. m.

IN ACADEMIA FRIDERICIANA
CELEBERRIMI AUTORIS

De

RATIONE STATUS

Dissertationem XIX. & XX.

De

TERRITORIALI POTESTATE

CIRCA SACRA IN COMMUNI,

De

EADEM IN IMPERIO, ET DE JURE
REFORMANDI.

Cum adjuncta Quæstione

Quid sentiendum de articulo 5. & 7.

Reformationis Friderici III de anno 1441. contra

Doctores Juris & Jus Romanum?

Publice ventilabunt

DIE XIX. Octobris M DC XCIII. horis antemer. a X. ad

XII. & pomeridianis a III. ad V.

CHRISTIANUS THOMASIUS,

JCtus & Prof. Publ.

& Respondens

JOHANNES ADOLPHUS METZSCH,

Eques Anhaltinus.

K

QVÆ.



QVÆRO X.

Quid sentiendum de Reformationis Friderici III. de anno 1441. articulos 5. & 7. contra Doctores Juris & Jus Romanum? Videtur ejus intentio fuisse maxime salutaris.

§. I.



Extat illa reformatio apud Goldastum *p. 166. seq. Der Reichs. Satzungen/* & dicitur, quod proposita fuerit in Comitibus Imperii Moguntiae anno 1441. habitis. Constat illa XII. articulis & declarationibus horum articulorum. Sunt, qui dubitant de veritate hujus Reformationis, & fatendum, eam stilo consveto Recessuum aut Constitutionum Imperii non esse conceptam, neque memini, me legisse, quod antiquior Historicus mentionem faciat conventus Imperii Moguntiae isto anno habiti. Lehmannus in *Chronico Spirensi lib. 7. c. 98.* expresse dicit, Fridericum III. primam dietam indixisse 1442. Francofurti, cujus recessus extat in vulgari editione Recessuum Imperii, statim post auream bullam. Ipse Goldastus in vindicatione hujus reformationis, *p. 312.* variat, modo enim dicit, ab ipsomet Friderico Caesare Ordinibus propositam esse, multis autographis doceri posse, modo: eam in medium adductam esse in Comitibus regni Germanici a Germaniae Urbibus. Conringius *de Orig. Jur. Germ. cap. 32. p. 199. seq.* neutrum horum certo vult asserere, id tamen constare dicit, in comitiis libellum hunc publicae deliberationi propositum esse, & actum esse illa aetate de tota Republ. rectius in posterum instituenda, magno studio & multo labore, & *p. 202.* praeterea tum temporis cum alibi, tum in superioris potissimum Germaniae praecipuis urbibus coepisse Juris Doctores senatoria dignitate excludi, quod jam Besoldo & Winthero fuerit annotatum, denique *p. 204.* Fridericum Imperatorem de Juris Doctoribus minus benigne sensisse, ut qui teste Cuspiniano in ejus vita, dixerit, juris ab eis aequitatem inverti iustitiam.

fictamque fœdari. Mihi sic videtur, propositos fuisse articulos ab urbibus Imperatori, declarationem articulorum vel a reliquis statibus, vel a Consiliariis Imperatoris. Res patebit e sequentibus.

§. II. Excerptare autem volumus ea saltem, quæ ad Doctores Juris pertinent & ad Jus Romanum. De Doctoribus juris conceptus est articulus 5. Alle Doctores der Rechten / sie seynd Geistlich oder Weltlich im H. R. R. E. R. sollen nach laut der fürgenommenen Reformation an keinem Gericht bey keinem Rechten / auch in keines Fürsten oder anderen Râthen mehr gelitten / sondern ganz abgethan werden. Sie sollen auch für bahin vor Gericht oder Recht nicht weiter reden / schreiben oder Rath geben. Sintmals Gott dem Menschen mit seiner eigenen Weißheit begnadet und versehen hat / so mag er in der neuen fürgenommenen Ordnung seines Rechtens selbst wohl warten.

§. III. Declarationes supra hunc articulum sunt quatuor ap. Goldast. f. 171. seq. Summas saltem afferemus. 1. In omnibus Universitatibus tres Doctores Juris debere sustentari, qui Jura bene fundata & recepta explicare, & si de jure interrogentur in casibus dubiis, conjunctim intra 30. dies debeant respondere. 2. Doctores Juris non debere admitti in ullis judiciis, neque superioribus neque inferioribus, tanquam judices aut assessores, quia jus iis magis sit occultum quam Laicis, & quia sint mercenarii, non heredes Juris &c. 3. Et quia sint vitrici Juris, non debere etiam Procuratores aut Advocatos esse in judiciis &c. additur: Das hat euer verkehrte Lehr inner funffzig Jahren zu wege bracht: wo ist er vor erhört wordē? 4. Permissum esse omnibus statibus uti Consiliis Doctorum, sed non debere admitti in consiliis ordinariis, sed separatum consilium, si quis eis velit uti in causis difficilioribus, formari debere. Denn bey ihnen ist nichts verschwiegen / sie seynd nits anders Râth / denn des Golds und des Geiſſs. Verba dura, sed quis non videt, per Declarationem primam & quartam eludi totum articulum, adeoque hæc verba ad decipiendos incautos fuisse adhibita?

§. IV. Articulus 6. quamvis affinis sit, & de Clericorum remotio-
ne a negotiis civilibus conceptus, tamen brevitatis studio omitetur.
Sequitur articulus septimus. Alle Kayserliche weltliche Recht / so bisher
in H. R. R. E. R. gebraucht und dafür gehalten seynd / sollen alle todt
und ab seyn; allein die / so durch die Rechtverständigen mit lauterem

Grund und klarer Wahrheit ohne Argelist rechtlich erkannt sind / sollen gehalten und bestättiget werden / damit der Arm so viel Freyheit und Zugangs habe im Rechten als der Reich / und ob er schon ein Fürst wäre / sonder Argelist und Gefährde.

§. V. Declarationes iterum sunt quatuor f. 173. Constituenda esse in Imperio 1. Cammer. Gericht / 4. Hof. Gericht / 16. Land. Gericht / 64. Frey. Gericht. Forma eorum maxime favorabiliter ibi depingitur. Sed in fine additur: Man mag sich auch an all den Gerichten der Kayserl. Rechten recht gebrauchen / die mit Rechten wahren Grund erkläret / angezeigt und zugelassen seynd / laut der Gerichts. Ordnung. Quis non videt iterum tolli revera articulū? Et hæc ratio forte est, quod cum sentirent urbes, aut ii, qui proponebant articulos, quod ita false riderentur, non amplius urgere voluerint rem desperatam, sed rem demiserint.

§. VI. Quicquid hujus sit, de utilitate aut damno hujus intentionis quæramus. Sunt, qui posterius asserunt, & Reipubl. gratulantur, quod rabulæ non obtinuerint. Sed ni fallor contra rabulas tum actum fuit, non a rabulis. Et celeberrimi etiam Juris Doctores possunt esse celeberrimi rabulæ. Ergo ne cum turba nobis res sit, audiamus judicium Conringii d. c. 32. p. 202. seq. Postquam retulisset ultimam Declarationem articuli 5. subjungit: *Quam equidem periniquam judico & longe durissimam. Eximvero in atrocem adeo sententiam itum est procul dubio non alia de causa, quam quod illi ordini Doctorem permisti quidam rabulæ, pessimis fori Pontificii moribus tranquillitatem Germaniæ tum perturbassent. Illi scilicet curiæ debetur, quicquid est rabularii negotii. Et vero primorum apud nos Juris Doctorem plerique in Italia educati sunt, ut mirum non sit, scabiem Aulæ Pontificiæ illorum multis affricam. Quin ex Italici ipsis nonnulli in Germaniam tum transiere. Quomodo ex Italia secum adduxit Bogislaus decimus Pomeraniæ Dux Petrum Ravennatem, ejusque filium Valentinum. Itali quoque fuerunt, qui Mattheia Hunniade Rege, Hungaria subito litibus repleta, effecerunt, ut ipsum Jus Romanum, ubi pedem intulisset in Regionem illam, vicissim mox inde pelleretur. Ceterum utut illi peritorum Romani juris ordini quidam fuerint permisti tum vitiliuigatores, non tamen paucorum vitio totus laudatissimus ordo proscindi meruit. Et vero quid vel Romani vel Pontificii juris peritia bonis consiliis obstat vel judicandi prudentiæ? Ex adverso omni ævo visum prudentioribus, eum ad Rempubl. utilissimum, qui Ulyssis exemplo; Multorum mores populorum novit & urbes. Taceo nunc, ea tempestate commode Rempublicam nostram geri non*

non potuisse sine legum illarum notitia, saltem ob aula Pontificia etiam in media Germania auctoritatem, & Italia Galliaque viciniam, qua jam leges illas observabant, Omnis hominum ordo sua carcinomata habet. Ipse sanctissimus Apostolorum cætus, scelus ingens intra se aluit. Si paucorum crimen in omnium culpam trabendum, actum est profecto de universo humano genere.

§. VII. Hic nescio, an Conringius Declarationem saltem, an etiam articulum impugnet? An serio defendat Doctores Juris, an saltem hæc adscripserit, ne odium eorum incurrat? Quia verba modo allata non exhibent modum disputandi Conringianum. Opponamus Conringium Conringio, & ex ipso adducamus, quæ ad defensionem articulorum videntur facere. Ita vero ait cap. 33. p. m. 215. *Ex quo judicia Romani illius Juris Doctoribus commissa sunt, fieri vix aliter potuit, quin eorum multi, illius Juris, cuius audiebant Doctores, quam priscarum Germania legum ac consuetudinum cum peritiores, tum observantiores hujus Romani juris usum sensim introducerent, præsertim apud populum quoque enata Juris illius utut ignoti, præ antiquis institutis singulari existimatione.* Et cap. 34. p. 228. *Contentionibus & litibus forensibus immane quantum ab illo usque tempore Germania omnis infecta ac contaminata. Quod quam sit Reipublicæ noxium, in propatulo est. Neque vero justitiæ suus locus est in litium illa multitudine, tum diuturnitate, justitiæ autem utique anima est omnis societatis. Arguit vero hoc, nisi fallor, sole clarius: saltem leges forensium actionum judiciorumque baud vacare vitio.*

IX. Res ex eodem paulo altius repetenda est. Constat, Augustum, ut populum eo magis in devotione retineret, multiplicandarum litium gratia Jctis dedisse potestatem publice respondendi, de quo diximus in *Navis Jurisprud. Rom. Germ. For. lib. 2.* Forte eodem consilio ab ipso missi Jcti in Germaniam. Germani tum temporis simplici processu assveti, occiso Varo maxime favierunt in causarum patronos: Aliis oculos, aliis manus amputabant; unius os sutum, recisa prius lingua: quam in manu tenens barbarus; tandem, inquit, vipera fibilare desiste. *Florus l. 4. c. 12. Conring. de judiciis Reipubl. Germ. §. 17. p. m. 225.* Et tamen illo tempore apud Romanos processus brevi tempore & ad summum regulariter anno finiebatur. Et verosimile est inter occisos causarum patronos fuisse multos viros egregios, Trebatii, Alsenis, Javolenis nostris non ce-

dentes. Ejusmodi processum brevem ac simplicem Germani usque dum cum Academiis Jus Romanum introduceretur, retinuerunt: *Vide Conring. de O. I. G. c. 28. p. 173.* De Italis, apud quos etiam ante Cæsaream auctoritatem legum Romanarum mansit auctoritas, notabilis est historia, quam refert *Conr. ibid. c. 23. p. 141.* Fridericus I. Imperator in Italia aliquando cum assessoribus Bulgaro, Martino, Jacobo & Hugone ipse audiebat & terminabat negotia. Videns autem multitudinem eorum, qui cruces bajularent (is enim Italarum mos erat, ut habentes querelas crucem manibus præferrent) misertus illorum, ait: Mirari se prudentiam Latinorum, qui cum præcipue de scientia legum gloriantur, maxime legum invenirentur transgressores, quamque sint tenaces justitiæ sectatores, in tot esurientibus ac sitientibus justitiam evidenter apparere. Eodem tempore S. Bernhardus ad Eugenium Papam (*apud Conring. d. l. p. 142.*) *Quotidie perstrepunt in tuo palatio leges, sed Justiniani non Domini. Rectius etiam? Istud tu videris. Nam lex Domini immaculata convertens animas: ea autem non tam leges, quam lites sunt & cavillationes, subvertentes judicium.*

§. IX. Seculo 13. Jus Pontificium in Germania cœpisse Conringius docet *ibid. cap. 26.* & ut observaretur publica sanctione a Friderico II. Imperatore constitutum fuit, *ibid. 156. seq.* Nam eo tempore Clerici ad judicia sua etiam traxerant, causas seculares. *Conring. de judic. Reipubl. Germ. §. 80. p. 298.* Taxat hunc processum *Idem Ibid. §. 70.* ob iniquitatem, quod actoribus maxime adversus sit, & reis nimium faveat, & tamen magis faveat multiplicandis litibus in damnum Reipub. *Conf. §. 81. p. 299.* Auctoritas vero Juris Romani in Germania cœpit seculo 15. præprimis, cum Imperator Sigismundus in Concilio Constantiensi disposuerit de sustentatione Doctorum Juris. *Conr. de O. I. G. cap. 32. p. 198.* Fuisse autem tum statim lites mirum in modum multiplicatas ex eo patet, quod ante illa tempora in judicio Aulico tam paucæ causæ per Appellationem eo deductæ ventilatæ fuerint, ut uno opus fuerit saltem judice & actuario. Hoc vero seculo in tantum creverunt lites, ut non solum tempore Friderici III. de ejiciendo iterum Jure Romano cogitatum fuerit, sed & mox opus fuerit, Judicium Camerale institueretur. *Conring. de judic. lb. 97. 98. 99.* Quamvis vero ibidem iterum potissimam

tissimam causam turbarum Juri Pontificio velit adscribere, ex eo tamen refutatur, quod hoc jam seculo 13. in Germaniam fuerit receptum, & quod Jus Pontificium multa quoad processum ex Jure Romano Justiniano desumeret.

§. X. Notabilis est noxa, quam notat Idem *dict. dissert.* §. 59. 60. p. 272. seqq. Id quoque plane nova more cepit, quod ipsimet Principes aut Caesar ipsemet non amplius jam vacent dijudicandis controversiis suis ut antebac: sed omnem hanc curam in Romanarum legum peritos plebeji licet generis, ministros suos, soleant rejicere. Cui rei mos patrius ab omni retro ævo hætenus observatus plurimum adversatur. Non potuit vero non hoc obtinere, ex quo pro legibus majorum Romane atque Pontificie in Germania invaluerunt, quod ab ætate usque Maximilianæ quam maxime cepit. Neque vero effici temere poterit, ut Principes ipsi Romanum & Canonicum jus addiscant, quæ hujus doctrinæ est prolixitas, & plerumque aulicæ educationis indulgentia. Ut taceam, ingeniorum, quæ nonnunquam est, ruditatem. Imo & alia studia, ad quæ cum Principes omnino debeant institui, præripitur tempus addiscendo Juri Romano impendendum. Igitur, ex quo non potuit in Principibus esse Juris peritia, ex eo coacti quoque iidem sunt, judicia etiam maxima aliis committere. Secus quam antebac solitum, cum leges & consuetudines patrias nemo paulo intelligentior ignoraret, & pleraque ex æquo & bono componerentur. Huic rei consequens est mutatio circa diuturnitatem litium. Namque multum profecto lites illæ Principum solito factæ sunt diuturniores, ex quo per alios & coram aliis, quam qui sunt sui ordinis, litigare cæperunt, &c. Porro una cum legibus Romanis simul etiam ea in foro procedendi ratio, quæ Papali curiæ laudatur, opinionem in Germania accepit eximie prudentiæ pariter & æquitatis &c. Jam vero constat, cum aliunde, cum ex querelis Ordinum Imperii publicis, jam tum seculo quinto decimo effusis, eo tempore, quo leges Romane cæperunt pedem in Germaniam inferre, artis tabulariæ quoque sparsam in mores nostros sementem, uberrima fruge brevi divitem &c.

§. XI. Denique eadem *Dissert.* §. 107. p. 323. dum remedia sup-
peditat, sic differit: Emendari fortassis poterit Germania, si in temere
litigantes omnes, & seorsim in litium iniquos patronos gravissimis pœnis
animadvertatur, si iudicibus nihil ex partium sportulis aut muneribus sit
expectandum, sed cogantur illi suis ex publico stipendiis esse contenti; si
processus judicarius ad prisecam simplicitatem, quæ tot seculis floruit Ger-
mania

mania, quæque in omnium veterum rerum publicarum optimarum foris, in suis Hebræorum ab ipso Deo fuit probata, si non omni ex parte, saltem potiore reducat; si postremo quæcunque in controversiam trahi solent, singulis in locis legibus plebi etiam, quoad fieri potest, perspicuis definiantur &c.

§. XII. Sed quid ita cum Doctoribus juris fieret? Præprimis cum Academicis? Sudat hic Conringius, de O. I. G. circa finem p. 244. ut ipsis persvadeat, eorum nihil interesse, etiamsi mutationes istæ contingerent. Tandem tamen libere subjungit: *Sed & licet scholæ velint in posterum fastidire illa Romana & Pontificia jura, quoniam pauci amant discere, quod in usum non est; Reipublicæ tamen commodissima esse hæc, quæ nos in medium consulimus, manifestum est. Et vero non ex scholarum improbo more componenda Respublica; sed hæc illarum normam oportet esse.*

§. XIII. Omnia, quæ hætenus recensuimus, Conringii sunt. Liceat duo verba addere. Fiat justitia, & pereat mundus. Fiat justitia & pereant Leguleji ac Rabulæ. Is vero alterutri classi accensendus Doctor Juris, qui sublata Legulistica & Rabulistica, nil aliud didicit, unde Reip. inservire possit. Si qui sunt, quorum intersit, ut veritatis hujus defensione Studiosis non aperiuntur oculi, illi humanissime invitantur ad opponendum.

T A N T U M.



Q. F. F. Q. S.

IN ACADEMIA FRIDERICIANA
CELEBERRIMI AUTORIS

De

RATIONE STATUS

Dissertationem XXI. & XXII.

De

PROTESTANTIUM STATU, ET DE JURE EMIGRANDI,

Cum adjuncta Qvæstione

*An Philosophia communis tam Peri-
patetica quam Cartesiana Dogmatica
sit an Sceptica?*

Publice ventilabunt

Die XXVI, Octobris M DC XCIII, horis antemer. a 10. ad 12.
& pomeridianis a 3. ad 5.

CHRISTIANUS THOMASIUS,

& Respondens

GOTTFRIED Scheuerer /

Serveſta Anhaltinus.

L

QVÆ.



QUÆRO XI,

An Philolophia communis tam Peri-
patetica quam Cartesiana Dogmatica est,
an Sceptica ?

Videtur plus quam Sceptica?

§. I.

P*Eripateticus.* Spero hactenuste satis percepisse doctrinam de Prædicabilibus, jam ad alia in lectionibus nostris Logicis pergendum. *Discipulus.* Ignosce Præceptor, quod, antequam ad ulteriora progrediaris, quædam ex te quæram. *P.* Quære libere, erit gratissimum. *D.* Quid est Philosophia Sceptica & Dogmatica, & quomodo hæc duo genera Philosophandi a se invicem differunt? *P.* Cur ista quæris? Sæpe monui, quod non debeas in Sectis aliis curiosus esse, alias non magnos progressus facies in unica vera Philosophia, quam doceo. Dicam tamen. Philosophi *Dogmatici* dicuntur, qui aliquid affirmant vel negant, & verum aliquid esse, idque ab hominibus inveniri posse, asserunt. *Sceptici* contra de omnibus rebus dubitant, & nihil verum esse, aut si aliquid verum sit, id tamen ab hominibus inveniri non posse putant. Sunt vero *Sceptici duplicis generis*, alii *Academici*, qui veritatem quidem dari sed non inveniri posse dicebant, & hanc solam propositionem pro certo vera venditabant, nihil esse certum, seu nihil sciri; alii *Pyrrhonii* seu *Sceptici strictè dicti*, qui & verum non inveniri posse dicebant, & an aliquid verum sit, hæsitabant, nec illud certum esse dicebant, quod nihil sciatur. *Dogmatici* contra in varias sectas distribuuntur, quas inter eminuerunt olim illæ quatuor, *Platonica, Stoica, Epicuræa, Aristotelica*, hodie vero sola præ reliquis merito

mérito suo fulget Aristotelica tanquam inter stellas Luna minores. D. Adhuc unum lubentissime quærerem, si id cum pace Tua fieri possit: *An Aristotelica Philosophia, & quidem illa quæ hodie in Academicis docetur, Sceptica sit an Dogmatica?* P. Qualis hæc est quæstio? Jure Consulti quæstiones ejusmodi vocant quæstiones Domitianas. Quis ita absurdus esset, ut Aristotelicam Philosophiam haberet pro Sceptica, quæ tot egregias Disputationes suppeditavit contra Scepticos, quæ tanta cum constantia Dogmata sua, defendit, & pro veritate doctrinæ suæ & refutandis adversariorum doctrinis nihil non suscipit?

§. II.

D. Nec ego contradico. Sed audiui tamen hominem, qui heri in conversatione familiari, serio defendere volebat, Aristotelicam Philosophiam quæ in Academicis docetur, plusquam Scepticam esse, quia Sceptici pugnaverint saltem adversus alios, imo non tam impugnaverint alios, quam contra eorum insultum se defenderint, ipsi vero permiserint quemlibet opinione sua frui, & eos certe qui de secta eorum erant non infectati fuerint. Sceptici item inserviebant hypothese, & cum disputabant, regulariter conclusiones eorum primis eorum principiis, aut accuratius primis eorum dubitationibus cohærebant. At Aristotelicam Philosophiam, dicebat impugnare non saltem alias sectas, sed & ipsam iterum in varias sectas pessimo more inter se litigantes secerni. *Scholasticam*, videlicet, & *Libere philosophantem*, (si modo Philosophia simul libera esse possit & sectaria,) *Nominalem*, *Realem*, *Thomisticam*, *Scotisticam*, *Albertisticam* &c. Adhæc id maxime miserandum esse in Philosophia Aristotelica, quod fundamenta habeat Philosophiæ Scepticæ simillima, & his tamen fundamentis superædificet dogmata, qua ratione longe peior connexio sit in Philosophia Aristotelica, quam in Sceptica.

§. III.

P. Ex Discursu tuo facile divinari possum, quis sit autor hujus calumniæ. Quis alius esset quam iste novator, qui sub larva Philosophi Eclectici est ipse periculosissimus Scepticus. Quoties te monui, o dilecte, ut tibi ab occulto veneno istius hominis caveres! Nil nisi apertissimæ calumniæ sunt, quas effutiit, & pos-

sem in iis refutandis centum rationes afferre, si dignæ essent ut refutentur. Talia enim narrando, aut audiendo saltem solidissime jam refutata sunt. Habent hoc omnes Sectæ, ut iterum nova Schismata facta sint ab iis, qui genuinam semitam deseruerunt, & pugnandum est pro veritate, quicquid etiam dicant errorum patroni, qui libertatem aliquam philosophandi ineptiis istis introducere satagunt. Et quæso quam apertissima injuria est, asserere, Philosophiam Aristotelicam habere fundamenta Philosophiæ Scepticæ simillima. Necesse est, ut omnem pudorem ejuraverit homo nequissimus, qui contra veritatem evidentissimam talia profert. Quid? Logica nostra, instrumentum istud instrumentorum, quo mediante semper prostravimus Scepticos, Cartesianos, Gassendistas, Spinosistas, Hobbesianos & omnes quoque in Theologia adversarios, Logica inquam hæc Sceptica esset? Logica quæ in ipsa statim definitione pro dogmate primario, quod Logica sit ars, non habitus, pugnat, hæc Logica esset fundamentum Philosophiæ Scepticæ simile? O Corydon Corydon!

§. IV.

D. Quæso ne irascaris. Nam quæ sequuntur Logicam nostram tangunt propius. Vel ideo enim dixit, Philosophiam Aristotelicam esse plusquam Scepticam, quia disciplinas Dogmaticas superædificarent Logicæ plusquam Scepticæ, quæ non doceret, quomodo quis consequi deberet veritatem, imo quæ de ea aperte desperaret. P. Quantæ injuriæ! Sed perge. D. Atque hanc assertionem ita se monstrare posse dixit. Non urgere se velle, quam incerta apud vos sint omnia in Logicis, & quantæ Disputationes per singula Logices vestræ capitula in utramque partem ventilentur; se saltem assumere velle ea, quæ fere unanimi consensu doceantur a Vobis. Communiter ventilari Syllogismum pro medio inveniendi veritatem. At Syllogismo veritatem inveniri non posse. Sive enim Syllogismum consideres formaliter bonum, quem solum Logica vestra doceat, eum posse conflare ex propositionibus falsissimis, sive etiam materialiter bonum, hunc non posse extrui, si non quis habeat quæstionem & medium terminum. At vero hoc pacto veritatem haberi ante Syllogismum, non per Syllogismum investigari. Deinde, ait, Veritatem in com-

muni.

munibus Libellis Logicis dici esse finem Logices externum, finem externum vero definiri, quod sit talis finis, qui sit extra potestatem Artificis. Et itaque Veritatis inventionem ex mente vestra non esse in potestate Logici, hoc est, Philosophum per Logicam non posse invenire veritatem. Nec diffiteor Domine, valde me constrinxisse has rationes, ultimam potissimum. Quid si enim eam huic Syllogismo includerem :

Quæc. Philosophia ventilatur pro Dogmatica, & nullum suppetat instrumentum veritatem inveniendi, imo quæ in ea disciplina, quæ veritatis inventionem se docere profitetur, fatetur inventionem veritatis esse extra potestatem illius disciplinæ; illa Philosophia est plus quam Sceptica.

Atqui Philosophia Aristotelica ita comparata est. Ergo. quid Tu respondere velles? Ego enim non video quid responderi possit?

§. V.

P. Ah! jam de Te actum est. Venenum istius hominis jam totum te infecit. Qualis impudentia? Vix absolvimus doctrinam de Prædicabilibus, & tu me jam de universa Logica quasi examinare vis? Et non erubescis contra disciplinam a tot gravissimis viris, quibus ex quarto præcepto reverentiam debes, tam turpes ineptias præferre? Abi, abi ad Tuum istum Novatorem. Es enim indignissimus, ut responsio tibi ostendatur, quia eam ipse tu facillime posses invenire, nisi isto pestilentissimo veneno oculi mentis tuæ jam essent excæcati. Abi inquam, nam ego Te omnino desero. *D.* Me miserum! qui bona ex intentione dubium proposui, sine causa vapulo. Præceptorem amitto, virum alias optimum. Jam quo me vertam nescio.

§. VI.

Cartesianus. Salve adolescens optimæ spei. Audivi omnia quæ inter Te & Præceptorem acta sunt. Non despera. Sequere me. Ego te viam ducam quæ sola ad veritatem itur, quæ sola Sceptici efficacissime refutantur. *D.* Ago gratias decentes Vir Honoratissime pro benevole promisso officio. Tu vero quis es? *C.* Sequor vestigia acutissimi Cartesii. *D.* Multa alias sed confuse audivi de ista Philosophia. Nisi grave sit, valde me tibi obstringe-

res, si methodum saltem aperire velles, qua Scepticos aggredietur Cartesius, quia valde vereor, ne in Scepticam incidam Philosophiam.

§. VII.

C. Lubentissime faciam. Initio dubita. D. Bene, sed de quibus rebus? C. de omnibus. D. At quomodo dubitare possim v.g. me tecum jam loqui? C. Cur non? Annon putasti aliquando te videre baculum curvum in aqua, qui tamen fuit rectus? Ita etiam poteris dubitare an verum sit quod me videas. D. Mihi nulla videtur consequentia, quia infers a diversis, aut a particulari ad universale. Sed transeat. Quomodo dubitare possim quod v.g. habeam manus & pedes? C. Æque bene, Annon aliquando putasti in somno te habere cornua, aut manum esse abscissam? & tamen res aliter se habuit. D. Ita quidem est Domine, sed tum dormiebam. C. At nescis utrum dormias an vigiles. Quoties enim in somno te putasti vigilare? D. Videris iterum mihi male a somno ad vigiliam inferre. Nunquam enim vigilans putavi me dormire. Sed transeat & hoc. Quomodo dubitare possim de certissimis quibusdam axiomatibus v.g. Totum esse majus sua parte, aut de veritatibus Mathematicis v.g. bis duo esse quatuor. C. Imo vero, quia potest ens aliquod potentius te esse, quod te & in his deceperit. D. Atqui omnis internus assensus hic refragatur, qui potius dictitat impossibile esse ut in his & præcedentibus decipiat. Quomodo ergo de illis dubitare possem? C. Non poteris aliter evadere præjudicia, quæ in tenera juventute contraxisti. Neque dubitabis solum de his omnibus, sed utile quoque erit, ut illa de quibus dubitas, habeas pro falsis. D. Sed quomodo hoc possem, si ne quidem dubitare possum? Et quomodo pro falsis habere possum, de quibus dubito? Quia si pro falsis habeo, non dubito amplius. C. Imo hæc omnia facienda sunt, ut tanto clarius, quidnam certissimum & cognitu facillimum sit, inveniamus.

§. VIII.

D. Dic mihi serio Domine. Esne Scepticus an Dogmaticus? C. Sum utique Dogmaticus. Expecta saltem, mox audies quomodo post dubitationem de omnibus per *ſcō* Cogito, ergo sum, Scepticos refutem. D. At tu potius expecta paulisper, ut antea videam, utrum Sceptico me committam an Dogmatico? Videris

Videris esse plus quam Scepticus. Initio enim dubitas de omnibus. Idem facit & Scepticus. Deinde ea de quibus dubitas, simul negas. Eo temeritatis ne Scepticus quidem progrediebatur.

§. IX.

C. Confundis dubium Scepticum & Dogmaticum. Illud dubitat, ut semper dubitet: Hoc dubitat ut veritatem inveniat. **D.** Non confundo. Nego saltem dubium de omnibus rebus posse referri ad dubia Dogmatica. Qui enim dubitat ut verum inveniat, veri aliquid præsupponit, verum aliquod dari in quibusdam propositionibus certo persuasus est. Ergo non de omnibus dubitat. Qui vero de omnibus dubitat, quomodo potest dicere se dubitare, ut veritatem inveniat, præprimis si omnia pro falsis habeat? Est enim apertissima contradictio, omnia habere pro falsis ut aliquid verum esse deprehendam. Et considera quæso: annon methodus tua eo me perducatur, ut incipiam Scepticus esse, ut Scepticus esse desinam. Jam si semel sum Scepticus, impossibile est ut supposito hoc principio Dogmaticus fiam, quia jam istud commune & indemonstrabile postulatum Dogmaticorum omnium, dari aliquid verum, eo ipso quo de omnibus dubito, sustuli. Et ut videas te nihil agere posse methodo tua erga Scepticos, assumam in Tui gratiam illud tuum principium. Dubito de omnibus & ea pro falsis habeo, quid tum postea?

§. X.

C. Atqui dum dubitas, tamen cogitas. **D.** Nescio, quia dubito de omnibus. **C.** Atqui de hoc non poteris dubitare, quia impossibile est ut, dum dubites, non cogites. **D.** Fortasse possibile est: quia dum videbam baculum in aqua, cogitabam etiam illum curvum esse. Ergo si una cogitatio me decepit, non est fiducia ponenda in cogitationibus. **C.** Tamen non poteris non cogitare. **D.** Sæpe deceptus sum, quod putaverim me nihil cogitasse, & tamen postea admonitus recordatus sum me cogitationis fuisse oblitum, ergo possum etiam decipi, si putem me cogitare, ut dum hoc puto, non cogitem. **C.** Infers a diversis. Cogitas utique. **D.** Forte. Forte etiam non, quia poterit aliquod ens potentius me esse, quod me etiam decipiat, si putem me cogitare.

re. C. Minime. Nam fallat me quantum potest, nunquam tamen efficiet, ut nihil sim, quamdiu me aliquid esse cogitabo.

§. XI.

D. Si Scepticum continuare vellem, saltem perpetuo tibi contradicerem. At satis quidem istam personam sustinui, jam ad me redeo, & regero. Fallat me quantum potest, nunquam tamen efficiet, ut totum non sit majus sua parte, ut bis duo non sint quatuor, ut ego integer & vigilans non habeam manus ac pedes, ut baculus extra aquam rectus sit curvus, ut nos jam non loquamur invicem. Ergo non est dubitandum de omnibus. Ergo falsa est tua methodus. Ergo non opus est, ut plusquam Scepticus fiam, ea fine ne fiam Scepticus, præprimis cum cum Sceptico plane non sit disputandum, quia hoc æque frustraneum est, atque, quod communiter profertur, quod Scepticus verberibus erroris sit convincendus, de quo tamen jam quidem differere nolo.

§. XII.

C. Falleris optime Adolescens, & quantum percipio, mentem meam non recte percepisti. Qui Mathematici non sunt, non possunt ista percipere bene. forte alio tempore fies ad hæc cognoscenda magis habilis. D. Hoc audiui commune effugium Minorum Cartesianorum. Sed hoc indicium malæ causæ est. Mi sera philosophia, quæ non potest intelligi, nisi ab ætulis. Quæ hætenus differuimus, Mathesin præcedunt, quia jussisti & de veritatibus Mathematicis dubitare. Ego ista Fundamenta Philosophiæ meæ ponam. Male agit, qui sine firma ratione & cum primis veritatibus connexa quid certo asserit, ut sit in Philosophia vulgari. Et male agit, qui sine justa ratione de re aliqua dubitat, ut sit in Philosophia

Cartesiana.

T A N T U M.



Q. F. F. Q. S.

IN ACADEMIA FRIDERICIANA

CELEBERRIMI AUTORIS

De

RATIONE STATUS

Dissertationem XXIII. & XXIV.

De

JURE EMIGRANDI ET TOLE-

RANTIA DISSIDENTIUM,

Deque

TERRITORIALI POTESTATE CIR-

CA REGIMEN SECULARE,

Item de

FORMA ET REFORMATIONE AC

DECREMENTO IMPERII

Cum adjuncta Qvæstione

Quid sit accidens Prædicamentale?

Quid attributum & modus Cartesianorum?

Publice ventilabunt

Die II, Novembris M DC XCIII, horis antemer. a X. ad XII,

& pomeridianis a III. ad V.

CHRISTIANUS THOMASIUS,

& Respondens

ANTHONIUS GUNTHERUS Winckelmann/

Oldenburgensis.

M

QUE.

RATIONE STATIS

LIBERATIONE XII & XXIV

JURE ENIGRANDI ET TOLLE
RANTIA DISSIDENTIUM

TERRESTRIS POTESTATE CIR

CA REGIMEN SECLAM

FORMA ET REFORMATIONE AC

DECRETO LIBERII

Cum sancta Synodus

Quid sit accedens Prædicamentale?

Quid sit accedens Prædicamentale?

Publice ventilantur

Die II Novembrii M DC LIII pontificatus A X ad XII

CHRISTIANUS THOMASII


Publice ventilantur

ANTHONIUS THOMASII

Publice ventilantur

QUE

M



QUÆRO XII.

Quid est accidens prædicamentale?

Quid attributum & modus Cartesianorum?

Ego nescio.

§. I.



Uxurimus quæstione i. quid sit Substantia? Hactenus nemo certam definitionem nobis tradidit. Liceat jam progredi ulterius, & quærere etiam de accidente. Communis enim Peripateticorum doctrina est: Ens esse vel substantiam vel accidens. Communis doctrina est, accidens esse vel prædicabile vel prædicamentale. Prædicabile, quod opponitur rei essentiæ, prædicamentale, quod opponitur substantiæ. De prædicamentali autem nobis sermo est. Utrumque accidens Græcè *συμβεβηκός* dicitur: Uti utrumque quod utrique huic accidenti ex communi doctrina opponitur, (scilicet essentiæ & substantiæ,) Græcè *ἁπλόα* audit.

§. II.

Atque hic præmoneo, me distinctionem illam inter accidens prædicabile & prædicamentale, inter substantiam & accidens, supponere atque indulgere Peripateticis, utrumque dari. Nam multas alias possem afferre rationes, cur jure dubitem, an unquam Aristoteli fuerit cognita Substantia ab Essentiâ diversa; & adeo, an unquam cognitum fuerit ipsi accidens prædicamentale diversum a prædicabili. *ἁπλόα* regulariter essentiâ denotat, & ita apud Platonem communiter sumitur. Reddenda

ergo fore ratio Peripateticis, cur vocem ὁσίας apud Aristotelem per *substantiam* explicaverint, & hanc substantiam *essentie* contradistinxerint, cum tamen loca, ubi Aristoteles de ὁσία ex professo loquitur, ut in categoriis, capite περὶ ὁσίας & in lib. 4. Metaphys. c. 8. ὁσία ποσαχῶς λέγεται commodissime possint de essentia etiam intelligi, (præprimis si notes, essentiam vel sumi pro ipso ente reali, vel pro idea, qua homo ens reale concipit.) Ex quo capite obiter in usum sequentium illud notes, quod Aristoteles videatur ὁσίαν, quam vulgo substantiam reddunt, restringere ad corpora. Deinde quod accidens attinet prædicamentale, in ipsis categoriis, ubi tamen sedes materiæ erat de accidente prædicamentali, sive de prædicamento accidentis, nihil apud Aristotelem deprehendi. In lib. 4. Metaphysicorum cap. 30. seu ult. iterum ex professo de accidente tractat: quot modis dicatur accidens: & incipit: *Accidens est, quod inest alicui.* Sed videtur mihi & hoc caput saltem de accidente prædicabili loqui, quamvis verba ultima dicti capitis sint maxime obscura. Certe non arbitror perspicue posse doceri, intelligi accidens tale, quod sub se comprehendat novem categorias reliquas.

§. III.

Sed uti dixi, transeat illa quæstio de Aristotele. Concedo Peripateticis dari accidens prædicamentale, & exemplum do: quantum, quale &c. Quoniam autem potest lis oriri, utrum ens aliquod debeat ad substantiæ an accidentis classem locari, nec possum litem istam dirimere sine iusta definitione, quæro, quid est accidens? Non pigebit autem hic ea præmonuisse, quæ notavimus §. præced. Si enim Aristoteles ignoravit istud accidens prædicamentale, neque definitio ejus etiam quærenda est apud ipsum. Ergo quæramus apud Sectarios Aristotelis. Ita vere communiter definiunt: *Accidens prædicabile est, quod potest adesse & abesse sine subjecti corruptione.* Desumpta est hæc definitio ex Isagoge Porphyrii, deque ea nihil addo. *Accidens prædicamentale est, quod inest alii* (i. e. substantiæ) *tamquam subjecto.* Unde hæc definitio sit, nescio. Si ex libro 4. Metaph. c. 30. esse debet, recur-

recurrat obiectio mea in §. 2. Sed sit, unde sit: quæro rufius, quid est: *inesse alicui tanquam subiecto*? Respondent: *ita inesse alicui rei ut sine illa re non sit*. Ita communiter explicatur. Hic ingenue fateor, me nescire, quid dicant, imo videri potius, falsam esse definitionem accidentis.

§. IV.

Hoc ut intelligatur eo melius, suppono jam, novem reliquas categorias esse debere accidentia prædicamentalia. Ad *quantitatem* refertur oratio, numerus, tempus locus. (an bene? jam non disputo.) Locus non inest rei, sed est extra rem; tempus & numerus rebus non insunt, nam v. g. dum sum quadraginta annos natus, quadraginta anni non insunt mihi, sed perierunt, dum sum tertius in ordine aliquo, tertium illud vel numerus ternarius mihi non inest. Oratio ore prolata, quæ hic intelligitur, antequam proferretur, inerat mihi quidem, sed prolata, non amplius inest. Inter *qualitates* forma & figura non inest rei, sed eam terminat, & ideo, quia terminat, extrinsecum quid dicitur. Qualitates sensiles male dicuntur inesse rebus, cum jam dudum a novioribus demonstratum sit, v. g. nullum colorem esse in re, sonum, humidum, calorem, frigus &c. provenire a motu rei, aut dispositione externa partium. *Relatio* non inest rei, quia vi ejus res refertur ad aliam extra se. *Actio*, certe transiens est motus proveniens a substantia, ergo non inest; *Passiones* pleræque tangunt saltem substantiæ extrinsecum, ergo non insunt. *Quando & Ubi* pertinent ad tempus & locum, de quibus jam diximus. *Situs* non inest, neque enim sessio, neque ambulatio, neque statio mihi inest. *Habitus* non inest. Si nudus sum, nihil inest, si vestitus sum, extra me quid est; si calceatus sum, nec calceus nec calceatio insunt. Et tamen hæc omnia sunt accidentia. Ergo vel accidentia non insunt substantiis, vel non intelligo, quid sit inesse, & justam causam habeo quærendi definitionis istius explicationem.

§. V.

Ulterius. Si accidens est, quod est in alio tanquam in subiecto, sequitur *substantiam esse accidens*. Si id, cui alterum inest,

tanquam subiecto, est substantia, sequitur *accidens esse substantiam*. Probo consequentiam utramque uno exemplo. Creaturae omnes sunt in loco & tempore, tanquam in subiecto. Ergo locus & tempus erunt substantiae, & creaturae accidentia. Probo, quod sint tanquam in subiecto, quia sine loco & tempore nullae creaturae esse possunt. Probo, quod non esse possint, quia per *esse* hic (in propositione: Id est in alio tanquam in subiecto, quod sine illo alio *esse* non potest,) non intelligitur concipi, sed existere. Nam virtus, albedo &c. concipi potest sine respectu ad aliquod subiectum, sed non existit sine subiecto. At vero nec creaturae existere possunt sine tempore & loco. Ergo rursus non intelligo, quid sit accidens praedicamentale.

§. VI.

Nescio, an has difficultates subodorati fuerint Cartesiani, quod communiter cum magistro suo abstineant voce *accidentis*, & loco ejus *modi* aut *attributi* vocem adhibeant. Utinam vero per istos terminos *modi* & *attributi* rem non implicent magis quam explicent. Ipsorum singulorum sententias evolvere nolo, quia dulcius ex ipso fonte bibuntur aquae. Ita vero Cartesius *Part. 1. Princip. Philos. n. 48. seq. (1) Quaecumque sub perceptionem nostram cadunt, vel tanquam res rerumve affectiones quasdam consideramus, vel tanquam aeternas veritates, nullam existentiam extra cogitationem nostram habentes. (2) Ex iis, quae tanquam res consideramus, maxime generalia sunt substantia, duratio, ordo, numerus, &c. (3) Non autem plura quam duo summa genera rerum agnosco, unum est rerum intellectualium &c. sive ad substantiam cogitantem pertinentium; aliud rerum materialium, sive quae pertinent ad substantiam extensam. &c. (4) Cum autem agnoscimus, fieri non posse, ut ex nihilo aliquid fiat, tunc propositio haec: Ex nihilo nihil fit, non tanquam res aliqua existens, neque etiam ut rei modus consideratur, sed ut veritas quaedam aeterna, quae in mente nostra sedem habet, vocaturque communis notio, sive axioma. Cujus generis sunt, impossibile est idem simul esse & non esse &c. (5) Quantum autem ad ea, quae tanquam res vel rerum modos spectamus, opera pretium est, ut singula seorsim confi-*

consideremus. Per substantiam nihil aliud intelligere possumus &c. (vid. quæ excerpimus quæst. 1. thes. 5.) (6) Ex quolibet attributo substantia cognoscitur, sed una tamen est cujusque substantia precipua proprietas, quæ ipsius naturam essentiamque constituit, & ad quam aliæ omnes referuntur. Nempe extensio in longum, latum & profundum substantia corporea naturam constituit, & cogitatio constituit naturam substantia cogitantis &c. (7) Duratio, ordo & numerus a nobis etiam distinctissime intelligentur, si nullum iis substantia conceptum affingamus, sed putemus, durationem rei cujusque esse tantum modum, sub quo concipimus rem ipsam, quatenus esse perseverat, & similiter nec ordinem nec numerum esse quicquam diversum a rebus ordinatis & numeratis, sed esse tantum modos, sub quibus illa consideramus. (8) Et quidem hic per modos plane idem intelligimus, quod alibi per attributa vel qualitates. Sed cum consideramus substantiam ab illis affici vel variari, vocamus modos, cum ab ista variatione talem posse denominari, vocamus qualitates, ac denique cum generalius spectamus, tantum ea substantiæ inesse, vocamus attributa. Si verba adspicias, videtur hic omnia Cartesius clare & distincte proposuisse, si rem, ego quidem fateor, me nihil plane intelligere, neque graviter ferent Cartesiani, si ipsis sequentia proponam dubia, occupata circa istas quatuor voces, quibus hic utitur Cartesius: *Res, rei modus, attributum, æterna veritas.*

§. VII.

Quæro I. An æterna veritas differat a re & rei modo? Videtur affirmandum, ob verba expressa in n. 1. & 4. excerptorum. Videtur negandum, quia dicit Cartesius, utrobique eas in mente nostra sedem habere, ergo sunt modi mentis. Quæro II. An res & substantia sunt idem? Videtur affirmandum ob num. 3. item num. 5. verbo: *seorsim*, junctis verbis: *Per substantiam autem*. Videtur negandum, quia sub re comprehenditur duratio, ordo, numerus. n. 2. quæ non sunt substantiæ n. 7. Quæro III. An res & rei modus differunt? Videtur affirmandum, ob n. 1. 3. 5. 8. Videtur negandum, quia duratio & res est per n. 2. & rei modus per n. 7. Quæro IV. An modus, attributum &c. idem est cum eo, quod vulgo dicitur accidens? Videtur affirmandum per n. 8. & po.

potissimum ibi verba finalia. Videtur negandum, quia duratio, numerus &c. sunt accidentia, & tamen sunt Cartesio res ipsa durans & numerata *n. 7.* Quæro V. An *attributum & modus* differunt realiter? Videtur negandum, per *n. 8.* Videtur affirmandum, per *n. 6.* & quia communiter a Cartesianis attributum dicitur aliquid nobilius esse modo. Quæro VI. An *attributum* sit res an rei *modus*? Videtur esse ipsa res, quia Cartesius alibi dicit: mentem & corpus, quæ sunt res per *n. 3.* esse ipsam cogitationem, ipsam extensionem, quæ sunt attributa per *n. 6.*

§. IIX.

Si hæc dubia non resolvant Cartesiani, tota earum philosophia non intelligi potest, ut quæ his notionibus est superstructa. Puto autem esse talia dubia, quæ non aliter resolvi possint perspicue, quam si clara & distincta definitio rei, attributi, & modi detur, quam quæro.

§. IX.

De usu vero quæstionis præsentis non puto esse, quod rideant Philosophi Peripatetici, (quamvis aliqua Facultas talis Philosophica in Academia quadam vicina, censura sua approbaverit risum nonneminis intempestivum super quæstione, quid sit substantia?) Si enim dubia mea non resolvant, forte quæstiones meæ, si ita, uti incepti, sim perrecturus, destruere possent omnia eorum prædicamenta, & imo totam scalam prædicamentalem substantiæ, cui tota eorum Physica & Pnevumatica est superstructa.

T A N T U M.



Thomasius, Christian,

<<Christiani Thomasii ...>> Quaestionum promiscuarum historico-
philosophico-iuridarum in Academia Fridericiana Anno 1693 publice
ventilatarum maximam partem paradoxarum Dodecas

Halae Magdeburgicae [1693]

Regensburg, Staatliche Bibliothek -- 999/A.Diss.10820

urn:nbn:de:bvb:12-bsb11077729-2